

Ekwo
AWufu

Mkpamẹhu ndu Ízurẹlu

¹ Waa ẹpha unwu Ízurẹlu, tso Jiékọpu laa alì ndu Ijiputu baa. Onyemonye dutaru ndibe iya lashia ẹka ono. ² Rúbẹnu; waa Simiyọnu; waa Lívayi; waa Jiuda; ³ waa Isaka; waa Zebulọnu; waa Benjiaminu; ⁴ waa Danu; waa Nafutali; waa Gadu; waa Asha. ⁵ Oshilọkpa Jiékọpu tukuru dọ ukporo umadzu ẹto l'umadzu iri. Jiósẹfu nọhawaa anọno l'alì ndu Ijiputu.

⁶ Tọbudu iya bọ; Jiósẹfu yee unwunna iya g'ẹphe ha; waa ọgbo k'ono tukurwa nwushihukota. ⁷ Ọle ndu Ízurẹlu azushiele-a; bya abarahọ. Ẹphe zushiru kwatakpọo paa ẹka apaa; k'ọphu ẹphe tukoerupho alì ono sweta.

⁸ Noo ya; onye eze ọphúú, bọ onye ta amadọ kẹ Jiósẹfu amama ophu bya abọru eze lẹ Ijiputu. ⁹ Noo ya; ọ sọ ndu alì iya: “Unu lenu lẹ ndu Ízurẹlu akaakwa anyi shii k'ọphu ẹphe e-mechaa ka anyi ọkpehu. ¹⁰ Unu byakwa g'anyi kwabẹru phẹ ẹnya. Ọdumeka bẹ ẹphe a-kabakwa evuvu. Ọ -bọru l'a nọnyaru; ọgu daa bẹ ẹphe e-tsokwaru ndu ọhogu anyi bya etsoo anyi ọgu; gbado ẹka-a lashia.”

¹¹ Ọo ya bọ; ndu Ijiputu bya ahọta nemadzọ; mee phẹ udumalì; sọ g'ẹphe kebutajẹ ndu Ízurẹlu g'ẹphe je ozi mkpọnwu-ẹhu. Ẹphe bya akpọa mkpukpu Pitomu; waa mkpukpu Ramesesu g'ọ bọru mkpukpu ẹka Fero e-dobeje iphe. ¹² A -ka phẹ akpa ẹhu; ẹphe agbẹ ka azushi ka l'otu dzuru ẹkameka. Ndu Ijiputu kabakpọoro atsu ndu Ízurẹlu ebvu; ¹³ bya akabakpọoro eme g'ẹphe jeje ozi mkpọnwu-ẹhu. ¹⁴ Ẹphe kpabẹ phẹ ozi; gude mee ndzọ

phẹ buru phẹ aphụ; mee g'ẹphe yoshi ẹja buloku. Teme ẹphe aghakwa pho ẹja mini; mewaro ozi, no-gbua l'egu phẹ. Iphe, bukota ozi, ndu Ijiputu kebutaru phẹ g'ẹphe je bukotaru ozi mkponwu-ẹhu.

¹⁵ Eze ndu Ijiputu su unwanyi, eswije ndu Hiburu ime, ẹpha phẹ bu Shifura; waa Puwa: ¹⁶ “Unu -nodu eswi unwanyi ndu Hiburu ime m'ẹphe nodu anwu nwa; ẹphe -nwue ya pho; unu nyoje phẹ. O -buru nwoke; unu gbuje iya; teke o bu nwata nwanyi; unu hajekwa iya g'o nodu ndzu!” ¹⁷ Obenu le ndu eswije ime ono atsụ Chileke ebvu; ophu ẹphe emejedu iphe ono, eze Ijiputu ziru phẹ ono. Ẹphe nodu ahaje nwa-nwoke; ẹphe anodu ndzu. ¹⁸ Noo ya; Eze ndu Ijiputu bya ekuko ndu eswije ime ono; bya asu phẹ: “?Bu gunu be unu meru iphe, du egube-a? ?Bu gunu kparu iphe unu ahaje unwegirima unwoke; ẹphe anodu ndzu?”

¹⁹ Unwanyi eswije ime ono su Fero: “Ti madu l'unwanyi Hiburu ta adudu ge ke ndu Ijiputu. Okpehu du phẹ. O nodu abujeru; ndu eswije ime -bya abyarwuta ẹka ono; ẹphe ezedawaa.”

²⁰ Oo ya bu; Chileke meeru ndu eswije ime ono iphe-oma. Ndu Izurelu nodu evu; bya akakporo aka l'otu. ²¹ Chileke mekwapho g'unwu ndu eswije ime ono ka l'otu; kele ẹphe atsụ iya ebvu.

²² Noo ya; Fero bya aturu ndu nkiya g'ẹphe ha ekemu su: “O -buru le ndu Hiburu nwuru nwa; o -buru nwoke; g'e jeje echie ya l'enyimu Nayilu! Teke o bu nwanyi l'a haa ya g'o nodu ndzu!”

2

Anwunwu Mosisu

¹ Noo ya; nwoke, shi l'onulo Lívayi bya aluta nwanyi, shikwapho l'onulo Lívayi. ² Nwanyi ono bya atsuta

ime; bya nwua nwa nwoke. Ọ hụmaepho lẹ nwata ono manukaru mma; o hee ya l'edomi onwa eto. ³ Ọ nonyaa; ọphu o duedu ike domikota iya edomi. Ọ bya egbuta èjì gude kpaaru iya nkata; bya echia ya urwa mbekee. Ọ bya ekuru nwata ono ye l'ime nkata ono; pata je edobe l'aguga enyimu Nayilu eka èjì zeru. ⁴ Nwune iya nwanyi bya eje apfuru ụzenya g'ọ maru iphe, l'e-eme nwata ono.

⁵ Noo ya; nwa Fero kẹ nwanyi jeshia awu ehu l'enyimu Nayilu ono. Yele unwumboko, ejeru iya ozi swiru tuko eje l'aguga enyimu ono. Ọ hụma nkata ono g'ọ nọ l'ime èjì ono; bya ezia ohu iya nwamgboko g'o je ewotaeduru iya ya. ⁶ Ọ kpuhaa ya; bya ahuma nwata ono. Nwata ono nodu ara ekwa; imemini iya du iya. Ọ su: “Ọ kwa nwa onye Hiburu bẹ ọ bu!”

⁷ Nwune nwata ono kẹ nwanyi su nwatibe Fero ono: “?Bu gẹ mu je ekuaru ngu nwanyi Hiburu, e-heru ngu nwata ono?”

⁸ Ọ su iya ngwa; g'o jenu. Nwamgboko ono tugbua je ekua nene nwata ono. ⁹ Nwada Fero su ne nwata ono g'o kuta nwata ono je ehefutaru iya; gẹ ya pfua ya ugwo. Noo ya; nwanyi ono bya ekuta nwata ono je eheahaa. ¹⁰ Nwata ono vutaepho; o duta iya dulaaru nwatibe Fero ono; ọ buru nwa iya. O woru iya gwa Mosisu; kẹle ọ suru l'oo nwata, ya gutaru lẹ mini.

Mosisu agba ala Midiyanu

¹¹ Noo ya; o rwua ujiku lanu gẹ Mosisu vutachaar; o jeshia ahuma ndu nkiya l'eka ono, ephe eje ozi mkponwu-ehu ono. Ọ hụma onye Ijiputu eka oochi onye Hiburu iphe, bu onye lanu l'unwunna iya. ¹² Ọ bya achika enya ibe k'ẹbo ẹbo; ọphu ọ dudu onye ọ humaru. O chigbua onye Ijiputu ono bya egude eja kpmia ya. ¹³ O -rwua lẹ nchitabohu iya; ọ tugbukwa ọzo je ahuma ndu

Hiburu umadzu labo eka ephe alwu ogo. O su onye ophu achio opfu: “?Denu g'og nwuru iichi onye Hiburu ibe ngu iphe?”

¹⁴ Onye k'ono su iya: “?Bu onye meru ngu onye-ishi; waa onye-ikpe anyi? Togo ?iimewaa g'i gbua mu g'i gburu onye Ijiputu pho?” Noo ya; ndzu guahaa Mosisu; O rja su: “Iphe-a, mu meru-a be a -gbeg madzuchawaru nu.”

¹⁵ Fero numaeppo iphe ono bya emeahaa g'o gbua Mosisu. Mosisu gbafo l'ibe Fero gbaru lashia ali ndu Midiyanu je eburu. O jerwua bya anodu anoo l'aguga welu. ¹⁶ Noo ya; onye uke ndu Midiyanu nweru unwumboko esaa. Ephe bya leg welu ono bya ekuta mini ye l'iphe, eeyejeru anu mini g'aturu ibe nna phe ngu. ¹⁷ O nweru ndu ozo, eche aturu, byaru bya achifu phe. Noo ya; Mosisu gbalihu bya eyetaru phe eka; kuta mini doberu aturu phe.

¹⁸ Unwumboko ono lapfuoppo nna phe, bu Ruwelu; o su phe: “?Denu g'og nwuru unu lwaru egwegwa egube-a ntanu-a?”

¹⁹ Ephe su iya l'o nwekwaru nwoke Ijiputu, nafutaru phe l'eka ndu eche aturu ndu ophu. Teme o bya esetafukwapho mini doberu aturu phe; o ngu.

²⁰ O su unwada iya: “?Denuhunu nwoke obu? ?Bu gunu kparu iphe, unu paru iya haa? Unu je ekua ya g'og bya eria nri.”

²¹ Mosisu kweta; yeg nwoke ono buru. Nwoke ono bya ekuru nwa iya nwanji, bu Zipora kee Mosisu; o luru. ²² Zipora bya eyeru iya nwa nwoke. Mosisu gu ya Geshomu; noo kele Mosisu suru: “Mu bu onye lwaru alwalwa l'ali ndu ohozo.”

²³ A nonyakpoepo; eze ndu Ijiputu nwuhu. Ndu izurelu nodu atsu pfupfufu; echi mkpu; ara g'e yeru phe eka l'iphe-ehuka ono, ephe eje l'abubu ono, ephe

bū ohu ono. Èkwa ono, ẹphe ara ono rwua Chileke nchì.
²⁴ Chileke nūma ude ono, ẹphe atsu ono; bya anyata
 ọgbandzu ẹphe lẹ Èbirihamu; waa Áyizaku; waa Jiékọpu.
²⁵ Chileke bya aghaa ẹnya; lee ndu Ízurẹlu; bya ariahaa
 ọriri ẹhu phẹ.

3

Ọku, l'enwu l'irwu oshi

¹ No iya; Mósísu nọdu eche aturu Jieturo, bū nna nyee
 ya; bya aburu onye uke ndu Midiyanu. O -rwua ujiku lanu;
 ọ chita aturu ono gude jeshia ẹka du ẹnya l'echiegu. O
 jee jasu o jerwua l'ubvu Horẹbu, bū iya bū ubvu Chileke.
² Ọ buru l'ẹka ono bẹ Ojozi Chipfu gude ọku, enwu l'irwu
 oshi hee ya l'atatiphu. Mósísu hūma l'ọku ono enwu
 l'irwu oshi ono; obenu l'o to tsupyashidu iya. ³ Ọo ya
 bū; Mósísu sụ: “Gẹ mu bya ejekubeekwa iphe ọwa-a
 ntse; mbu iphe ọwa-a, tufuru ẹhu, anwu nu-a; gẹ mu
 maekwaru iphe, kparu iphe, ọku ono te etsupyashidu
 irwu ono.”

⁴ Chipfu hūmaepho l'ọ kpiritawaru ntse g'o lerweta
 ẹnya; Chileke shi l'irwu ono kua ya oku sụ: “Mósísu!
 Mósísu!”

Mósísu za ẹnu; sụ: “Wakwa mu nọ l'ẹka-a.”

⁵ Chileke sụ iya: “Ta kpiritabaekwaru ntse ọzobaal
 Yefu akpokpa ngu; noo kele ẹka ono, i pfuru ono bū
 alì, du nsọ.” ⁶ Sụ iya: “Ọ kwa mbẹdua bū Chileke kẹ
 nna ngu; buru Chileke kẹ Èbirihamu; buru Chileke kẹ
 Áyizaku; bya aburu Chileke kẹ Jiékọpu.” Mósísu nūmae
 ya phọ; o wohaa iphu; kele ndzu ele Chileke ẹnya wataru
 iya agugu.

⁷ To budu iya bū; Chipfu sụ: “Mu hūmawaru iphe-
 ẹhuka, ndibe mu eje l'alì ndu Ijiputu. Mu nūmawa mkpu,
 ẹphe echi sụ g'a dzota phẹ l'ẹka ndu udumali; tẹme

iphe-ẹhuka, ẹphe eje rwuwa mu l'ẹhu. ⁸ Ọo ya bụ ẹ mu byawaru gẹ mu nafuta phẹ l'ẹka ndu Ijiputu; duru phẹ laa l'alị, dụ ree; bya adu shii; mbụ alị mini ẹra-eswi; waa manụ-ẹnwu jiru kẹ pyimu pyimu; mbụ l'alị ndu Kénanu; waa ndu Hetu; waa kẹ ndu Amọru; waa kẹ ndu Pérezu; waa kẹ ndu Hevu; tẹme waa kẹ ndu Jiebusu. ⁹ Nta-a bẹ mkpu, ndu Ízurẹlu echi rwuwaru mu ẹ nchi; tẹme mu humawaa gẹ ndu Ijiputu gude akpa phẹ ẹhu. ¹⁰ Ọo ya bụ; ẹ nta-a bẹ mu ezi ngu g'i jepfu Fero je edufuta ndibe mu, bụ ndu Ízurẹlu l'alị Ijiputu!”

¹¹ Mósísu sụ Chileke: “?Bụ onye bẹ mu bụ k'ẹje apfuru Fero l'iphu; je edufuta ndu Ízurẹlu l'alị Ijiputu?”

¹² Chileke sụ iya: “Mu e-swiru ngu eswiru. Tẹme waa iphe-ọhubama, ii-gude maru l'ọo mbẹdua ziru ngu ono baa: I -dufutaẹpho ndu ono ẹ Ijiputu bẹ unu a-barụ mụbe Chileke ẹja l'úbvú-a.”

¹³ Mósísu sụ Chileke: “Ọ -bụkwanuru ẹ mu jepfuru ndu Ízurẹlu je asụ phẹ: ‘Chileke kẹ nna unu phẹ zikwaru mu gẹ mu byapfuta unu.’ Ẹphe -jịkwanua mu sụ: ‘?Ẹpha ngu aza gụnu?’ ?Bụ gụnu bẹ mu e-yeru phẹ ọnu?”

¹⁴ Chileke sụ Mósísu: “Mu bụ onye mu bụ. Iphe, ii-pfuru ndu Ízurẹlu bụ l'ọo mbẹdua, bụ Chipfu ziru ngu g'ị byapfuta phẹ.”

¹⁵ Chileke sụkwapho gẹ Mósísu sụ ndu Ízurẹlu: “Ọo Chipfu, bụ Chileke kẹ nna unu phẹ; mbụ onye bụ Chileke kẹ Ẹbiríhamu; bụru Chileke kẹ Áyizaku; bya aburu Chileke kẹ Jiékọpu bẹ ziru ngu g'ị byapfuta phẹ. Noo ẹpha mu bụ ono jasụ ẹ tuutuutuu ẹ mịimiimii. Ẹpha ono bẹ ọgbo mẹ ọgbo e-gude maru mu.”

¹⁶ “Tụgbua je ekukọo ndu bụ ọgerenya ẹ Ízurẹlu; sụ phẹ ẹ Chipfu, bụ Chileke kẹ nna unu phẹ; byapfutaru ngu; mbụ onye ono, bụ Chileke kẹ Ẹbiríhamu; bụru

Chileke ke Áyizaku; bya aburu Chileke ke Jiékòpu. Waa iphe o pfuru baa: ‘Mu lewaru unu enya; hūma egube iphe, eeme unu le Ijiputu. ¹⁷ Mu kwewaa ukwe le mu edufuta unu l'iphe-ehuka, unu eje le Ijiputu; duru unu laa ali ndu Kénanu; waa ke ndu Hetu; waa ke ndu Amoru; waa ke ndu Pérezu; waa ke ndu Hevu; teme waa ke ndu Jiebusu; ali, mini era-eswi; waa manu-enwu aso gborogboro.’

¹⁸ “Ndu bu ogerenya Ízurelu be a-ngaberu ngu-a nchi. Oo ya bu; gubedua unu le ndu bu ogerenya atuko swiru jepfu eze ndu Ijiputu je asu iya: ‘Chipfu, bu Chileke ndu Hiburu be byapfutakwaru anyi. Hanaa anyi g'anyi jee ije ujiku eto; lufu l'echiegu je agwaa Chipfu, bu Chileke anyi.’ ¹⁹ Ole mu makwaru-a l'eze ndu Ijiputu te ekwedu g'unu je; gbahaa l'e meru iya l'okpehu. ²⁰ Oo ya bu le mu a-machi eka mu; gude iphe, du biribiri, mu e-me le Ijiputu nua phe chipfu. Iphe ono -mechaepho be oo-kwechaa haa unu g'unu lashia.

²¹ “Mu e-me ge ndu Ízurelu-a du ndu Ijiputu l'obu; k'ophu bu; unu -lashiepho; unu ta agbaduru eka. ²² Nwanyi, nonu a-su onye obutobu iya; ozoo nwanyi, bu l'ulo iya g'o nu iya iphe, e meru le mkpola-ochaa; waa ophu e meru le mkpola-ododo; waa uwe, unu e-ye unwegirima unu. Oo ya bu unu eshi nno kwaa iphe ndu Ijiputu l'okwata gude lashia.”

4

Iphe-ohumalenya, Mosisu e-me

¹ Mosisu su: “?O -bukwanuru l'ephe te kwetaduru iphe, mu pfuru; ozoo l'ephe te ekwedu ngaberu mu nchi; su l'oo uka le Chipfu ta abyapfutaduru mu-e?”

² Oo ya bu; Chipfu jia ya; su: “?Bu gunu be i gude l'eka ono?”

Ọ sụ iya l'ọ kwa mgboro.

³ Chipfu sụ iya: “Togboedu iya l'alì!”

Ọ togbo iya. Ọ ghoo agwo. O ye okpa l'oso. ⁴ Chipfu sụ iya: “Machia eka gude iya le mgbodzu!” Mosisu bya amachia eka; zu agwo ono. Ọ nodu iya l'eka; gh-zia buru mgboro g'o shi buru. ⁵ Chipfu sụ iya: “Mee iphe-a gude mee g'ephe kweta le Chipfu, bu Chileke ke nna phe; mbu onye ono, bu Chileke ke Ebirhamu; buru Chileke ke Ayizaku; bya aburu Chileke ke Jiekopu be byapfutaru ngu nu.”

⁶ Chipfu byakwa asu Mosisu ozo: “Nwua eka le mkputepho ngu!” Mosisu bya eworu eka ye le mkputepho. O wofutashia eka; ekpenta nmawa iya eka swokoswoko; eka chahuwa iya roboo.

⁷ Chileke sụ iya: “Ngwa; yephu iya azu le mkputepho ngu!” Tobudu iya bu; Mosisu bya eyephu eka iya azu le mkputepho iya ono. O wofutashia ya; ekpenta ono mishihuwa; mbu eka dukotawa iya g'ehu iya ibe iya ophuu du.

⁸ Noo ya; Chipfu sụ: “Ọ -buru l'ephe te ekwetadu nkengu; ozoo l'ephe ta angabeduru ngu nchi l'iphe-ohumalenya ke mbu pho be ephe e-kweta-a k'ebo-a. ⁹ Obenu o -buru l'ephe te ekwetaduru; ozoo l'ephe ta angabeduru ngu nchi l'iphe-ohumalenya labo-a; je ekuta mini l'enyimu Nayilu; bya awushi l'alì okponku. Mini ono, i kutaru l'enyimu ono a-gho mee l'alì eka ono.”

¹⁰ Mosisu sụ Chipfu; “Oowaa Nnajiuphu; mu ta amakwa g'aasaje opfu. Eshikpo le mbu bya aduru nta-a, iipfu eyeru mube onye-ozu ngu-a be mu buepho onye epfu deneshii bya aburu onye epfu l'onu oku.”

¹¹ Chipfu sụ iya: “?Bu onye meru onu nemadzu? ?Bu onye emeje nemadzu l'oda nkuchi; ozo onu kpurukudukuu? ?Bu onye emeje nemadzu l'opphu

uzo; ozoo g'ọ tsua ishi? ?Tọbudu mbedua, bu Chipfu?
¹² Ngwa je! Mu e-yetaru ngu-a eka g'i pfua opfu; bya ezikwa ngu pho iphe, ii-pfu.”

¹³ Obenu le Mosisu suru: “Jiko Nnajiuphu mu; zia ya ro onye ozo g'o jee.”

¹⁴ Noo ya; Mosisu mee; ehu ghuahaa Chipfu egu. O su Mosisu: “?Nwune ngu, bukwanu Eronu, bu oshilokpa Liviye-e? Mu maru le yebedua maru g'eepfu opfu. O nọakwa l'uzo eka oobyu ngu ndzuta. Ozo bu l'obu a-tso iya utso shii me o -huma ngu. ¹⁵ Ii-pfuje yeru iya; karu iya iphe, oo-pfu. Mu a-nọdua eyeru unu n'ebọ eka l'epfu opfu; teme o buru mbedua a-nodu ezije unu iphe, unu e-meje. ¹⁶ Oo Eronu be e-pfuchitajeru ngu opfu l'atatiphu ndu Izurelu. Mbụ l'oo-duẹpho g'ọ bu yebedua bu onu ngu. Teme l'i duẹ ya pho g'i bu Chileke. ¹⁷ Olo o g'i gude mgboro-a, i gude l'eka-a; k'ophu ii-gude iya meje iphe-ohumalenya-a.”

Mosisu ala azu le Ijiputu

¹⁸ Oo ya bu; Mosisu bya ejepfu Jieturo, bu ogo iya bya asu iya g'ọ haa ya ge ya jepfu ndibe phe l'ali ndu Ijiputu je amaru ?ephe no-dzukwaduru-a ndzu?

Jieturo kweta bya asu iya g'ọ tokwa ehu.

¹⁹ Teke ono be Chipfu nọhawa l'ali ndu Midiyanu; su Mosisu: “Tugbua laphu azu l'ali ndu Ijiputu; noo kele iphe, bu ndu ono, shi achọ ndzu ngu ono nwushihuchawaru.” ²⁰ Oo ya bu; Mosisu bya eduta nyee ya; waa unwu iya; ephe no-koru l'eli nkafu-igara. O bya ewota mgboro Chileke ono gude l'eka; o buru phe ala ali Ijiputu.

²¹ Chipfu su Mosisu: “I -laepho Ijiputu; tukokwa iphe, du biribiri ono, mu yeru ngu l'eka g'i mee ono mekota l'iphu Fero. Olo mu a-kpochi iya okpoma akpo-chi;

k'ọphu o too kwedu aha ndu ono g'ẹphe la. ²² Iphe, ii-pfuru Fero bu ẹ mube Chipfu suru l'ọo Ízurẹlu bu ọkpara mu. ²³ Mu pfuwaru ngu sụ g'ị haa ọkpara mu ono g'ọ tughua; k'ọphu oo-je abaru mu ẹja. I -jika l'ị tị hadu iya g'ọ tughua be mu e-gbukwa ọkpara nkengu.”

²⁴ Noo ya; o rwua l'uzo ẹka ẹphe kwaru; Chipfu byapfuta Mosisu bya emeahaa g'o gbuaya. ²⁵ Zipora wota mkpuma, atsụ nkọ; bya ebuta akpapyi nwa iya bya edenyi Mosisu l'ọkpa sụ iya: “Nta-a be anyi lụwaru l'ẹhu mee.”

²⁶ Ọo ya bu; Chipfu haa ya. Teke ono, Zipora suru l'ẹphe lụwaru l'ẹhu mee be iphe, ọorwu ẹka bu k'ebu úbvù.

²⁷ Chipfu sụ Erọnu g'o je l'echiegu je agba Mosisu ndzuta! Ọo ya bu; Erọnu gbapfu Mosisu l'úbvù Chileke; je anma iya akpa. ²⁸ Mosisu bya akọkotaru Erọnu iphemiphe, Chipfu ziru iya g'o je epfua; wakwaphọ k'iphe-ọhumalenya ono, Chileke suru g'o meshia ono.

²⁹ Mosisu yee Erọnu bya ekukọta ndu bu ọgerenya Ízurẹlu g'ẹphe ha. ³⁰ Erọnu bya atuko iphemiphe, Chipfu pfushiru Mosisu pfukotaru phe. Ọ bya emee iphe-ọhumalenya ono l'iphu ndu Ízurẹlu; ³¹ ẹphe kweta. Ọo ya bu; ẹphe numaepho ẹ Chipfu akpa ishi phe; teme waa l'ọ humawaru iphe-ẹhuka, ẹphe eje; ẹphe phozeta baaru Chileke ẹja.

5

¹ E mechaa; Mosisu yee Erọnu jepfu Fero bya asụ iya: “Waa iphe, Chipfu, bu Chileke ke Ízurẹlu epfu baa: ‘Haa ndibe mu g'ẹphe je abọoru mu iphe l'echiegu!’ ”

² Fero sụ: “?Bu onye bu Chipfu k'ọphu mu a-ngaberu iya nchị; haa ndu Ízurẹlu g'ẹphe tughua? Sụ: Mu ta amakwa Chipfu; ọphu mu ahakwa ndu Ízurẹlu g'ẹphe tughua.”

³ Eṗhe sù iya: “Chileke ndu Hiburu byapfutakwaru anyi. Jiko hanaa g'anyi wùru je l'echieḡu jee ije ujiku ẹto je egweeru Chipfu, bụ Chileke anyi ngweja. Ọdumeka bẹ oo-gudekwa iphe-ememe; ọzoo ogu-echi gbushia anyi.”

⁴ Obenu l'eze ndu Ijiputu kuru Mosisu yẹe Eronu; sù phẹ: “?Bụ ḡunu kparù iphe unu jeru je achifuta ndu ono l'ozi, ẹphe eje? Ngwa; unu tṡgbua laphu azù l'ozi unu!”

⁵ Ọ sṡkwapho: “Unu lewaro ya! Nta-a bẹ ndu Ízurelu hawaa igwerigwe; tẹme unu gbẹ bya akpọshiaha phẹ ozi, ẹphe eje!”

⁶ Ọ bṡru mbọku ono kwapho bẹ Fero kuru ndu udumali; waa ndu-ishi l'ozi ndu Ízurelu; sù phẹ: ⁷“Unu ta anṡjehe ndu Ízurelu ẹswa, ẹphe e-gude yoo ẹja! G'ẹphe jeje achọ ẹswa chita l'onwophe! ⁸ Ọle g'unu mekwaa phẹ g'ẹphe yotaje iya g'o dzua ole, ẹphe shiwaa ayotaje iya. Unu te egbubotakwa iphe l'ẹja ole, ẹphe shi ayotaje. Eṗhe bụ ndu ẹnyiru; ọ bṡru iphe ono meru g'o gude; ẹphe nodu echi mkpu sù g'a haa phẹ g'ẹphe je egweeru Chileke phẹ ngweja. ⁹ Unu kabaa phẹ akpabẹ ozi; k'ophu ọzo k'ẹje angabẹ nchi l'asulasu ta adueduru phẹ.”

¹⁰ Tọbudu iya bụ; ndu udumali; waa ndu-ishi l'ozi ono bya asù ndu Ízurelu: “Waa iphe, Fero pfuru baa. Ọ sṡru g'a ta nṡjehe unu ẹswa. ¹¹ G'unu jeje achita iya l'onwunu l'eka unu humaru iya. Ọle ozi unu bẹ e tee gbubotakwa iphe me nanu.” ¹² Ọo ya bụ; ndu Ízurelu gbakashihu tsoru ali ndu Ijiputu l'ophu cholaha ẹswa, ẹphe e-vuta gude bya ayọ ẹja obu. ¹³ Ndu udumali chiahaa phẹ kpabekpabe; sù phẹ: “Ngwa! Unu yota-dzua ẹja ole, unu shi ayotaje ujiku lanu teke pho, e shi evutajeru unu ẹswa pho!” ¹⁴ Ndu udumali Fero bya echiahaa ndu-ishi l'ozi ndu Ízurelu ono iphe; mbu ndu ono, ẹphe hotaru dobe g'ẹphe letaje ndu Ízurelu ẹnya ono; sù phẹ: “?Bụ ḡunu

kparu iphe, unu ta ayọ-dzuduru ẹja unu unyaphu waa ntanu-a; g'unu shi ayọ-dzujehawa iya?"

¹⁵ Ndu-ishi l'ozu ndu Ízurẹlu ono bya awuru jepfu Fero; su iya: “?Bu gunu be iime anyibe ndu-ozu ngu egube-a? ¹⁶ Ndu ozu ngu be e te vutajeduru ẹswa; teme a sukwapo g'anyi yoo ẹja. A nọdu echi ndu-ozu ngu iphe; l'eka o gbẹ buru ndu nkengu be o shi l'eka.”

¹⁷ Fero su: “Oo ke mmanu ono, unu no ono meru iphe; unu pfuaharu g'a haa unu g'unu je egweeru Chipfu ngweja. ¹⁸ Ngwa! Unu tugbua nta-a je eje ozi, unu eje. E tee vutabaeduru unu ẹswa. O le mkpakọ bukwa g'unu yota-dzujee ẹja ole, unu shi ayotaje!”

¹⁹ Ndu-ishi l'ozu ndu Ízurẹlu gbẹ teke ono maru l'ẹphe nmaru l'agaga g'ẹphe numacharu l'e tee gbubotaduru iphe l'ẹja ole, ẹphe shi ayotaje ujiku ophu. ²⁰ Ẹphe lufutaepo l'ibe Fero; ẹphe huma Mosisu; waa Eronu l'eka ẹphe pfuru echeru phe. ²¹ Ẹphe su: “Ge Chipfu lekwa ẹnya l'iphe-a, unu meru-a; kpee unu ikpe iya! Kele unu kpataru; anyi duchawanu Fero yee ndu-ozu iya ashị. Nta-a be unu wowaru mma ye phe l'eka g'ẹphe gbushia anyi.”

Chileke ekwe ukwe adzo ndu Ízurẹlu

²² Mosisu jepfu Chipfu bya asu iya: “Oowaa Nnajiuphu! ?Bu gunu kparu iphe, iime ge ndu-a jee egube iphe-ehuka-a? ?Bu iphe, i zidoru mu baa? ²³ Eshi teke mu jepfucharu Fero je egude ẹpha ngu pfuru yeru iya be o wotaru iphe-ehuka, du egube-a nmakobe phe l'ishi. Ophu o to dudu iphe, i meru me nanu gude dzota ndu nkengu.”

6

¹ Noo ya; Chipfu sù Mósisu: “Nta-a bẹ̀ ịi-hụmanu-a iphe, mu e-me Fero. Kẹ̀le ọo ọkpehu mu bẹ̀ mu e-gude mee l'ọ haa phẹ; mbụ l'ọo ọkpehu mu bẹ̀ mu e-gude mee l'ọ chifu phẹ l'alị iya.”

² Chileke sụkwapho Mósisu: “Ọo mbẹ̀dua bụ Chipfu. ³ Mu heru l'iphu Ébirihamu; bya ehee l'iphu Áyizaku; hekwaapho l'iphu Jiékọpu; karụ phẹ l'ẹpha mu bụ Chileke, bụ Ọkalibe-kangokotaru-nụ. Obenu l'ẹpha mu ono, bụ Chipfu bẹ̀ mu te emeduru g'ẹphe maru. ⁴ Anyi l'ẹphe bya agbaa ndzụ lẹ mu a-nụ phẹ alị ndu Kénanu ẹka ẹphe shi buru gẹ ndu lwarụ alwalwa. ⁵ Ọzo bụ lẹ mu nụmawaru ude, ndu Ízurelu atsụ; mbụ ndu ono, ndu Ijiputu meru ohu ono. Mu nyata ọgbandzu mu ono.

⁶ “Ọo ya bụ; unu sù ndu Ízurelu lẹ-a: Ọo mbẹ̀dua bụ Chipfu; ọo mu a-nafuta unu l'ozi mkpọnwu-ẹhu ono, ndu Ijiputu meru; unu nọdu eje ono. Mu e-me g'unu nweru onwunu; g'unu ta abụheru ohu phẹ. Mu a-machi ẹka mu dzota unu; bya emeshia iphe, dụ biribiri gude nua phẹ aphụ. ⁷ Mu e-me; unu abụru ndibe mu; mu abụru Chileke unu. Ọo ya bụ g'unu amaru l'ọo mbẹ̀dua, bụ Chipfu bụ Chileke unu; bya abụru onye nafutaru unu l'ozi mkpọnwu-ẹhu ono, ndu Ijiputu meru; unu nọdu eje ono. ⁸ Mu e-duta unu je l'alị ono, mu paliru ẹka mu imeli ria nte lẹ mu a-nụ Ébirihamu; waa Áyizaku; waa Jiékọpu ono. Mu a-nụ iya unu g'ọ bụru okiphe unu. Ọo mbẹ̀dua bụ Chipfu.”

⁹ Mósisu bya eje ezia ya ndu Ízurelu; obenu l'ẹphe te eyeduru iya ọnu; noo kẹ̀le meji tofufuwaru phẹ; tẹme ozi mkpọnwu-ẹhu, ẹphe eje l'ẹka ono mewaru; ọ rẹfu phẹ l'ẹhu.

¹⁰ Chipfu sù Mósisu: ¹¹ “Je epfuaru Fero, eze ndu Ijiputu g'ọ haa ndu Ízurelu g'ẹphe tųgbua lufu l'alị iya.”

¹² Mósísu sù Chipfu: “Ọ -bùru lẹ ndu Ízurẹlu ta angabẹduru mu nchì; ?bù ishi gùnu bẹ Fero e-gude ngabẹru mu nchì gẹ mu bù onye epfu l'ọnu ọku-a?”
¹³ Noo ya; Chipfu bya epfuaru Mósísu yẹe Erọnu opfu ẹhu ndu Ízurẹlu; waa opfu ẹhu Fero, bù eze ndu Ijiputu; sù phẹ g'ẹphe dufuta ndu Ízurẹlu l'alì ndu Ijiputu.

Oshil Ọkpa Mósísu waa Erọnu

¹⁴ Waa ndu-ishi l'ẹnya-unuphu ibe nna phẹ.

Ụnwu kẹ Rúbẹnu, bù ọkpara Ízurẹlu bù Hanọku; waa Palu; waa Hẹzuronu; waa Kami. Ndu k'ono bukota ọkpa-
 ipfu Rúbẹnu.

¹⁵ Ụnwu kẹ Simiyọnu bù Jiemẹlu; waa Jiaminu; waa Ohadu; waa Jiakinu; waa Zoha; tẹme waa Shawulu, nwa, nwanyị shi Kénanu nwutaru. G'ẹphe ha bukota ọkpa-
 ipfu Simiyọnu.

¹⁶ Ẹpha ụnwu Lívayi lẹ g'e deru phẹ l'ẹkwo bù: Geshọnu; waa Kohatu; tẹme waa Merari. Lívayi nọru ụkporo apha ishii l'apha iri l'ẹsaa.

¹⁷ Ụnwu Geshọnu l'ẹnya-unuphu l'ẹnya-unuphu phẹ bù Libuni; waa Shimeyi.

¹⁸ Ụnwu Kohatu bù Amuramu; waa Izuha; waa Hẹburonu; waa Uzẹlu. Kohatu nọru ụkporo apha ishii l'apha iri l'ẹto.

¹⁹ Ụnwu Merari bù Mahuli; waa Mushi. Ono bù ọkpa-
 ipfu Lívayi lẹ g'e deru iya l'ẹkwo.

²⁰ Amuramu bya alua nwune nna iya, bù Jiokebẹdu. Ọ nwutaru iya Erọnu; waa Mósísu. Amuramu nọru ụkporo apha ishii l'apha iri l'ẹsaa.

²¹ Ụnwu Izuha bù Kora; waa Nẹfegu; tẹme waa Zikiri.

²² Ụnwu Uzẹlu bù Mishẹlu; waa Ẹluzafanu; tẹme waa Sitiri.

²³ Erɔnu bya alua Elishaba, bu nwatibe Aminadabu ke nwanyi; bukwarupho nwune Nashonu ke nwanyi. Elishaba ono nwutaru iya Nadabu; waa Abihu; waa Eleyaza; teme waa Itama.

²⁴ Unwu Kora bu Asiru; waa Elukana; teme waa Abiyasafu. Ndu k'ono bu oshilokpa Kora l'ipfu l'ipfu.

²⁵ Eleyaza nwa Erɔnu bya alua onye lanu l'ime unwegirima unwanyi ibe Putelu; o bya nwutaru iya Finehasu.

Ndu ono bukota ndu-ishi unuphu ibe Livayi l'ipfu l'ipfu.

²⁶ Oo buru Erɔnu; yee Mosisu ono be Chipfu suru g'ephe dufuta ndu Izuru lu g'ephe hakota l'ali Ijiputu!

²⁷ O bukwaru phe pho be bu ndu pfuru Fero, bu eze ndu Ijiputu k'edufuta ndu Izuru lu l'ali ndu Ijiputu. Oo kwapho Mosisu yee Erɔnu lanu ono be o bu.

Erɔnu bu onu, epfuchiru Mosisu

²⁸ Noo ya; teke ono, Chipfu pfuru yeru Mosisu l'ali ndu Ijiputu ono ²⁹ be o suru iya: "Oo mbedua bu Chipfu. Zikota Fero, bu eze ndu Ijiputu iphemiphe, mu ziru ngu."

³⁰ Obenu le Mosisu suru Chipfu: "Eshi ophu mu epfu l'onu oku; ? denu ge Fero e-mekwanu ngaberu mu nchi?"

7

¹ Oo ya bu; Chipfu su Mosisu: "Huma le mu mewaru ngu; i du Fero ge Chileke. Nwune ngu Erɔnu bu onye a-noduje epfuchiru ngu opfu. ² Pfukotakwa iphemiphe, mu pfuru ngu. Nwune ngu Erɔnu bu iphe, oo-pfuru Fero bu g'o haa ndu Izuru lu g'ephe lufu l'ali iya. ³ Obenu le mu a-kpo-chi Fero okpoma. Mu e-mee iphe-ohumalenya; waa iphe-ohubama, du igwerigwe l'ali Ijiputu; ⁴ ole o to byadu angaru unu nchi. O buru teke ono be mu e-byi ndu Ijiputu aka l'ehu; meshia iphe, du biribiri gude

nua phe aphu; dufuta ndibe mu, bu ndu Ízurelu g'ephe hakota le Ijiputu. ⁵ Ndu Ijiputu be a-maru l'oo mbedua bu Chipfu me mu machiepho eka mu byia Ijiputu; bya edufuta ndu Ízurelu l'echilabo phe.”

⁶ Mosisu yee Eronu bya emee ge Chipfu ziru phe. ⁷ Mosisu nowaru ukporo apha eno; Eronu nowa ukporo apha eno l'apha eto teke ephe jeru je epfuru opfu nu Fero.

Mgboro Eronu ghoru agwo

⁸ Chipfu su Mosisu yee Eronu: ⁹ “O -buru le Fero suru unu g'unu mee iphe-ohumalenya gude goshi iphe, unu epfu; l'i su Eronu g'o woru mgboro iya togbo l'atatiphu Fero! O -togboe ya pho; l'o ghoo agwo.”

¹⁰ Oo ya bu; Mosisu yee Eronu bya jepfu Fero je emekota ge Chipfu ziru phe. Eronu togbo mgboro iya ono l'iphu Fero; yee ndu-ozu iya; o ghoo agwo. ¹¹ Fero bya ekukoo ndu mmamiphe; waa ndu emeje omamanshi. Ndu jibya ndu Ijiputu ono shi l'omamanshi ephe emeje mekwaapho nno. ¹² G'ephe ha byaru atogbochaa mgboro nkephe l'ali; o ghoshia agwo; ole ke Eronu bya atuko mgboro nkephe lwekota. ¹³ Ole obu Fero kpo-chileru-a; ophu o kwedu ngaberu phe nchi; ge Chipfu pfuru pho.

Mini ghoru mee

¹⁴ Noo ya; Chipfu su Mosisu: “Fero be okpoma kpoakwaru mkpolanu. O jikaakwaru le ya ta ahadu ndu Ízurelu g'ephe tugbua. ¹⁵ Jepfu Fero l'utsu m'o jeje l'enyimu. Nodu l'aguga Nayilu kwaberu iya; l'i wota mgboro ono, shi ghoo agwo pho gude l'eka. ¹⁶ L'i su iya le Chipfu, bu Chileke ke ndu Hiburu zikwaru ngu g'i bya asu iya g'o haa ndibe iya g'ephe tugbua; je a-baru iya eja l'echiegu. Ophu i kwedu byasu nta-a. ¹⁷ L'i su

iya: ‘Wakwa iphe, Chipfu pfuru baa: “Shita l'iphe-a, be ii-shi maru l'oo yebedua bu Chipfu. Mube Mosisu e-woru mgboro ono, mu gude l'eka ono chia le mini Nayilu. Mini ono agbanwee buru mee. ¹⁸ Ema, nokota le Nayilu a-nwushihukota. Enyimu ono eshihu ke swiswisi. Ndu Ijiputu ta adudu ike angu mini, shi iya nu.” ’ ’ ”

¹⁹ Chipfu su Mosisu: “Pfuaru Eronu g'o wota mgboro ono, o gude l'eka machia le mini, nokota l'ali ndu Ijiputu. G'o maa ya l'enyimu enyimu; waa le nggele nggele; waa l'okpuru okpuru; waa l'iphe, bu o-che-mini g'ephe tukochaa gbanwee buru mee. Mee a-tukoru ekameka sweta l'ali Ijiputu; mbu lufuchaa l'iphe, bu iphe, aado mini; ndu ophu a pyiru apyipyi; me ndu ophu a kpuru akpukpu.”

²⁰ Mosisu yee Eronu bya emeepho ge Chipfu ziru phe. O bya eworu mgboro iya malia l'atatiphu Fero; yee ndu-ozu iya; bya echia ya l'enyimu Nayilu. Mini, du l'enyimu ono tukoeppo gbanwee buru mee. ²¹ Ema, nokota le Nayilu nwushihukota. Mini ono shihueppo ke swiswisi; k'ophu bu le ndu Ijiputu ta adudu ike ngua mini, shi iya nu. Mee ono tuko ekameka sweta l'ali ndu Ijiputu.

²² Ndu jibya ndu Ijiputu ono shi l'omamansi ephe emeje mekwaapho nno. Oo ya bu; Fero kpo-chile-a obu iya g'o kpo-chiru iya. Ophu o to ngabeduru Mosisu yee Eronu nchi; mbu egube ono, Chipfu pfuhawaru ono. ²³ O ghakobe bya alaphushia azu l'ibe iya. Ophu iphe ono erwukpodaru iya nu l'ehu. ²⁴ Ndu Ijiputu bya agwoshia obvu l'aguga Nayilu; eka ephe achu mini, ephe a-ngu. Noo kele mini enyimu ono ta adudu k'angu.

²⁵ A nɔepho ujiku ɛsaa e -shi teke Chipfu byiru ɛka l'ɛnyimu Nayilu;

8

¹ Chipfu sɔ Mosisu: “Jepfu Fero je asɔ iya: Wakwa iphe, Chipfu epfu baa: Haa ndibe mu g'ɛphe laa; k'ɔphu ɛphe a-barɔ mu ɛja. ² Ɔ -buru l'i jikaru g'ɛphe ta lashɔ; mu egude mbara bya ɔgu l'alɔ ngu l'ophu. ³ Mbara a-tɔko ɛnyimu Nayilu sweta; kposhihu bya akuru l'ibe ngu; kuru l'ime ɛka ikwaje; kuru l'oma iphe-azee ngu; kuru l'ulo ndu-ozɔ ngu; kuru l'ibe ndu alɔ ngu l'ophu; kuru l'onu epfu, eeshijeru ngu ite; waa l'ochi, eegudeje agwɔ iphe, e gude emeru ngu buredi. ⁴ Mbara ono a-nɔduje apfu-kogbaa ngu l'ɛhu; waa l'ɛhu ndu alɔ ngu; mɛ l'ɛhu ndu-ozɔ ngu l'ophu.”

⁵ Chipfu sɔ Mosisu: “Pfuaru Erɔnu g'o wolia mgbɔro iya ono; maa l'ɛnyimu ɛnyimu; waa lɛ nggele nggele; waa l'okpuru okpuru; mee gɛ mbara dzuru alɔ Ijiputu.”

⁶ No iya; Erɔnu bya amachɔ ɛka lɛ mini, nɔkota l'alɔ ndu Ijiputu. Mbara wufuta bya edzuru alɔ ndu Ijiputu. ⁷ Ndu jibya ono shi l'omamanshi ɛphe emeje mekwaaphɔ nno. ɛphe mekwarupho; mbara wubata l'alɔ Ijiputu.

⁸ Fero kua Mosisu waa Erɔnu bya asɔ: “Unu pfuru yeru Chipfu g'o wofuru mu lɛ ndu alɔ mu l'ophu mbara-a; gɛ mu ahaa ndibe unu g'ɛphe je agwaa Chipfu.”

⁹ Mosisu sɔ Fero: “Ubvù, mu akwabɛ ngu bu g'i pfua teke mu e-pfuru nuru ngu Chileke; waa ndu-ozɔ ngu; waa ndu alɔ ngu; k'ɔphu mbara ta adɛdu ngu l'ɛhu; mɛ l'ibe ngu; a -gufu ndu ɔphu nɔ l'ɛnyimu Nayilu.”

¹⁰ Fero sɔ: “Ɔo echele.”

Mosisu sɔ: “G'ɔ du g'i pfuru; ɔo ya bu; g'i shi nno maru l'ɔ tɔ dudu onye du gɛ Chipfu, bu Chileke anyi. ¹¹ Mbara ono a-ha ngu; haa ibe ngu; haa ndu-ozɔ ngu; haa ndu

alì ngu. Èka ephe a-phòduepho kpoloko bu l'enyimu Nayìlu.”

¹² Oo ya bu; Mòsisu yee Eronu lufuepho l'iphu Fero; Mòsisu bya araku Chipfu le ke mbara ono, o meru; o bya ogu l'alì-eze Fero ono. ¹³ Chipfu bya emeeru Mòsisu iphe, o rwo ru iya. Mbara ono nwushihukota l'ulo; waa l'oma-unuphu; waa l'egu. ¹⁴ A bya akua phe l'ikpo l'ikpo. Alì ono l'ophu shihu ke swiswisi. ¹⁵ Obenu le Fero humaerupho le mbara ono ta aduedu; o woru okpoma iya kpo chia. Ophu o to kweedu angaberu Mòsisu yee Eronu nchi ge Chipfu pfuru ono.

Mkpuruumkpu byaru ogu

¹⁶ Oo ya bu; Chipfu su Mòsisu g'o pfuaru Eronu g'o machia mgboro iya chia l'urwuku, no l'alì; k'ophu urwuku ono a-gho mkpuruumkpu; dzuru alì Ijiputu l'ophu. ¹⁷ Ephe mee nno. Eronu bya amachia mgboro ono chia l'urwuku, no l'alì. Mkpuruumkpu bya erikpute nemadzu ehu; yee anu. Urwuku, nokota l'alì Ijiputu ono mgburugburu bukotaru mkpuruumkpu. ¹⁸ Ndu jibya bya emehaa g'ephe shi l'omamansi phe mekwaapho nno. Ophu ephe aduedu ike. Mkpuruumkpu ono tuko ehu nemadzu yee anu ripyabe aata.

¹⁹ Ndu jibya ono su Fero: “Iphe-a be eka Chileke dukwa.” Obenu le Fero kpo-chilerua obu iya. Ophu o to kwedu ngabe nchi ge Chipfu pfuru ono.

Ijji byaru ogu

²⁰ Oo ya bu; Chipfu su Mòsisu g'o tehu l'onmewa utsu; jepfu Fero me o -jejeepho l'enyimu; su iya l'owa-a iphe, mube Chipfu pfuru baa: “Haa ndibe mu g'ephe laa; je abaru mu eja. ²¹ O -buru l'i ti hadu ndibe mu g'ephe tugbua be mu e-zikwa ijji g'o tsuru duuduudu; wu-pfuta ngu; wu-pfuta ndu-ozì ngu; wu-pfuta ndu alì

ngu; mękwapho l'ulo ngu l'ophu. Ulo ndu Ijiputu bę ijiji e-jikęta; etsu duuduuduu; mbu męchaa l'alı ęka ęphe azoje ękpa.

²² “Obenu lę mboku ono bę mu e-me g'alı Goshęnu du iche. Mbu l'ęka ndibe mu bu bę o tọ dudu ijiji, etsu duuduuduu l'ęka ono; k'ophu ıi-maru lę mbędua, bu Chipfu nọ l'alı-a. ²³ Mu a-kpa oke l'ęka ndibe mu yęe ndibe ngu nọ. Iphe-ęhumalenya-a e-me echele.”

²⁴ Chipfu bya emee iphe ono. Ijiji tsuru duuduuduu wubata l'ibe Fero; mę l'ulo ndu-ozı iya; mę l'alı Ijiputu l'ophu. Ijiji ono tukoephı alı Ijiputu l'ophu meby-ıshıkęta.

²⁵ Fero bya ekua Mosisu yęe Eręnu bya asu phę: “Unu je agwaa Chileke unu ębu l'alı ęka-a!”

²⁶ Obenu lę Mosisu suru: “O tọ dudu ree nno; noo kęle iphe, anyi egudeje agwa Chipfu, bu Chileke anyi bu ndu Ijiputu ębyi. O -buru l'anyi gude iphe, bu ębyi l'ęnya nkephę gwee ngwęja; bę ęphe a-tu-gbukwa anyi lę mkpuma! ²⁷ Anyi e-jekwa ije ujiku ęto jerwua l'echięgu je egweeru Chipfu, bu Chileke anyi ngwęja l'ęka ono; ęgube o turu ekemu su g'anyi mee.”

²⁸ Fero su: “Mu a-ha unu g'unu je egweeru Chipfu, bu Chileke unu ngwęja l'echięgu. O lę g'unu te ejenukakwa ęka du ęnya. Ngwa; unu pfuru nuru mu Chileke!”

²⁹ Mosisu su iya: “Mu -lufuephı l'atıphı ngu; mu epfuru nu Chipfu; k'ophu ijiji ono, etsu gbiigbiigi ono a-ha gube Fero; waa ndu-ozı ngu; tęme waa ndu alı ngu. O lę gę gube Fero te egudenupho ęregede ozo mee gę ndu Izuręlu te je abaru Chipfu ęja!”

³⁰ Mosisu shı l'atıphı Fero tugbua; je epfuru nu Chipfu. ³¹ Chipfu bya emee iphe, Mosisu rworu iya. Ijiji ono parı Fero; waa ndu-ozı iya; waa ndu alı iya haa. Ophu o tọ dudu mę ijiji lanu, ghuduru nu. ³² Fero bya

akpɔ-chikwaphɔ obu iya ɔzobaa. Ɔphu o to kwedu gɛ ndu Ízurɛlu tɔgbua.

9

Ɔnwu iphe-edobe

¹ Noo ya; Chipfu sɔ Mósísu: “Jepfu Fero je asɔ iya: Waa iphe, Chipfu, bɔ Chileke ndu Hiburu pfuru baa: ‘Haa ndibe mu g'ɛphe tɔgbua; je abaarɔ mu ɛja!’ ² Ɔ -bɔru l'ì jìkaru g'ɛphe ta tɔgbushi; bya esede phɛ ³ bɛ Chipfu e-gudekwa ɛka iya zia ɛjo iphe-ememe; l'ɔ bya atɔko iphe-edobe unu gbushia. Mbɔ l'oo-gbushi ñnya unu; waa nkafɔ-ìgara unu; waa ñnya-kamɛlu unu; tɛme waa eswi unu; waa atɔru yɛe eghu unu. ⁴ Ɔle Chipfu a-kpa oke l'ɛka iphe-edobe ndu Ízurɛlu; waa l'ɛka kɛ ndu Ijiputu nɔ; k'ɔphu bɔ l'o to nwedu anɔ kɛ ndu Ízurɛlu mɛ nanɔ a-nwɔhu nɔ.”

⁵ Chipfu bya epfua teke oo-me iphe ono; sɔ: “Echele bɛ mɔbe Chipfu e-me iphe ono l'alì-a.” ⁶ Ɔ -rwua lɛ nchitabɔhu iya; Chipfu mee ya. Iphe-edobe ndu Ijiputu tɔko nwɔshihukota. Obenu l'o to nwedu kɛ ndu Ízurɛlu mɛ nanɔ, nwɔhuru nɔ. ⁷ Fero zia ndu jeru je ahɔma l'ɔ tɔ dɔdu iphe-edobe ndu Ízurɛlu mɛ nanɔ, nwɔhuru nɔ. Obenu lɛ Fero kpɔ-chileru-a ɔkpoma; ɔphu o to kwedu gɛ ndu Ízurɛlu tɔgbua.

Ɛjo-onwo byaru ɔgu

⁸ Ɔo ya bɔ; Chipfu sɔ Mósísu waa Erɔnu: “Unu kpota ntɔ, jiru mkpoji ɛka l'ovokɔku; gɛ Mósísu phékashia ntɔ ono l'imeli l'atatiphu Fero. ⁹ Ɔo-phékashihu dzuru alì Ijiputu l'ophu g'urwuku; l'o mee; ɛjo-onwo aphɔkashiaha nemadzɔ l'ɛhu yɛe anɔ, bu l'alì ono l'ophu. Ɛjo-onwo ono efushihu; baaha phɛ ɔnyá.”

¹⁰ Ēphe bya ekpota nt̄u l'ovok̄oku; bya ap̄furu l'at̄ip̄hu Fero. M̄osisu woru nt̄u ono p̄hokash̄ia l'imeli. Ējo-onwo bya at̄uko nemad̄z̄u; ȳe an̄u wata aph̄okashi; baahaa ph̄e ̄nyá. ¹¹ Ōphu ndu jibya ad̄udu ike p̄furu l'at̄ip̄hu M̄osisu; k̄ele ējo-onwo ono ph̄okwaru ph̄e ph̄o g'̄o ph̄oru ndu Ijiputu ndu ōphu g'̄ep̄he ha. ¹² Obenu l̄e Chipfu kp̄o-chiru Fero obu; ōphu ō t̄o ngab̄eduru M̄osisu ȳe Er̄onu nch̄i; ḡe Chipfu p̄furu M̄osisu ono.

Akamini byaru ōgu

¹³ Oo ya b̄u; Chipfu s̄u M̄osisu: “Nmaa ēwa l'utsu je ap̄furu l'at̄ip̄hu Fero; s̄u iya: Waa ip̄he, Chipfu, b̄u Chileke k̄e ndu Hiburu p̄furu baa: ‘Haa ndibe mu g'̄ep̄he t̄uḡbua; je a-bar̄u mu ēja. ¹⁴ Ōdumeka b̄e ōgiya b̄e mu e-me g'̄ējo ip̄he-̄huka, l'a-l̄o ngu ēka l̄e meji byap̄futa ngu; ḡu l̄e ndu-oz̄i ngu; ȳe ndu al̄i ngu. Oo ya b̄u g'̄i maru l'̄o t̄o d̄udu onye d̄u ḡe mb̄edua l̄e mgboko l'ophu. ¹⁵ Noo k̄ele mu gege amach̄ihawa ēka mu gude ējo ip̄he-ememe gbushia ḡu l̄e ndu al̄i ngu; unu ach̄ihu l̄e mgboko-a. ¹⁶ Obenu l'ip̄he, kpar̄u ip̄he, mu gude haa ngu b̄u k'̄ōphu mu e-goshi ngu g'̄ok̄pehu mu habe shii. Oo ya b̄u g'eep̄fukash̄i-dzuru ēpha mu l̄e mgboko l'ophu. ¹⁷ Obenu l'iigude op̄fu ēhu ndibe mu eku onwongu; j̄ika l'̄i t̄i had̄u ph̄e g'̄ep̄he la. ¹⁸ Ēgube nta-a echele b̄e mu a-t̄u ējo akamini ēgube teke at̄u-swee l'al̄i Ijiputu e -shi teke o beberu d̄u byas̄u ntan̄u-a. ¹⁹ Zikwaa ozi nta-a g'e je ach̄ibata ip̄he-edobe ngu l'ēka ip̄he e-gbobuta iya; noo k̄ele akamini ono a-t̄u-gbushik̄ota nemad̄z̄u; ȳe ip̄he-edobe, n̄o l'ēgu, a ch̄ibataduru unuphu; ēphe anw̄ushihukota.’ ”

²⁰ Ndu-oz̄i Fero ndu ōphu ats̄u Op̄fu Chipfu ebvu bya emee ēgwegwa ch̄ibata ohu ph̄e; waa ip̄he-edobe ph̄e

l'ime ɔlo. ²¹ Obenu lẹ ndu agubeduru Opfu Chipfu iphe bẹ haru ohu phẹ; waa iphe-edobe phẹ l'ẹgu.

²² Oo ya bu; Chipfu su Mosisu g'ọ machia ẹka l'akpaminigwe g'akamini awata adashi l'alì ndu Ijiputu tu-gbushia nemadzu mẹ iphe-edobe; waa irwu, dukotakpo l'alì Ijiputu. ²³ Mosisu machiepho mgboro iya l'akpaminigwe; Chipfu zia egbigwe; yee akamini; ọ wata adada. Ebemu nọdu alọ l'akpaminigwe. Chipfu dzee akamini l'alì Ijiputu. ²⁴ Akamini yee ọku-egbigwe tuko ghaa ẹghirigha nọdu atọ gbaagbaa. Ejo oke pherephere, ha shii; nọdu ezi. Mbụ l'ọo pherephere ono kakota shii lẹ pherephere, zijekpọoru l'alì ndu Ijiputu e -shii teke e beberu alì ndu Ijiputu dọ. ²⁵ L'alì ndu Ijiputu mgburugburu bẹ akamini ono tu-gbushikotaru iphemiphe, nọkota l'ẹgu; nemadzu mẹ iphe-edobe. Ọ tųpyashia iphemiphe, futaru l'ẹgu; bya ezijashicha iphe, bu oshi, dọ l'ẹgu ezijashi. ²⁶ Eka ọ tuduru akamini ono kpoloko bu l'alì Goshenu, bu ẹka ndu Ịzuru bu.

²⁷ Noo ya; Fero zia g'e je ekua Mosisu yee Eronu; bya asu phẹ: “Mu mewaru iphe-ẹji. Oo Chipfu bẹ iswi dọ maa; mbẹdua, bu Fero; waa ndibe mu achọ opfu. ²⁸ Pfuru nọ Chipfu; noo kele egbigwe ono; yee akamini ono tuta-shiwaru. Mu je a-ha unu g'unu laa; ọ tọ gbaeduru g'unu nọdukwadu.”

²⁹ Mosisu su: “Mu -lufuepho lẹ mkpukpu-a; mu achilia ẹka imeli; pfuru nọ Chipfu. Egbigwe adabuhu; igwe atọ-buhu akamini. Oo ya bu g'ì maru lẹ mgboko-a bu ke Chipfu. ³⁰ Obenu lẹ mu maru-a lẹ gubedua waa ndu-ozii ngu ta atsuadaa Chipfu, bu Chileke ebvu.”

³¹ Owu fulakusu; waa balì bẹ akamini ono mebyishichaaru; noo kele balì eyeshiwa mebyi; owu fulakusu bukwarduru ige bẹ ọotu. ³² Obenu lẹ witi; waa supelutu

bẹ o to mebyishiduru; noo l'ọ tọ bụdu teke ono bẹ Ọomije.

³³ Mósísu parụ Fero haa; shi lẹ mkpụkpu ono tughua. Ọ bya apaliaru Chipfu ẹka imeli. Egbigwe; waa akamini tukuru bụru kẹ nyọo; igwe dzebuhu mini l'alị ono.

³⁴ Fero hụmaepho lẹ mini; waa akamini; waa egbigwe ono bụwaa kẹ nyonyoronyo; o mekwaa iphe-ẹji ọzo. Yẹbedua yẹe ndu-ozí iya kpọ-chikwa obu phẹ ọzo.

³⁵ Ọkpoma Fero bya akpọ-chikwa; ọphu o kwedu aha ndu Ízurẹlu g'ẹphe tughua, bụ iya bụ gẹ Chipfu shihawaa l'ọnu Mósísu pfua ya.

10

Igube byaru ọgu

¹ Noo ya; Chipfu sụ Mósísu: “Jepfu Fero; noo kẹle mu kpọ-chiru iya obu; kpọ-chia kẹ ndu-ozí iya; k'ọphu mu e-meshigbaa oke iphe-ọhumalenya, dughbaa biribiri l'echilabọ phẹ; ² k'ọphu unu a-kọru unwu unu; mẹ unwu nwanwa unu gẹ mu gude kpaa ndu Ijiputu ẹhu; tẹme waa gẹ mu gude mee oke iphe-ọhubama nụ phẹ. Ọo ya bụ g'unu amaru l'ọo mbẹdua bụ Chipfu.”

³ Ọo ya bụ; Mósísu yẹe Erọnu bya ejepfu Fero sụ iya: “Waa iphe, Chipfu, bụ Chileke ndu Hiburu pfuru baa: ‘? Bụ teke ole bẹ ijika-beru ewoze onwongu alị l'atatiphu mu? Haa ndibe mu g'ẹphe la; k'ọphu ẹphe e-je abaarụ mu ẹja! ⁴ Ọ -bụru l'ị jikaru g'ẹphe ta tughushi bẹ mu e-gude igube bata l'alị ngu echele. ⁵ Ọo-bya atụko alị unu nyinwua; k'ọphu bụ l'ọ tọ dudu ẹka aahuma ụzo l'alị ono. L'ọ tuko iphe, akamini mebyishiphodoru tapyashikota; męchaa iphe, bụ oshi, pfuru l'ẹgu unu. ⁶ Ẹphe abya atụko ụlo ngu; mẹ ụlo ndu-ozí ngu; mękpoo alị Ijiputu l'ọphu sweta. Iphe ono bụ iphe, nna ngu; mẹ nna ngu oche phẹ teke ahuma-swee l'alị-a; e -shi teke

ɛphe lwaru ɛka-a byasu nta-a.' ” Mosisu dakobe; paru Fero haa; o buru iya atugbu.

⁷ Ndu ozi Fero su Fero: “?Bu teke ole be nwoke-a a-chi-beru anyi Okpu akpohu? Haa ndu-a g'ɛphe tugbua je abaarɔ Chipfu, bu Chileke phe ɛja. ?Ti madu l'alɔ ndu Ijiputu buwaa mkpurupyata?”

⁸ Noo ya; a bya eduphuta Mosisu yɛe Erɔnu azu l'iphu Fero. O su: “Unu je abaarɔ Chileke unu ɛja! Ole o bu; ?bulaje ndu ole e-je?”

⁹ Mosisu su: “Anyi l'unwegirima anyi; waa ndu bu ɔgerenya anyi; waa unwu anyi ke nwoke; waa ke nwanyi a-tukokwa swiru; anyi atuko aturu anyi; waa eswi anyi rwuta. Noo kele anyi a-boru Chipfu anyi obo-iphe.”

¹⁰ Fero su phe: “Ge Chipfu swikwaru unu eswiru ome oo ke ge mu haa unu g'unu l'unwegirima unu swiru tugbua! Nta-a be mu makporu l'oo ɛjo-iphe be unu ari k'ememe. ¹¹ Waawakwa-o; g'o buru ndu k'unwoke kpoloko be unu e-rwuta gude je abaru Chipfu ɛja; eshi ophu o bu iphe ono be unu shi teke-a rwota!” Noo ya; a chifu Mosisu yɛe Erɔnu l'iphu Fero.

¹² Chipfu su Mosisu: “Machia ɛka maa l'alɔ Ijiputu; g'igube wubata l'alɔ ono bya atuko iphe, futaru l'egu l'alɔ ono tapyashikota; mbu iphe, akamini mebyishiphodoru.”

¹³ Oo ya bu; Mosisu bya eworu mgboro iya maa l'alɔ ndu Ijiputu. Chipfu bya emee; pherephere shi l'uzo ɛnyanwu-awawa wata ezizi. Pherephere ono zikota l'alɔ ono eswe l'enyashi. A futashia l'utsu; pherephere ono vubatawa igube l'alɔ ono. ¹⁴ Igube toko Ijiputu sweta; bya anopho l'ekameka l'alɔ ono ke nyimunyimu. Igube teke ekpofutaswe egube ono; teme ophu o byadu awubataba l'otu egube ono ozo. ¹⁵ Epe nyinwuepho alɔ ono l'ophu; k'ophu bu l'ekameka jihukotaru ke kpakpalu. Epe bya atuko iphe, phoduru nu g'akamini

byachaaru tapyashikota; mbu iphe, rwutakporu irwu l'egu; mēchaa akpuru oshi. Ekwo oshi; mē k'iphe, akoru l'egu te nwedu mē nanu, phoduru nu l'alijiputu l'ophu.

¹⁶ Fero bya ekua Mosisu yee Eronu egwegwa; su phe: “Mu meswewaru Chipfu, bu Chileke; bya emeswee unu.

¹⁷ Jiko gufuaru mu nvu ugbo lanu owa-a; je epfuru nu Chipfu, bu Chileke unu g'o wofuru mu ojo iphe-ehuka-a!”

¹⁸ Mosisu paru Fero haa; lufu je epfuru nu Chipfu.

¹⁹ Oo ya bu; Chipfu bya agbanwee pherephere ono; mee ya; o buru eze pherephere, ha shii, shi l'uzo enyanwuariba bya ezikotachaa igube ono g'o ha je achiru ye le Eze-enyimu Uswe-uswe. Ophu o to dudu me igube lanu, ghuduru l'alijiputu. ²⁰ Ole Chipfu kpochilerua obu Fero; ophu o kwedu haa ndu izurelu g'ephe tughua.

Ochii byaru ugu

²¹ Noo ya; Chipfu su Mosisu g'o machia aka maa l'akpaminigwe; g'ochii bya aso-kpute ekameka l'alijiputu. Ochii, e-me g'ekameka gbahu ke tsukiribaa.

²² Oo ya bu; Mosisu bya amachia aka maa l'akpaminigwe. Alijiputu l'ophu gbahukota tsurikitiki; no abali eto. ²³ Ophu o dudu onye humaru nwibe iya; teme ophu o dudu onye humaru uzo ke g'o shi l'eka o bu kpuriberu; jasubali eto ono. Obenu le ndu izurelu be iphorodudu l'eka ephe bu.

²⁴ Noo ya; Fero kua Mosisu bya asu: “Unu je abaru Chipfu aja! Unu dutachaa unwanyi me unwegirima unu g'unu swiru! Iphe, unu a-ha kpoloko bu aturu; waa eswi unu.”

²⁵ Obenu le Mosisu suru iya: “Ii-hafukwapho anyi g'anyi gude iphe, anyi e-gude nu Chipfu, bu Chileke anyi

ngweja-akpọ-ọku; waa ngweja mmanụ ọzo. ²⁶ Ọo ya bụ l'anyi e-rwuta iphe-edobe anyi. A taa hakwa g'ọ ka mma l'ọo ichiripfu ọkpa eswi; k'ọphu anyi a-harụ iphe-edobe ono hata gude baarụ Chipfu, bụ Chileke anyi ẹja. Anyi ejerwuduru ẹka ono bẹ anyi ta amadụ ndu ọphu anyi e-gude baarụ Chileke ẹja.”

²⁷ Ọle Chipfu kpọ-chilerua obu Fero; ọphu o kwedu haa ndu Ízurẹlu g'ẹphe tųgbua. ²⁸ Fero sụ Mósísu: “Makwarụ onwongu! Gbẹshi mu l'iphu! Gẹ mu ta ahụmabaekwa ngu ọzo l'atatiphu mu. Mbọchi, ì byabaaru apfuru mu l'iphu bẹ ìi-nwuhukwa!”

²⁹ Mósísu sụ iya: “G'ọ dụ nụ g'i pfuru. Mu ta abyabaedu ngu apfuru l'iphu ọzobaa.”

11

Mgbu-ọnwu a-bya ọgu

¹ Noo ya; Chipfu sụ Mósísu: “Mu e-gudefua oke iphe-ẹhuka lanụ byapfuta Fero; yele ndu Ijiputu. E - mechaẹpho bẹ oo-kwechaa g'unu wufu l'ẹka-a. Teme o -kweẹpho ono bẹ ọo-chịfukota unu g'unu ha. ² Pfiaru ndu Ízurẹlu; g'unwoke phẹ; waa ụnwanyi phẹ; jepfu ndu obutobu phẹ je asụ phẹ g'ẹphe nụ phẹ iphe, e meru ẹ mkpọla-ọchaa; waa ọphu e meru ẹ mkpọla-ododo!”

³ Chipfu bya emee; ndu Ízurẹlu tųba ndu Ijiputu l'obu; mekwaapho gẹ ndu-ozí Fero; waa ndu Ijiputu l'ophu kwabẹ Mósísu l'onwiya eze ùbvù, ha shii.

⁴ Ọo ya bụ; Mósísu sụ: “Wakwa iphe, Chipfu epfu baa. Ọ sụru ẹ ya e-gude ụzo echi abalị jedzuru alị Ijiputu l'ophu. ⁵ Iphe, bụkota ndu bụ ọkpara ẹ nwoke l'alị Ijiputu bẹ a-nwushihukota nụ; a -gbẹ l'ọkpara Fero, bụ onye nọ l'aba-eze; je akpaa l'ọkpara nwanyi, bụ ohu, bụ onye egwejeru iya iphe; mekwapho iphe-edobe, e vuru

uzo nwua l'epho ne iya. ⁶ Oke uzu-ekwa, paru eka a-tu l'alì Ijiputu l'ophu. Mbù uzu-ekwa, etu iya adujeduru; ophu o byadu l'a-dubaa. ⁷ Obenu l'eka ndu Ízurèlu bu bẹ o tọ dudu g'o ka mma l'oo nkuta bya agbo ire kpua nemadzú; ozoo anu. Oo ya bu g'unu amaru lẹ Chipfu kparu oke; dokaha Ijiputu yee Ízurèlu. ⁸ No teke ndu-ozì ngu-a a-wu-pfuta mu bya ephozeru mu bya asu mu: 'Unu tugbuwaro-o! Tùkokpoo ndu ndu-unu l'ophu rwuta tugbua-o!' O -nwuchaepho nno; mu atugbua." No iya; Mòsisu gude ehu-eghu lufu-shia l'iphu Fero.

⁹ Tòbudu iya bu; Chipfu bya asu Mòsisu: "Fero te ekwekwa angaberu ngu nchi; ge mu eshi nno meshia igwerigwe iphe-ohumalenya l'alì Ijiputu." ¹⁰ Noo ya; Mòsisu yee Eronu bya emeshikota iphe-ohumalenya ono l'iphu Fero. Obenu lẹ Chipfu kpọ-chileru-a Fero obu; ophu o to kwedu haa ndu Ízurèlu g'ephe shi l'alì iya wufu lashia.

12

Obo Ojaghata

¹ Chipfu su Mòsisu yee Eronu l'alì ndu Ijiputu:
² "Onwa-a, a no-a; a-bujeru unu onwa mbu l'apha.
³ Pfiaru ndu Ízurèlu g'ephe ha l'o -rwua mboku, onwa-a a-du l'abalì iri ge nwoke, nonu kpata nwaturu lanu dobe ke yee ndibe iya. ⁴ O -buru lẹ ndibe onye obu hanukaru nwanshi; k'ophu bu lẹ nwaturu ophu paru phe eka; ephe ejepfu ndu kachaa phe ebukube ntse; g'ephe gbaru mgbà lẹ nwaturu lanu; m'ephe guchaa onwophe maru ole, ephe du. Unu lee enya lẹ g'onnyemonye a-taberu. ⁵ Anu, unu a-hotà l'a-buru anu, gbaru apha; buru okee ya; bya aburu ophu adudu eka iphe mebyiru iya. Unu -eshidu l'aturu hota iya; unu

ahọta iya l'eghu mmanu. ⁶ Unu leta iya enya gbiriri jasu mboku, onwa-a l'a-du l'abali iri l'eno. Noo mboku, ndu izurelu l'ophu e-gbushikota iya g'o ha l'uzenyashi iya. ⁷ Ephe aharu mee ya nata techaa l'aguga mgbo; waa l'eli oshi-mgbo, nokota l'ulo, ephe no ata anu nwaturu ono. ⁸ Enyashi ono be ephe a-ta anu nwaturu, a huru ahuhu l'oku; yee ekwo oshi, ats ilu; waa buredi, e yeduru iphe, ekoje buredi. ⁹ Unu te eshikwa anu ono eshishi; ebe unu atakwa iya l'oyii. Oo ephe g'unu hushia ya l'oku; mbu ishi iya; me okpa iya; mechaa iphe-ephe iya. ¹⁰ G'o to nwekwa ophu unu a-ha g'o bo nchi. O -buru l'o nweru ophu a haru; o noo futu utsu; unu akpo ya oku. ¹¹ Waa g'unu e-gude taa ya baa: Unu gude akpo tubuta uwe unu; unu eye akpokpa unu l'okpa; bya ewota mgboro unu paru l'eka. Unu ataa ya wobuwobuwobu; kele oo obo Ojehata ke Chipfu.

¹² “Enyashi ono kwapho be mu e-jedzuru ali Ijiputu; gbushigbua iphe, bu okpara nemadzu me iphe-edobe. Iphe, bukpo agwa ndu Ijiputu l'ophu be mu a-nukota chipfu. O kwa mbedua bu Chipfu. ¹³ Mee ono a-buru iphe-ohubama, e-goshije ulo ophu unu no. Oo ya bu; mu -humaephe mee ono; mu aghata unu. O to nweduru ejo iphe-ememe, e-byi unu eka teke mu a-nodu egbushi ndu Ijiputu ono.

¹⁴ “Mboku ono l'a-buru unu mboku obo-iphe, unu e-gudeje nyata iphe-a. E shi l'ogbo sweru ogbo be unu a-boje iya g'o buru obo-iphe ke Chipfu. Ekemu ono a-du jasu le tuutuutu le mimiimii. ¹⁵ Ujiku esaa be unu a-ta buredi, e yeduru iphe, ekoje buredi. Mboku mbu be unu e-wofukota iphe, ekoje buredi l'ulo unu. Noo kele iphe, bukpo onye taru iphe, e yeru iphe, ekoje buredi; a-gbe le mboku mbu ono jasu le mboku k'esaa ono be ee-bufu le izurelu. ¹⁶ Mboku ke mbu be unu e-nweru

ndzuko, du nsọ; bya enwekwarupho ọzo mbọku k'ẹsaa. G'ọ tọ dukwa iphe, unu e-je l'ujiku labọ ono; gbahaephonri, unu e-ri bẹ unu e-shije. Noo iphe, unu e-meje bu ono kpoloko.

¹⁷ “Unu bọo ọbo-iphe buredi, ekoduru ekoko; noo kẹle ọo mbọku ono gẹdegede bẹ mu dufutaru unu g'unu hakọta l'alì Ijiputu. Unu bọje mbọku ono ọbo-iphe; g'ọ buru ekemu, a-nọ jasụ l'ojejoje; e-shi l'ogbo sweru ogbo.

¹⁸ L'onwa mbụ phọ bẹ unu a-tajẹ buredi, e yeduru iphe, ekoje buredi; a -gbẹ l'uzenyashi mbọku, onwa ono du l'abalì iri l'ẹno jasụ l'uzenyashi mbọku, ọ du l'ukporo abalì l'abalì lanu.

¹⁹ Ujiku ẹsaa bẹ a ta abyadu ahuma iphe, ekoje buredi l'ulo unu. Onye rikporu iphe, e yeru iphe ekoje buredi bẹ ee-bufu lẹ ndu Ịzurẹlu; m'onye ono bu nlwamulwa; ọzo onye a nwuru anwunwu l'alì ono.

²⁰ G'ọ tọ dukwa iphe, e yeru iphe, ekoje buredi, unu e-de ọnu. Eka unu e-buhabẹ; unu taa buredi, ekoduru ekoko!”

²¹ Tọbudu iya bu; Mosisu bya ekuko ndu bu ọgerenya Ịzurẹlu g'ephẹ ha; bya asụ phẹ: “Unu tųgbua nta-a nta-a; je ahọta anu ọphu unu lẹ ndibe unu e-gbu gude bọo ọbo Ojaghata k'unu.

²² Unu ewota ẹkwo ịsopu, du jipfujipfu tsee lẹ mee anu phọ, a nakọberu lẹ gbamugbamu phọ tee l'eli oshi-mgbo ono; waa l'aguga iya ibe k'ẹbo ẹbo. G'ọ to nwekwa g'unu ha onye a-lufu etezi jasụ l'utsu.

²³ Ọo ya bu; Chipfu -jeshiepho egbushi ndu Ijiputu; l'ọ huma mee, e teru l'eli oshi-mgbo waa l'aguga iya ono; l'ọ ghata ọnu mgbo k'ono. O too kwedu gẹ mgbugbumadzu ono bata l'ulo unu bya egbushia unu.

²⁴ “Unu mejekwa iphe-a g'ọ buru nsọ, a-duru unu l'oshilokpa unu jasụ l'ojejoje.

²⁵ Unu -bahuepho l'alì ono, Chipfu a-nu unu ono, bu iya bu iphe, o kweru ukwe iya ono; unu mejekwa omelalì ono. ²⁶ Ọ -buru l'unwu unu jiru unu sụ: ‘?Bu gunu bẹ unu emedojeru

omelali ono?' ²⁷ unu asu phe: 'Oo ngweja egbu anu obo Ojegahata, eegweru Chipfu, bu onye ghataru ulo ndu Izurelu l'ali ndu Ijiputu je egbushia ndu Ijiputu; mbu onye haru unuphu ibe anyi; ophu o gbuduru ndibe anyi.' " Ndu Izurelu -numaephe iphe ono; ephe phozeta; baaru Chipfu eja. ²⁸ Ndu Izurelu bya emee iphe ono; ge Chipfu toru Mosisu yele Eronu okpa iya; o buru egube ono bu g'ephe meru iya.

²⁹ O -rwua l'echi-abali; Chipfu bya egbushia okpara ndu Ijiputu l'ophu; a -gbe l'okpara Fero, bu onye no l'aba-eze; jasu l'okpara onye mkporo, a tu-chiru l'oka-mkporo; wakwapho nwa ivuzo iphe-edobe. ³⁰ Fero; yee ndu-ozu iya g'ephe ha; waa ndu Ijiputu l'ophu tehu l'enyashi. Uzu-ekwa nodu atuwaa l'ali Ijiputu; noo kele o to nwedu ulo, no l'ali ono l'ophu, nemadzū ata nwuhuduru.

Awufu unwu Izurelu le Ijiputu

³¹ Fero bya ekua Mosisu yee Eronu l'enyashi ono; su phe: "Unu gbeshi; unu le ndu Izurelu; jewarō. Unu paru ndu ali mu haa; tugbuwaro je abaarū Chipfu eja, bu iya bu iphe, unu epfukpo. ³² Unu rwuta aturu unu; waa eswi unu gude tugbua, bu iphe, unu epfu. Ole unu gokwaaru mu onu-oma."

³³ Ndu Ijiputu nodu alwuru ndu Izurelu ulwu g'ephe mee egwegwa lufu l'ali eka ono; kele ephe suru l'odumeka be ephebe ndu Ijiputu a-nwushihukotakwa. ³⁴ Ephe kpota iphe, eegudeje eghe buredi kpojia ochi buredi; gude uwe phe kechia ya; nmakobe iya l'ukuvu; ophu ephe eyeduru iya iphe, ekoje buredi. ³⁵ Ndu Izurelu mee ge Mosisu ziru phe; bya arwokoo ndu Ijiputu iphe, e meru le mkpola-ochaa; waa mkpola-ododo; waa uwe. ³⁶ Chipfu mee; ndu Izurelu tuba ndu Ijiputu l'obu; k'ophu

ẹphe nuru phẹ iphemiphe, ẹphe rwo ru phẹ. Ẹphe shi nno kwaa iphe ndu Ijiputu l'okwata gude tũgbua.

³⁷ Ndu Ízurẹlu shi lẹ mkpukpu Ramesesu jeshia mkpukpu Sukotu. Unwoke ndu ophu gude okpa eje rwuru ukporo unu mgbo ukporo eto; l'ukporo unu ugbo iri l'ise; a -gufukwa unwanyi waa unwegirima. ³⁸ Ndu ozo, dukwapho igwerigwe tsokwaru phẹ pho; wakwapho ikpoto iphe-edobe; mbu aturu me eswi. ³⁹ Iphe, eegheje buredi, ẹphe shi l'alị Ijiputu gude be ẹphe gude ghee akara, e yeduru iphe, ekoje buredi. Iphe meru g'o gude ophu iphe, ekoje buredi adudu iya bu l'a chifuru phẹ achifu l'alị Ijiputu; ophu uto k'akwakobe ke nri, ẹphe e-ri aduduru phẹ.

⁴⁰ Iphe, ndu Ízurẹlu noru l'alị Ijiputu bu unu apha l'apha ukporo l'iri. ⁴¹ O -rwuepho lẹ mboku, unu apha l'apha ukporo l'iri ono bvuru gededede; ndibe Chipfu g'ẹphe ha, bu iya bu ndu Ízurẹlu; wufukota l'alị ndu Ijiputu. ⁴² Eshi ophu Chipfu nwuru enya l'enyashi ono g'oo-me dufuta phẹ lẹ Ijiputu be ẹphebe ndu Ízurẹlu g'ẹphe ha a-nwujekwarupho Chipfu enya l'enyashi ono gude kwabe iya ubvu; e shi l'ogbo sweru ogbo.

K'eme k'obo Ojegahata

⁴³ Chipfu su Mosisu waa Eronu: “Waa g'unu e-meje k'obo Ojegahata baa:

“G'o to nwekwa nlwamulwa, l'a-taje anu obo-iphe ono. ⁴⁴ Ohu, unu gbataru agbata be unu e-bujeada ubvu; teme l'o taa ya. ⁴⁵ Ole g'onye, byaru abyabya; ozoo onye e beru ozi ba atajekwa iya.

⁴⁶ “Aa-noduje l'ime ulo lanu taa ya. G'o to nwekwa anu obu; ophu ee-gude lufuta etezi. Ophu o dukwa okpu iya me nanu, unu a-nyakwo anyakwo. ⁴⁷ Ndu Ízurẹlu g'ẹphe ha be a-tukoje bo obo-iphe ono.

⁴⁸ “Ọ -buru l'onye lwaru alwalwa, bu le ndunu be o du ge ya yiru l'obo Ojegahata ke Chipfu ono; g'o bushikota ndibe iya ndu k'unwoke ubvu g'ephe ha. Oo ya bu l'o yiwaruro boaha ya g'onye a nwuru l'ali ono. G'o to nwekwa nwoke, ebuduru ubvu, a-ta iya nu. ⁴⁹ Oo ekemu lanu-a duru onye a nwuru anwunwu l'ali-a; bya aduru onye lwaru alwalwa; unu eya tuko buru.”

⁵⁰ Ndu Izurelu g'ephe ha bya emekota iphe, Chipfu pfuru Mosisu yee Eronu. ⁵¹ O buru le mboku ono gededede be Chipfu dufutaru ndu Izurelu g'ephe hakota l'ali Ijiputu.

13

Eye ndu bu okpara l'eka Chileke

¹ Chipfu su Mosisu: ² “Doberu mu okpara unu iche. Iphe-mbu, vu-kporu uzo waa ekpa-nwa l'ephe ne iya le Izurelu: me nemazu me iphe-edobe; bu nkemu.”

³ Noo ya; Mosisu su ndu Izurelu: “Unu nyata ntanu-a; mbu mboku, unu wufutaru le Ijiputu, bu eka unu shi buru ohu. Ntanu-a bu mboku, Chipfu gude okpehu iya dufuta unu. G'o to dukwa onye a-ta iphe, e yeru iphe, ekoje buredi. ⁴ Oo ntanu-a l'ime onwa Abibu-a be unu atugbu. ⁵ Teke Chipfu durwuerupho unu l'ali ndu Kenu; waa ke ndu Hetu; waa ke ndu Amoru; waa ke ndu Hevu; teme waa ke ndu Jiebusu; ali ono, o riburu nna unu oche phe angu le ya a-nu unu; ali, mini era-eswi waa manu-enu jiru ke pyimu pyimu; unu dobejekwa omelali-a l'onwa-a. ⁶ Ujiku esaa be unu a-takota buredi, e yeduru iphe, ekoje buredi. O -rwua le mboku k'esaa; unu aboru Chipfu obo-iphe. ⁷ Unu takotaje buredi, e yeduru iphe, ekoje buredi l'ime ujiku esaa ono. G'o to nwekwa iphe, e yeru iphe, ekoje buredi, aa-huma l'echilabo unu.

Teme g'ò tò dukwa iphe, ekoje buredi, aa-huma l'alì unu. ⁸ Mboku ono be unu a-sù unwu unu l'iphe, kparu iphe, unu gude eme iya bu iphe, Chipfu meru unu mboku, unu lufutaru l'alì Ijiputu. ⁹ G'omelali ono bukwaru iphe-ohubama, e byiru unu ge mbo l'eka; dee ya unu g'uri l'iphu; g'e gude nyatajeru unu l'ekemu Chipfu bu iphe, unu a-kpujeru l'onu; kele o Chipfu ono gude okpehu iya dzota unu l'alì Ijiputu. ¹⁰ Unu meje ekemu-a me o -rwuepho teke emeje iya; apha g'apha.

¹¹ “Chipfu -durwuchaepho unu ali Kénanu ono; bya anu eya pho unu g'o riburu iya unu le nna unu oche phe le nte; ¹² bukwa g'unu nje Chipfu iphe-mbu, vukporu uzo waa ekpa-nwa l'epho ne iya. Anu mbu, bu okee ya, vuru uzo waa ekpa-nwa l'epho ne iya l'iphe-edobe unu aburu ke Chipfu. ¹³ Iphe, bu nkapfu-igara, vuru uzo waa ekpa nwa l'epho ne iya be unu e-gudeje nwaturu gbata. O -buru l'unu ta agbatadu iya agbata; unu aswikwo ya olu aswikwo. Iphe, bu okpara unu le nwoke be unu agbatajekwapho agbata.

¹⁴ “O -be l'atatiphu; unwu unu -ji unu su: ‘?Bu gunu be eemedojeru iphe-a?’ Unu su phe: ‘Chipfu gude okpehu iya dufuta anyi l'alì ndu Ijiputu; mbu dufuta anyi l'eka ono, anyi shi buru ohu ono. ¹⁵ Le teke Fero kpochiru obu jika le ya ta ahadu anyi g'anyi tugbua be Chipfu gbushiru okpara l'alì ndu Ijiputu; nemadzu me iphe-edobe. Noo iphe, meru g'o gude anyi ndu akputaje anu, bu okee ya, vuru uzo waa ekpa-nwa l'epho ne iya; gbuaru Chipfu; bya egude iphe gbata ndu bu okpara l'epho ne phe le nemadzu.’ ¹⁶ G'omelali ono bukwaru iphe-ohubama, e byiru unu ge mbo l'eka; dee ya unu g'uri l'iphu; gude goshi le Chipfu gude okpehu iya dufuta unu l'alì Ijiputu.”

Ndu Ízurẹ̀lu l'awuḡha Eze-ẹnyimu Uswe-uswe

¹⁷ Fero haẹpho ndu Ízurẹ̀lu; ẹphe tṹgbua; ọphu Chipfu eduduru phẹ shia ọzo alì ndu Filisitayinu; a makwaru-a l'ono bẹ ka ntse. Noo kẹle Chipfu sọru: “?A maru ?ẹphe -vubaa ọgu bẹ ẹphe ta agbanwedu nu egomunggo; lashia azu l'alì Ijiputu?” ¹⁸ Ọo ya bu; Chipfu duru ndu Ízurẹ̀lu gbaa mgburugburu; shia ọzo echiẹgu l'ibe iya k'ọzo Eze-ẹnyimu Uswe-uswe. Ndu Ízurẹ̀lu ono shi l'alì Ijiputu wuru tṹgbua; kwakọbe onwophẹ k'ọgu.

¹⁹ Mọsisu bya achita ọkpu Jiósefu gude; noo kẹle Jiósefu meru unwu Ízurẹ̀lu; ẹphe riaru iya nte l'ẹphe e-me nno. Ọ sọru: “Mu maru lẹ Chileke be e-mechaa bya eyeru unu ẹka. Ọle g'unu chitakwa ọkpu mu l'ẹka-a mẹ unu tṹgbushia.”

²⁰ Ẹphe wufuta lẹ Sukotu; je akpọbe ọlo-ẹkwa phẹ lẹ Etamu l'aguga echiẹgu. ²¹ O -rwua l'eswe; Chipfu egude urwukpu, kpuru oronmono edu phẹ ọzo. O -rwua l'enyashi l'ọ nwuberu phẹ ọku, kpuru oronmono g'ẹphe gude huma iphóró; k'ọphu ẹphe a-nọduje eje ije: eswe l'enyashi. ²² Urwukpu ono, kpuru oronmono ono, oogudeje edu phẹ l'eswe; waa ọku ono, kpuru oronmono ono, oogudeje edu phẹ l'enyashi ta alufujedu alufu l'ataphu ndu Ízurẹ̀lu.

14

¹ Ọo ya bu; Chipfu sọ Mọsisu: ² “Pfuaru ndu Ízurẹ̀lu g'ẹphe laphu azu je akpọbe ọlo-ẹkwa phẹ lẹ mgboru mkpukpu Pi-Hahirotu, nọ lẹ mgbaka mkpukpu Migidolu yee eze-ẹnyimu. Ẹphe akpọbe ọlo-ẹkwa phẹ ono l'aguga eze-ẹnyimu; g'ọ gha iphu lẹ mkpukpu Belu-Zefonu nhamunha. ³ Ọo ya bu lẹ Fero a-sọ l'unube ndu Ízurẹ̀lu nmawaru l'agaga; l'unu kwawaru l'echiẹgu.

⁴ Mu a-kpọ-chia Fero obu; l'ọ chipfuru phẹ. Obenu l'ee-shi l'iphe, a-nwu l'ẹhu Fero; yẹe ndu ojogu iya; kwabẹ mu ùbvù. Ọo ya bụ; ndu Ijiputu amaru l'ọo mbẹdua bụ Chipfu.” Noo ya; ndu Ízurẹlu mee nno.

⁵ A bya epfuaru eze ndu Ijiputu lẹ ndu Ízurẹlu gbalaak-waru; Fero yẹe ndu-ozì iya gbanwee obu phẹ l'ẹka ẹphe nọ; sù: “?Bù gunu bẹ anyi meru ẹgube-a? ?Anyi gbẹ haa ndu Ízurẹlu g'ẹphe tųgbua parụ ozi, ẹphe eje haa?”
⁶ Ọo ya bụ; a bya edoziaru Fero ụgbọ-inya iya ree; o duta ndu ojogu yeru onwiya. ⁷ Ọ chita ụgbọ-inya, kachaa ree unu l'ukporo iri; meward ụgbọ-inya Ijiputu g'ọ hakota. Ọ byakwaphọ eworu ndu-ishi ojogu yegbachaa l'ụgbọ-inya ono. ⁸ Chipfu kpọ-chia obu Fero, bụ eze ndu Ijiputu; ọ chipyabe ndu Ízurẹlu g'ẹphe azọ garamu garamu; awufu. ⁹ Inya Fero l'ophu; waa ụgbọ-inya iya; waa ndu agba l'inya; waa ikpoto ndu ojogu iya; mbụ ndu Ijiputu l'ophu chipyabe ndu Ízurẹlu bya agbapfu phẹ l'ẹka ẹphe kpọberu ụlo-ẹkwa phẹ l'agugu eze-ẹnyimu; lẹ mgboru Pi-Hahirọtu, gharu iphu lẹ Belu-Zefonu nhamunha.

¹⁰ Fero nọdu akpịritaru ntse; ndu Ízurẹlu palia ẹnya imeli; ọ bwaru ndu Ijiputu bẹ etso phẹ nù. Ndzụ rwuta phẹ; ẹphe bya araku Chipfu. ¹¹ Ẹphe sù Mosisu: “?Bù l'ilu ta adudu l'alì Ijiputu meru g'o gude i dufuta anyi g'anyi bya anwushihu l'echiẹgu? ?Bunua gunu meru; g'o gude i dufuta anyi l'alì Ijiputu? ¹² ?Anyi ta asuduru ngu l'alì Ijiputu g'ì parụ anyi haa; g'anyi jerurọ ndu Ijiputu ozi? ?Togọ kaduru anyi mma l'anyi ejeru ndu Ijiputu ozi; eme l'anyi nwushihuru l'echiẹgu?”

¹³ Mosisu sù phẹ: “Gẹ ndzụ ba agushi unu! Unu pfuru pfushia ike; g'unu ahuma iphe, Chipfu e-me gude dzota unu ntanụ-a. Ndu Ijiputu ono, unu ele ẹnya ntanụ-a bẹ

unu ta ahumabaekwa ozo. ¹⁴ Unu nodu nggujungguji; Le Chipfu a-lwu-chiru-a unu ogu!”

¹⁵ Oo ya bu; Chipfu su Mosisu: “?Bu gunu be iraku mu? Karu ndu Izurelu g'ephe tugbua jeshia iphe, ephe eje. ¹⁶ Wolia mgboro ngu; maa l'eze-enyimu ono g'o kekaha mini ono ebo; k'ophu ndu Izurelu e-gude okpa phe jee ije l'ali okponku l'oma enyimu ono; wughaa. ¹⁷ Mu akpo-chia obu ndu Ijiputu; k'ophu ephe e-tsopyabe phe. Oo ya bu; l'e shi l'iphe, a-nwuru Fero; yee ndu ojogu iya; waa ugbo-inya iya; me ndu agba l'inya; kwabe mube Chipfu ubvu. ¹⁸ Oo ya bu ge ndu Ijiputu eshi nno maru le mu bu Chipfu; mbu teke ee-shi l'iphe, a-nwuru Fero; yee ndu ojogu iya; waa ugbo-inya iya; me ndu agba l'inya; kwabe mu ubvu.”

¹⁹ Noo ya; Ojosi Chileke, shi vuru uzo edu ndu Izurelu pho bya atsulaa azu bya etsoaha phe etsotso. Urwukpu pho, kpuru oronmono pho bya eshikwapho l'atiphu laa l'azu; je anodu phe l'okotazu; ²⁰ je anokaha ndu ojogu ndu Ijiputu; waa ndu Izurelu. L'enyashi ono mgburugburu be urwukpu ono gbakotaru ochii l'eka lanu bya acha oku l'eka lanu. Iphe ono mee; ophu o dudu ndu ophu jekuberu nwibe phe ntse l'enyashi ono l'ophu.

²¹ Tobudu iya bu; Mosisu bya amachia eka iya l'eli eze-enyimu ono. Enyashi ono l'ophu be Chipfu gude oke pherephere, shi l'uzo enyanwu-awawa ziphu eze-enyimu ono azu; o bya agho ali okponku. Mini ono kekaha ebo. ²² Ndu Izurelu bya azo okpa l'ali okponku gude wughaa eze-enyimu ono. Mini eze-enyimu ono kpu g'igbulu; nodu phe l'ekutara; waa l'ekicha teke ephe awugha.

- Mu a-gụ ebvu nụ Chipfu;
 kẹle o goshiwaru l'Ọ parụ ẹka.
 Ịnya mẹ ndu agba iya nụ
 bẹ o nwuru ye l'eze-ẹnyimu.
- ² Chipfu bụ ọkpehu mu
 bya abụru onye mu agụ-ku l'ebvu.
 Ọ bụru yẹbedua bụ onye dzọtaru mu nụ.
 Ọo ya bụ Chileke mu; mu a-nọdu aja iya ajaja.
 Ọ bụru iya bụ Chileke nna mu;
 mu a-nọdu ekutse ẹpha iya.
- ³ Chipfu bụ ojogu.
 Ọo Chipfu bụ ẹpha iya.
- ⁴ Ugbọ-inya Fero yee ndu ojogu iya
 bẹ o nwuru ye l'eze-ẹnyimu.
 Ndu kachaa ree ẹ ndu-ishi ugbọ-inya Fero
 bẹ mini riru ẹ Eze-ẹnyimu Uswe-uswe
- ⁵ Ogbumini riru phe;
 ẹphe bụru tubukungu
 l'ọhu-mini gẹ mkpuma.
- ⁶ Ẹkutara gube Chipfu
 bẹ ọkpehu,
 dụ iya nụ dụ biribiri.
 Ẹkutara gube Chipfu
 bẹ gweru ndu ọhogu ngu uji.
- ⁷ I gude ọdu-biribiri ngu,
 parụ ẹka kwatsushia ndu
 wụ-lihuru etso ngu opfu.
 I haa oke ẹhu-eghu ngu,
 enwu g'ọku;
 ọ bya etsua phe g'ọku,
 etsu ẹswa ọkponku.
- ⁸ Ọo unme bẹ i ziru l'imi;
 eze-ẹnyimu kọo obvudu.

Utso ono pfuru roo g'igbulo.
Ogbumini hukoo l'ohu eze-enyimu.

⁹ Ndu ohogu suru:

“Anyi a-chi phe oso gude.

Anyi a-kwa iphe phe l'okwata; kee;
gude phe mee iphe,
agu anyi egu ememe.

Anyi a-mita ogu-echi anyi;
tuko phe gbushia.”

¹⁰ Obenu l'i turu unme;
eze-enyimu tuko phe rigbushikota.

Ephe buru tubukungu
l'eze-enyimu g'ota-njele.

¹¹ ?Denu agwa,
aturu gube Chipfu?

?Bu onye du ge ngu?
G'i du-be nsọ be du biribiri.
G'i du-be akpabiri dukwapho ebvu.
limeje iphe, dugbaa biribiri.

¹² Ekutara ngu be i machiru;
mgboko bya atuko ndu ohogu
anyi lwee.

¹³ Ndu i gbafutaru
be ii-gude n-yemobu ngu; dua.

O buru eka ono, i bu, du nsọ ono
be ii-gude okpehu ngu durwua phe.

¹⁴ Ohamoha, numaru iya nu
be ndzu e-rwuta.

Ndzu e-rwuta ndu Filisitayinu.

¹⁵ Ndu-ishi ndu Edomu
be meji a-tofu.

Ehu anmaa ndu-ishi Mowabu
anmanma.

Ndu Kénanu erwushihu.

¹⁶ Ndzụ-agụgu; waa ẹhu-anmanma
e-gude phẹ.

O bụru ọkpehu, dụ ngu l'ẹkutara
bẹ ii-gude mee
g'ẹphe dabyichaaru gẹ mkpuma;
gbiriri jasụ ndibe gube Chipfu wughata;
mbụ ndu ono, ị gbafutaru l'ohu,
ẹphe shi bụru ono.

¹⁷ Ii-dubata phẹ;
bya eye phẹ l'eli úbvú nkengu;
mbụ ẹka gube Chipfu họtaru
g'ọ bụru ibe ngu;
mbụ ụlo, dụ nsọ ọphu i
gude ẹka ngu kpụa.

¹⁸ Oo gube Chipfu a-bụru eze
jasụ ẹ tuutuutu ẹ mịimiimii.

¹⁹ Teke ịnya Fero; waa ụgbo-ịnya iya; waa ndu agba
l'ịnya bahuru l'eze-ẹnyimu ono bẹ Chipfu vutaru mini
ono sọ-kpute phẹ. Obenu ẹ ndu Ízurelu jeru ije l'alì
Ọkponku ghaa eze-ẹnyimu ono. ²⁰ Noo ya; Miriyamu,
nwanyi, epfuchiru Chileke, bụ nwune Erọnu bya ewota
nkwa; ụnwanyi l'ophu wụ-tsoru iya; akụ nkwa bya ete
iya etete. ²¹ Miriyamu nọdu aguru phẹ ebvu ono; asuje:
Unu gụa ebvu nụ Chipfu;
noo kẹle o goshiwaru l'ọ parụ ẹka.
Ịnya yẹe ndu agba iya nụ
bẹ o nwuru ye l'echi eze-ẹnyimu.

Mini Mara; waa Elimu.

²² Tọbudu iya bụ; Mosisu dua ndu Ízurelu gbẹ ẹ
Eze-ẹnyimu Uswe-uswe duru phẹ bahụ l'echiẹgu Shuru.
Ephẹ jee ije ujiku ẹto l'echiẹgu; ọphu ẹphe ahụmaduru

mini. ²³ Ēphe rwua Mara; ọ̄phu ēphe adudu ike ngua mini iya; noo kele mini ono atsọ̄ ilu. Noo iphe ono, kparu iphe, a guru ēka ono Mara. ²⁴ Ēphe guaharu Mosisu aphu; su: “?Bū gūnu bē anyi a-ngu?”

²⁵ Noo ya; Mosisu raku Chipfu. Chipfu bya egoshi iya mkpirikpu oshi. O wota iya chie lē mini ono. Mini ono tsoahaa utso mini.

Ō kwa l'ēka ono bē Chipfu turu ekemu nū phe; bya atọ̄oru phe ọ̄kpa iya. Ō bukwarupho l'ēka ono bē ō nō hūa phe ama. ²⁶ Chipfu sū phe: “Ō -būru l'unu ngaberu nchi l'opfu mube Chipfu, bū Chileke unu; bya eme iphe, pfuru oto l'enȳa mu; ō -būru l'unu anga nchi l'iphe, mu suru g'unu meje; bya etsoep̄ho iphe, mu toru ọ̄kpa sū g'unu tsoje; bē ō tō dudu ējo iphe-ememe ono, mu gude byapfuta ndu Ijiputu ono, mu bya egude byapfuta unu. Noo kele ọ̄o mb̄dua bū Chipfu onye emeje unu g'unu ka mma l'iphe-ememe.”

²⁷ E mecha; ēphe bya ejerwua Elimu; ēka ọ̄gba-mini iri l'ēbo nō; waa upfu mpfu ukporo eto l'iri. Ēphe bya akpobe ulo-ekwa phe lē mgboru mini ono.

16

Mana waa ọ̄kwà

¹ Ndu Izurelu g'ēphe ha wufu lē Elimu; bya erwua echiegu Sinu, nō lē mgbaka Elimu yēe ubvū Sayinayi lē mboku, onwa k'ēbo dū l'abali iri l'ise g'ēphe shichaep̄ho l'al̄i ndu Ijiputu futa. ² G'ēphe ha guru aphu kpua Mosisu yēe Eronu l'echiegu ono; ³ sū phe: “Ome Chipfu gude ēka iya gbushia anyi l'al̄i Ijiputu; m'ēhu akakwa anyi guul Ēka ono, anyi shi anọ̄-pheje ite-anū mgburugburu; eriji ep̄ho. Obenu l'unu chifutaru anyi bya edobe l'echiegu l'ēka-a g'unu kpọ̄-gbushia anyibe igwe ọ̄ha-a l'egu.”

⁴ Chipfu sụ Mósísu: “Mu e-shi l'imigwe dzeeru unu nri gẹ mini. Gẹ ndu Ízurelu lufutaje mbokumboku bya ekpota ophu a-suru phẹ eriri kẹ mboku ono. Gẹ mu eshi egube ono hụa phẹ ama; maru; ?ephẹ e-kweta-a meje iphe, mu turu phẹ ekemu iya. ⁵ O -rwua lẹ mboku k'ishii; ephẹ eshia nri ophu ephẹ kpotaru. Mboku ono bẹ ephẹ e-kpota iya g'ọ ha g'ophu ephẹ ekpotajehawa mboku ozo ugbo labọ.”

⁶ Oo ya bụ; Mósísu yẹe Erọnu sụ ndu Ízurelu g'ephẹ ha: “Ụzenyashi-a bẹ unu a-huma l'oo Chipfu bụ onye dufutaru unu l'alị Ijiputu. ⁷ O -rwua l'utsu bẹ unu a-huma odu-biribiri Chipfu; noo kẹle ọ nụmawaru aphụ, unu agụ ekpu iya. ?Bụ onye bẹ anyịbedua bụ; ophu unu a-nọdu aguru anyi aphụ?” ⁸ Mósísu sụkwapho: “Unu a-maru l'ọ bụ Chipfu eviya. Ọo-nụ unu anụ, unu a-ta l'uzenyashi-a; waa nri, a-suru unu eriri l'utsu; noo kẹle ọ nụmawaru aphụ, unu guru kpua ya. ?Bụ onye bẹ anyi bụ? Unu ta agụkwaru anyi aphụ; ọ kwa Chipfu bẹ unu aguru iya!”

⁹ Mósísu sụ Erọnu: “Sụ ndu Ízurelu g'ephẹ ha; g'ephẹ tuko bya l'ataphu Chipfu. Kẹle ọ nụmawaru aphụ, ephẹ agụ.”

¹⁰ Erọnu nọdukwadu epfu eyeru ndu Ízurelu g'ephẹ ha; ephẹ ghaa ẹnya l'echiegu; bya ahuma odu-biribiri Chipfu g'o nwuru kẹ phoo l'urwukpu ono, kpuru oron-mono ono.

¹¹ Chipfu sụ Mósísu: ¹² “Mu nụmawaru aphụ, ndu Ízurelu agụ. Pfuaru phẹ l'ephẹ a-ta anụ lẹ nchi-ejihu. O -rwua l'utsu l'e gude nri zụ-jia phẹ epho. Oo ya bụ g'ephẹ amaru l'oo mbedua bụ Chipfu, bụ Chileke phẹ.”

¹³ O -rwua l'uzenyashi ono; ọkwà bya atuko eka ephẹ kpoberu ụlo-ekwa phẹ dzuru. A futashia l'utsu; iji

kwashiwaa ike; kwaphee eka ono, ephe kpoberu ulo-ekwa phe ono mgburugburu. ¹⁴ Iji ono phosahu ephe; o nweru nwa iphe, wushiru l'alij l'echiegu ono, dugbaa yegeyege; bya adu g'iji, oyi meru; o hukoko ahuko. ¹⁵ Ndu Izuruelu humae ya pho; ephe su nwibe phe: “?Bu gunu baa?” Noo kele ephe te eshidu maru iphe obu.

Mosisu su phe: “Oo nri, Chipfu nuru unu g'unu ria. ¹⁶ Waa ekemu, Chipfu turu baa: ‘G'onyenonu kpotaje ophu a-suru iya eriri. Ndu bu l'ulo-ekwa unu be unu ekpotajeru ogbongu lanu ogbongu lanu.’ ”

¹⁷ Ndu Izuruelu mee g'e pfuru phe. O nweru ndu ophu kpotaru shii; o nweru ndu ophu kpotaru nwanshii. ¹⁸ E mecha; ephe gude ogbongu gbaa ya; ophu ndu kpotaru shii; ekpotanukaduru; ophu ndu kpotaru nwanshii; ekpopeteduru. Onyenonu kpotajerupho ophu suru iya nu.

¹⁹ Mosisu su phe: “G'o to nwekwa onye e-dobe nkiya g'o futal'utsu.”

²⁰ Ole o nweluru-a ndu ophu angabeduru Mosisu nchi, haphodoru nkephe dobe; o nodu futal'utsu. A futashia l'utsu; eka jiwa iya ejiji; teme o nodu eshiakwapho ishi. Ehu-eghu iphe ono, ephe meru ono ghuaaha Mosisu.

²¹ Utsu mbokumboku; onyenonu ekpota ophu a-suru yee ndibe iya eriri. Teke anwu chishijeeru pho ike; ophu phoduru l'alij azashihu. ²² O -rwua mboku k'ishii; ephe kpota ophu ha g'ophu ephe ekpotaje mgbo labo. Ogbongu labo be ephe kpotaru onye lanu. Ndu-ishi ndu Izuruelu bya epfuaru iya Mosisu. ²³ O su phe: “Waa ekemu, Chipfu turu baa: ‘Echele bu eswe Sabatu; mbu eswe-atuta-unme, du nsoko ke Chipfu. Oo ya bu; unu ghee iphe, du unu k'egheghe; shia, iphe du unu k'eshishi ntanu-a. Unu edobe ophu ghuduru nu jasul'utsu.’ ”

²⁴ Eṗhe haa ya; ọ bọo nchi, bụ iphe, Mósísisu pfuru; ọṗhu o shiduru ishi; ọṗhu èkà aladuru iya. ²⁵ Mósísisu sụ phẹ: “Unu ria ono ntanu-a! Noo kẹle ntanu-a bụ eswe-atuta-unme kẹ Chipfu; ọṗhu ọ tọ dudu nri, unu a-huma l'etezi ntanu-a. ²⁶ Unu e-kpotajẹ nri ono ujiku ishii; ọle o -rwua mbọku k'ẹsaa, bụ eswe-atuta-unme bẹ ọ tọo dudu.”

²⁷ Ọle o nwelẹru-a ndu tugburu lẹ mbọchi k'ẹsaa jeshia ekpota nri; obenu l'o to nwedu ọṗhu eṗhe humaru. ²⁸ Chipfu sụ Mósísisu: “?Bụ teke ole bẹ unu a-jikaberu eme ekemu mu; waa opfu mu? ²⁹ Nyatakwa l'ọo Chipfu bẹ nuru unu eswe-atuta-unme. Noo iphe, meru g'o gude ọ nọdu abujeru: o -rwua mbọku k'ishii; l'ọ nụ unu nri, a-suru unu ujiku ebo. O -rwua mbọku k'ẹsaa; g'on'yemonye nọdujeepho l'ẹka ọ nọ. G'o to nweshiru onye a-lufuje alufu.” ³⁰ Ọo ya bụ; ndu ono dzua ike lẹ mbọku k'ẹsaa.

³¹ Ndu Ízurelu kua nri ono mana. Ọocha ọcha g'akpuru koriyanda; tẹme ọ nọdu atsoje g'ẹcha mbekee, e gude manụ-ẹnwu mee. ³² Mósísisu sụ: “Wakwa iphe, Chipfu epfu baa: ‘Unu kpota ogbongu mana lanụ doberu ọgbo ọṗhu nọ l'iphu. Ọo ya bụ g'ẹṗhe ahuma nri, mu nuru unu; unu ria l'echiẹgu; teke mu dufutaru unu l'alị Ijiputu.’”

³³ Ọo ya bụ; Mósísisu sụ Erọnu: “Wota ite; kporu ogbongu mana lanụ ye iya. Dobe iya l'ataphu Chipfu; g'e doberu iya ọgbo ọṗhu nọ l'iphu.”

³⁴ Erọnu woru iya dobe l'ataphu okpoko ono, e yeru ẹkwo ekemu Chipfu ono; k'ọṗhu ee-dobe iya; gẹ Chipfu pfuru Mósísisu. ³⁵ Ndu Ízurelu ria mana ụkporo apha labọ; gbiriri jasụ eṗhe jerwua alị ẹka e bu ebubu. Mbụ l'eṗhe riru mana gbiriri jasụ eṗhe rwua l'oke alị Kénanu.

³⁶ Ogbongu lanụ bụ oke-lanụ-l'uzo-iri l'iphe, jiru nkweka.

17

Mini, shi lẹ mkpuma

¹ Ndu Ízurẹlu g'ẹphe ha bya wulihu l'echiẹgu Sinu tųgbua; ẹphe -gbẹ l'ibe iya ọphuu; ẹphe abahụ l'ibe iya ọphuu; ọ bụerupho gẹ Chipfu ziru phẹ bụ gẹ ẹphe eje iya. Ẹphe je akpọbe ọlo-ẹkwa phẹ lẹ Refidimu. Obenu lẹ mini, ẹphe a-ngụ ta adụdu l'ẹka ono. ² Ọo ya bụ; ẹphe baaharụ Mósisu mba sụ: “Nụ anyi mini g'anyi ngụ!”

Mósisu sụ: “?Bụ gụnu bẹ unu abarụ mu mba? ?Bụ gụnu kparụ iphe unu ahụ Chipfu ama?”

³ Obenu lẹ ndu Ízurẹlu bẹ ẹgu mini agushi ike; ẹphe nọdu aguru Mósisu aphụ; sụ: “?Bunua gụnu kparụ iphe i dufutaru anyi; waa unwu anyi; waa iphe-edobe anyi l'alị Ijiputu bya edobe g'ẹgu mini gbushia?”

⁴ Ọo ya bụ; Mósisu raku Chipfu sụ: “?Denu gẹ mu e-me ndu-a? Ẹphe a-byaakwa mu atụ-gbu lẹ mkpuma.”

⁵ Chipfu sụ Mósisu: “Vuta ụzo gẹ ndu Ízurẹlu tso ngu l'azu. L'i harụ ndu bụ ọgerenya Ízurẹlu duta; l'i wota mgboro ono, i chiru l'enyimu Nayilu ono gude jeshia.

⁶ Mu a-pfuru ngu l'atatiphu lẹ mkpuma Horẹbu. I-rwua ẹka ono; chia mgboro ngu lẹ mkpuma ono. Mini, ndu Ízurẹlu a-ngụ e-shi iya lwashihu.” Mósisu bya emee nno l'atatiphu ndu bụ ọgerenya ndu Ízurẹlu ono. ⁷ Ọ bya agụa ẹka ono “Masa”; gụkwaa ya phọ “Meriba”; noo kele ndu Ízurẹlu barụ mba; bya ahụ Chipfu ama; sụ: “?Chipfu nọa l'echilabọ anyi tọ tọ nọdu iya?”

Aalwụ-kpee ndu Amalẹku

⁸ Ndu Amalẹku bya etso ndu Ízurẹlu ọgu lẹ Refidimu.

⁹ Mósisu sụ Jioshuwa: “Harụ unwoke anyi họta g'unu je awọta ndu Amalẹku ọgu. Echele bẹ mu e-gude mgboro Chipfu l'ẹka je apfuru l'eli úbvú.”

¹⁰ Oo ya bu; Jioshuwa bya awota ndu Amaleku ogu, du ge Mosisu ziru iya. Mosisu; waa Eronu; waa Huru bya enyihu eli ubvu; je anodu le mkpakponu iya. ¹¹ O nodu abujeru; Mosisu -chilepho eka imeli; ndu Izurelu alwu-kpeahaa. Teke o chizetaru eka; ndu Amaleku alwu-kpeahaa. ¹² A nonyaa; eka tsuhu Mosisu me; ephe pata mkpuma; bya edoberu iya; o nodu anoo. Eronu; waa Huru bya apalia ya eka imeli; onye lanu l'ekutara; onye ophuu l'ekicha. Oo ya bu; eka nodue ya pho l'imeli egube ono gbiriri jasu nchi jihu. ¹³ Oo ya bu; Jioshuwa phe lwu-kpee ndu Amaleku.

¹⁴ Noo ya; Chipfu su Mosisu: “Dee iphe-a l'ekwo g'o buru iphe, ee-gudeje nyata iya. Teme l'i mekwaapho ge Jioshuwa numa le mu e-me ge ndu Amaleku chihu le mgboko; g'a ta nyatabahe phe.”

¹⁵ Mosisu bya akpu oru-ngweja; bya agua ya “O kwa Chipfu bu onye emeje g'eka mu kangoo l'ogu”. ¹⁶ O su: “Iphe, meru iphe, mu guru iya nno bu l'a chi-liru eka pfuru nu Chipfu l'aba-eze iya. Chipfu a-noduepho etso ndu Amaleku ogu; e -shi l'ogbo sweru ogbo.”

18

Jieturo akpafuta Mosisu

¹ Noo ya; Jieturo, onye uke ndu Midiyanu, bukwapho nna nyee Mosisu; bya anumakota iphemiphe, Chileke mekotaru Mosisu waa ndu nkiya, bu Izurelu; teme waa ge Chipfu gude dufuta ndu Izurelu l'alì ndu Ijiputu.

² Teke Mosisu dutaru nyee ya, bu Zipora dulaa ibe Jieturo, bu nna nyee ya ono; be Jieturo ono nabataru nyee Mosisu obu; ³ waa unwu iya unwoke labo. Onye lanu be epha iya bu Geshomu; noo kele Mosisu suru: “Mu bu onye lwaru alwalwa l'alì ndu ohozo.” ⁴ Epha onye ophuu

buru Eliyéza; noo kéle ọ sùru: “Ọo Chileke nna mu bú onye yeru mu ẹka. Ọ dzọtaru mu gẹ Fero te egbu mu.”

⁵ Jieturo, bú nna nyee Mósísu duru unwu Mósísu; waa nyee Mósísu ọbu byapfuta iya l'echięgu l'ẹka ọ kpọberu ọlo-ẹkwa lẹ mgboru úbvú Chileke. ⁶ Jieturo zihawaru g'e je asụ iya: “Mùbe Jieturo, bú nna nyee ngu bẹ dukwa nyee ngu; waa unwegirima ibe ngu abya.”

⁷ Ọo ya bú; Mósísu gba iya ndzuta bya ephozeru iya ishi; bya anma iya akpa. Ẹphe kelechaa; bya bahụ l'ọlo-ẹkwa Mósísu. ⁸ Mósísu kọkotaru nna nyee ya ono iphemiphe, Chipfu meru Fero waa ndu Ijiputu l'iswi ẹhu ndu Ízurẹlu; tẹme waa iphe-ẹhuka, ẹphe jekọtaru l'uzo; waa gẹ Chipfu gude dzọta phẹ.

⁹ Ẹhu tsọo Jieturo uto g'ọ numaru k'iphe, dọ ree, Chipfu mekọtaru Ízurẹlu; dzọta phẹ l'ẹka ndu Ijiputu. ¹⁰ Ọ sụ: “G'ajaja búru ké Chipfu, bú onye nafutaru ngu l'ẹka ndu Ijiputu; yẹle ẹka Fero; mbụ onye nafutaru ndu Ízurẹlu l'ẹka ndu Ijiputu. ¹¹ Nta-a bẹ mu maru lẹ Chipfu bẹ kakọta agwa l'ophu shii. Noo kéle ọo ndu nmaru ndu Ízurẹlu phulaphula bẹ o meru iphe-a.” ¹² Noo ya; Jieturo, bú nna nyee Mósísu bya egweeru Chipfu ngweja-akpọ-ọku; gwekwaarụ iya phọ ngweja ọzowaro. Erọnu duta ndu bú ọgerenya Ízurẹlu bya g'ẹphe lẹ Jieturo ria nri l'atatiphu Chileke.

Aahọta ndu l'e-doshijeru ndu Ízurẹlu opfu

¹³ Ọ -rwua nchitabọhu iya; Mósísu bya eje anọdu l'ẹka ọonoduje; kpeaharụ ndu Ízurẹlu ikpe. Ẹphe shi l'utsu nọ-phae ya mgburugburu jasụ l'uzenyashi. ¹⁴ Nna nyee Mósísu bya ahuma iphe, Mósísu emeru ndu Ízurẹlu; ọ sụ: “?Bụ gụnu bẹ iimeru ndu Ízurẹlu ẹgube ono? ?Bụ gụnu kparụ iphe, ọ bú gubedua nwẹkinyi ngu a-nọduje

ekperu ndu ono ikpe; ke g'ephe shije l'utsu nọ-pee ngu mgburugburu jasụ l'uzenyashi?"

¹⁵ Mosisu sụ iya: "Ọ kwa phẹ abyajẹ mu akpata ishi iphe, bụ uche Chipfu. ¹⁶ Teke ọ bụ l'ọo opfu adaru phẹ; ephe ewotaru mu iya; mu edoshiaru phẹ iya; bya akaru phẹ iphe, Chipfu tọru ọkpa sụ g'e tsoje; waa ekemu iya."

¹⁷ Nna nyee Mosisu sụ iya: "Iphe, iime ta adudu ree. ¹⁸ Ọo egbugbu bẹ gụbedua; waa ndu ono, awụ-pfutajẹ ngu nụ ono egbu onwunu. Ozi ono kariru ngu ẹka; i tii jekọtadu iya nwẹkinyi ngu. ¹⁹ Ngabẹ nchị gẹ mu kpọziaru ngu ụzo g'ii-meje iya. Gẹ Chipfu swikwaru ngu. Ọo gụbedua a-nọchi ẹnya ndu-a l'ataphu Chileke. Ii-wotajẹ iphe, adaru phẹ nụ dooru iya. ²⁰ Zia phẹ iphe, Chipfu tọru ọkpa sụ g'e tsoje; waa ekemu iya; bya egoshi phẹ ụzo, ephe e-tsoru; waa iphe, gbaru phẹ l'ememe. ²¹ L'i bya eshi l'ime ndu Ízurelu g'ephe ha họtta ndu ike dụ; mbụ ndu atụ Chileke ebvu, bụ ndu e gude ire phẹ ẹka; bya aburu ndu te eridu ụphalazu. Họtta phẹ g'ephe bụru ndu-ishi unu ụmadzu labọ l'ụkporo iri iri; waa ndu-ishi ụmadzu ụkporo ise ise; waa ndu-ishi ụmadzu ụkporo ẹbo l'iri iri; tẹme waa ndu-ishi ụmadzu iri iri. ²² Họtta phẹ g'ephe doshikọtajeru ndu Ízurelu opfu tekenteke. Ọle g'ephe wotajeru ngu opfu ọphu shihuru ike. Ephe edoshije opfu ọphu dụ nphe nwẹka phẹ. Ono e-me g'ivu ngu ka nphe; noo kẹle unu l'ephe tukuroru evu iya. ²³ I -mee ya nno; ọ -buru uche Chileke; bẹ ịi-dụkwa ike vua ivu-erwa ono; tẹme ndu ono -nọdu ala unuphu; ephe egude ẹhu-utso ala."

²⁴ Mosisu ngabẹru nna nyee ya ono nchị; bya emekọtta iphemiphe, o pfuru. ²⁵ Ọ bya ahọtta ndu ọkpehu dụ l'echilabọ Ízurelu l'ophu; bya emee phẹ ndu-ishi ndu dụ unu labọ l'ụkporo iri iri; waa ndu-ishi ndu dụ ụkporo ise ise; waa ndu-ishi ndu dụ ụkporo ẹbo l'iri iri; tẹme

waa ndu-ishi ndu du iri iri. ²⁶ Ēphe n̄odu an̄oduje edoshik̄otaru ndu Ízur̄elu opfu. Opfu ōphu shihuru ike be ēphe ewotaj̄eru M̄osisu. Opfu ōphu du nphe be ēphe edoshije nw̄eka phē.

²⁷ Noo ya; M̄osisu haa nna nyee ya ono; ō lash̄ia al̄i iya.

19

Úbvú Saȳinayi

¹ O be mb̄oku, kwe ndu Ízur̄elu onwa eto ḡedegede, ēphe wufuru l'al̄i Ijiputu; ēphe byarwuta echīegu Saȳinayi. ² Ēphe shi l̄e Refidimu bya erwua echīegu Saȳinayi, bya akp̄obe ụlo-ekwa phē l'eka ono l'okpa úbvú ono.

³ M̄osisu nyihu eli úbvú ono nyipfu Chileke. Chipfu bya agbe l'úbvú ono kua ya s̄u: “Waa iphe, ii-zi ndu onu-ulo Jiék̄opu baa; mb̄u iphe, ii-pfuru ndu Ízur̄elu: ⁴ ‘Unub̄dua l'onwunu h̄umaru iphe, mu meru ndu Ijiputu; waa ḡe mu gude hee unu g'ugo, he nwa iya; hepfuta onwomu. ⁵ O - b̄uru l'unu ngaberu mu nchi; bya edobe ogbandzu mu be unu a-b̄uru okiphe, d̄uru mu iche l'echilab̄o ohamoha. A makwaru-a l̄e mgboko l'ophu bu nkemu; ⁶ ole unu a-b̄uru mu al̄i-eze ndu-uke; waa oha, du ns̄o.’ Noo iphe, ii-pfuru ndu Ízur̄elu bu ono.”

⁷ Oo ya bu: M̄osisu bya alaphu azu; bya ekuko ndu bu ogerenya ndu Ízur̄elu; bya atuko iphemiphe ono, Chipfu ziru iya g'o pfua ono; pfuk̄otaru phē. ⁸ Ndu Ízur̄elu tuko zūa mgbede s̄u: “Iphemiphe, Chipfu pfuru be anyi emek̄ota.” Oo ya bu; M̄osisu bya egude onu, ēphe yeru jepfu Chipfu ozo.

⁹ Chipfu s̄u M̄osisu: “Mu a-n̄odu l'urwukpu, jihuru kpakpalu byapfuta ngu; k'ophu ndu Ízur̄elu a-n̄odu anu eka mu epfu eyeru ngu; g'ēphe a-ch̄iru upfu kw̄ewaro

l'eka i nọ.” Oo ya bu; Mosisu bya epfuaru Chipfu onu, ephe yeru.

Edobe ndu Ízurẹlu nsọ

¹⁰ Chipfu sụ Mosisu: “Jepfu ndu Ízurẹlu je edoo phẹ nsọ ntanu-a; waa echele. G'i pfuaru phẹ g'ephe saa uwe phẹ asasa. ¹¹ O -rwutashia mbọku k'eto; g'ephe kwakọbe-ghewa; noo kẹle mbọku ono bẹ Chipfu e-nyizeta bya anọdu l'úbvú Sayinayi; ndu Ízurẹlu ahumakota iya g'ephe ha. ¹² Kpaaru phẹ oke l'úbvú ono mgburugburu. Pfuaru phẹ g'ephe letakwa ẹnya g'ọkpa phẹ te jekubekwa mgboru úbvú ono ejekube; ọphu ọ bụro k'enyihu iya enyihu. Onye ẹhu iya rwutaru l'úbvú ono bẹ ee-gbu egbugbu. ¹³ G'a tųgbua ya lẹ mkpuma; ọzo gbagbua ya l'apfu; g'e te denyikwa iya ẹka. Ọ -bu nemadzu; ọzoo anu; g'e te kwekwa g'ọ nọdu ndzu. Ọ bụepho teke a nọnyaru; e gbua opu bẹ ephe e-bebe jekube úbvú ọbu.”

¹⁴ Mosisu shichaepho l'eli úbvú ono nyizeta byapfuta ndu Ízurẹlu. Ọ bya edoo phẹ nsọ g'ephe duru Chileke iche; ephe bya asashia uwe phẹ. ¹⁵ Ọ sụ phẹ: “O -rwutashia mbọku k'eto; unu kwakọbechaakwa onwunu! Unu hakwaa jepfu nwanyi!”

Mosisu enyipfu Chileke l'úbvú Sayinayi

¹⁶ O belephọ l'utsu mbọku k'eto ono; ebemu-igwe wata akụ kẹ phoophoophoo; egbigwe nọdu ada; tẹme urwukpu, jihuru kpakpalu sọ-kputa eli úbvú ono. Opu, adashi ọda ike shi l'úbvú ono ada. Onyemonye, nọ l'ulo-ekwa iya phuhu kẹ kpaakpaakpaa. ¹⁷ Mosisu bya edufuta phẹ l'eka ephe kọberu ulo-ekwa phẹ g'o duru phẹ byapfuta Chileke. Ephe bya tuko pfuru l'ọkpa úbvú ono. ¹⁸ Enwuru-ọku tuko úbvú Sayinayi sweta; noo kẹle

Chipfu gude oku nyizeta l'úbvú Sayınayi ono. Enwuru-oku ono nodu akpu ke tututuutu zelihi g'enwuru shi l'oku, enwu phoophoophoo. Úbvú ono l'ophu nodu anmakota jijijiji ehuka ehuka. ¹⁹ Oda opu ono nodu aka shii eje. Mosisu nodu epfu opfu; a nodu anukwapho olu Chileke eka oopfu eyeru Mosisu.

²⁰ O buru iya bu le Chipfu enyizeta l'eli úbvú Sayınayi; bya ekua Mosisu g'o nyipfuta iya le mkpakponu úbvú ono. Mosisu nyihu eli úbvú ono. ²¹ Chipfu su iya: “Nyizeta l'alì je anmaaru ndu Ízurèlu okwa g'ephe ta akpahè ụzo g'ephe huma Chipfu; odumeka be ephe a-dukwa igwerigwe laa l'iyi. ²² Mbukponu ndu-uke, eme g'ephe byakube mube Chipfu ntse be e-do onwophe nsò g'ephe duru mu iche; odumeka mu anua phe aphu.”

²³ Mosisu su Chipfu: “Ndu Ízurèlu te enyitakwa úbvú Sayınayi; noo kele i turu anyi ekemu su g'anyi dobe úbvú ono nsò; teme anyi akpaa ya oke gbaphee mgburugburu.”

²⁴ Chipfu su: “Nyizeta l'alì je eduta Eronu g'unu l'iya swiru. O le ge ndu-uke; waa ndu Ízurèlu ophu ta akpaghatakwa oke ono byapfuta mube Chipfu; odumeka be mu a-nukwa phe aphu.”

²⁵ Mosisu nyizeta bya epfuaru ndu Ízurèlu iphe, Chipfu pfuru.

20

Ekemu iri, shi l'eka Chileke

¹ Chipfu bya epfukota iphemiphe-a; su:

² “Oo mbedua bu Chipfu, bu Chileke unu, bu onye dufutaru unu l'alì Ijiputu; mbu ali eka ono, unu shi buru ohu ono.

³ “Unu ta adukwa iphe, unu a-bajeru eja; gbahaa mube Chileke kpurumu.

⁴ “Unu te emetakwaru onwunu ntẹkpe, e meru; o yee iphe, nọ l'imigwe; ọzoo iphe, nọ ịe mgboko-a; mẹ iphe, bu ịe mini-ime-alị. ⁵ Unu ta abajekwaru phẹ ẹja; ọphu unu ejejekwaru phẹ ozi. Noo kẹle mụbe Chipfu, bu Chileke unu eko okophoo. Mu nọdu anụje ndu mu dū ashị aphụ k'iphe, dū ẹji, ẹphe meru mu; gude iya nua unwu phẹ aphụ; mẹ unwu nwanwa phẹ; mẹ unwu nwanwanwanwa phẹ. ⁶ Obenu l'iphe, bukpo ndu yeru mu obu bya emeje iphe, mu pfuru bẹ mu emejekwanu gẹ n-yemobu mu buru o-je-ịe-nwanwa l'ẹhu phẹ.

⁷ “Unu te ekujekwa ẹpha mụbe Chipfu, bu Chileke unu l'ụzo, apfuduru-oto. Noo kẹle mụbe Chipfu ta ahakwa ndu eme nno; gẹ mu ta nụ phẹ aphụ.

⁸ “Unu nyatajẹ mee mbọku Sabatu, bu eswe-atuta-unme g'ọ dū nsọ. ⁹ Ọo ujiku ishii bẹ unu e-seje akanya; jekota ozi unu; ¹⁰ Obenu ịe mbọku k'ẹsaa bu eswe atuta-unme kẹ Chipfu, bu Chileke unu. G'ọ tọ dukwa ozi, unu e-jeje mbọku onoya. Ọphu unu ekwekwa gẹ nwa unu; m'onye unu gbaru ohu; mẹ iphe-edobe unu; m'onye lwaru alwalwa, bu l'ibe unu; jee ozi mbọku ono. ¹¹ Noo kẹle ọo ujiku ishii bẹ mụbe Chipfu meru igwe; bya emee eliphe; yee eze-enyimu; mẹ iphemiphe, dukota iya nū. O be ịe mbọku k'ẹsaa; mu tuta unme. Ọ buru iphe ono kparu iphe, mụbe Chipfu goru onu-oma nū eswe-atuta-unme; bya emee ya; ọ dū nsọ.

¹² “Unu kwabejekwa ne unu mẹ nna unu ụbvù. Ọo ya bu g'unu enweru ndzu ogologo; buru l'alị ono, Chipfu, bu Chileke unu abya unu anunu ono.

¹³ “Unu te egbujekwa ọchi.

¹⁴ “Unu te erijekwa ogori.

¹⁵ “Unu te ezijekwa iphuru.

¹⁶ “Unu ta adzujekwa ụka kpua nemadzu ibe unu.

¹⁷ “G'ulo nwibe unu; mē nyee ya; mē ohu, ọ gbataru agbata; mē iphe-edobe iya; mēkpoo iphe, o nweru enweru g'ọ ha ta adujekwa unu g'a su l'ọo unu nwe iya.”

¹⁸ Ndu Ízurẹlu hụmaepho egbigwe; waa ebemu; bya anuma opu; bya ahuma g'úbvú ono akpushi enwuru-ọku; ephe nmahu kẹ rwuurwuu lẹ ndzu-agugu. Ephe pfuru ụzenya; ¹⁹ su Mosisu: “Pfujeru yeru anyi gubedua; anyi a-ngabe-a nchi. Gẹ Chileke te epfuhẹkwa opfu yeru anyi l'onwiya; ọdumeka bẹ anyi a-nwushihukwa.”

²⁰ Mosisu su ndu Ízurẹlu: “Gẹ ndzu ba agushi unu. Chileke byaru g'ọ hua unu ama; k'ophu unu a-nodu atsujẹ iya ebvu; haa eme iphe-ẹji.”

²¹ Ndu Ízurẹlu pfuru ụzenya; Mosisu bya ejekube ọchii ono ntse, bu ẹka Chileke nọ.

Aakpu Ọru-ngweja Chipfu

²² Chipfu su Mosisu: “Su ndu Ízurẹlu lẹ-a: Unu humawaru l'onwunu lẹ mu shi l'imigwe pfuru yeru unu. ²³ G'ọ tọ dukwa agwa, unu e-meta swikube mu. Unu te egudekwa mkpọla-ọchaa; ọzoo mkpọla-ododo meta agwa doberu onwunu.

²⁴ “Ọ buri ẹja, shi l'ali bẹ ee-gudeje kpuru mu ọru-ngweja, bu ẹka ee-gbuje aturu; waa egbu; waa eswi; gude gweeru mu ngweja-akpo-ọku; waa ngweja-ehuguu. Ekameka mu meru g'a nọduje; nyata epa mu bẹ mu a-byapfutajẹ unu bya ekebe unu l'oma. ²⁵ Ọ - buri l'unu gude mkpuma akpuru mu ọru-ngweja; unu te egudekwa mkpuma, a rwaru arwarwa. Noo kẹle unu -kua ya ọngu bẹ unu turwuwuru iya. ²⁶ Ọphu unu akpukwa ọru-ngweja ono g'ọ du l'eli; tya ya ocho k'ophu eenyihuje iya enyihu; a nonyaa; unu jia onwunu uwele l'ọru-ngweja ono.”

21

Ndu Hiburu, a gbaru ohu

¹ “Waa ekemu, ii-zi phẹ baa:

² “Ọ -buru l'ị gbaru onye Hiburu ohu bẹ iphe, oo-
jeru ngu ozi bu apha ishii. O -be l'apha k'ẹsaa l'o nweru
onwiya; a taa pfudu ugwo l'ishi iya. ³ Teke ọ bu l'ọ swi
nwẹkinyi iya teke ọ byaru; l'ọ laa nwẹkinyi iya. Ọ -
bukwanuru lẹ yee nyee ya swi teke ọobyaa; nyee ya ono
etsoru iya mẹ ọ lashi. ⁴ Teke ọ bu lẹ nnajiuphu iya
lutaru iya nwanyi; ọ nwutaru iya unwegirima; nyee ya
ono mẹ unwegirima iya ono a-tuko buru kẹ nnajiuphu
iya. Ọ buerupho nwoke a-la nwẹkinyi iya.

⁵ “Obenu ọ -buru l'ohu ono suru lẹ ya yeru nnajiuphu
iya obu; bya eye nwanyi ono, ọolu ono; waa unwegirima
iya; ọphu ya alufudu eje enweru onwiya; ⁶ g'onye nwe
iya nu duru iya je l'iphu ndu-ikpe. L'o duru iya je l'onu-
mgbo; ọzo l'okpa mgbo; je egude oji kpọ-fua ya nchi. L'ọ
buru ohu iya jasụ g'ọo-nọ-beru.”

⁷ “Ọ -buru lẹ nwoke reru nwa iya nwanyi g'ọ buru
ohu; a ta abyadu aha iya g'ọ laa g'aahajẹ unwoke phọ.
⁸ Teke e reru iya onye arị kẹ g'ọ luru iya; a nonyaa;
ọphu ọ duedu iya ree; g'ọ hakwaa g'a gbata iya. Ọ tọ
gbakwaru gẹ nnajiuphu iya ono ree ya ndu ohozo; noo
kẹle o to meeduru ohu iya ọbu iphe, o kweru ukwe iya.
⁹ Ọ -buru l'ọo nwa iya nwoke bẹ ọ zu-doru iya g'ọ
luru; g'ọ mejekwa nwamgboko ọbu gẹ nwa, ọ nwuru
anwunwu. ¹⁰ Ọ -buru lẹ nwoke lutaru nwanyi ọzo; g'ọ
nujukwa nyee ya kẹ mbu nri; nmajeru iya ekwa; emeru
iya iphemiphe, eemejeru nwanyi, aalu alulu. ¹¹ O -buru
l'o too meduru iya uzo iphe ẹto ono; gẹ nwanyi ono lufu;
ọle g'ọ tọ dukwa mẹ afu, aa-pfu nwoke ono.”

Emeka onye ọzo iphe

¹² “Onye chiru nemadzū iphe chigbua ya; g'ọ lakwaa l'ọchi iya. ¹³ Ọle ọ -būru l'ọ to lekebedūru ẹnya chigbua ya; ọ -būru l'ọo Chileke harū iya g'ọ nwūa nno; bẹ o nweru ẹka mu e-goshi unu g'onye dū nno gbajeru laa. ¹⁴ Obenu; ọ -būru lẹ nemadzū lekeberu ẹnya; gude ẹregede gbua nemadzū ibiya; unu kpūta onye ọbu kpūru lūfu l'ọru-ngweja mu; je egbua l'ẹka ọzo.”

¹⁵ “Onye tsoru ne iya; ọzoo nna iya ọgu bẹ ee-gbu egbugbu.”

¹⁶ “Onye parū nwibe iya je eree; ọzoo l'ọ nọkwadu iya l'ẹka teke e guderu iya; g'e gbua onye ọbu egbugbu.”

¹⁷ “Onye phuru ne iya iphu; ọzoo nna iya; g'e gbukwaa onye ono egbugbu.”

¹⁸ “Ọ -būru l'unwoke labọ bẹ opfu adaru; onye lanū tūa onye ọphuu mkpuma; ọzoo l'ọ pfūpfuberu ẹka tsua ya; ọphu onye ono anwūhuduru anwūhu; ọ būru iphe bẹ o mekarū iya; ọ zẹru iya azẹe; g'ọ tọ dūkwa iphe, ee-me onye ono, mekarū iya iphe ono; ¹⁹ m'ọ būru l'onye ono mechaarū-a; ọ nọdu adūje ike gude mgboro ejephe l'etezi. Ọle onye ọphu mekarū iya iphe, a-pfūkwanu iya ugwo azẹe ono, o shi zẹe kẹ mmanū ono; bya aghakwaa ya phọ jasū l'ọ kaẹbe mma ree.”

²⁰ “Ọ -būru l'ọ nweru onye chiru ohu iya iphe; m'ọ bū ohu iya kẹ nwoke; ọzo kẹ nwanyị; ohu ono shi l'iphe ono, e chiru iya ono nwūhu; g'a nūkwaa onye ono, chigburu iya nū ono aphū. ²¹ Obenu l'ọ -būru l'ohu ono nọru ujiku ẹbo; ọzoo ẹto bya ewekoro; g'ọ tọ dūkwa iphe, ee-me onye chiru iya iphe; eshinu ohu ono bū ẹku iya bẹ ọ bū.”

²² “Ọ -būru l'ọ nweru unwoke, alwū ọgu; ẹphe meka nwanyị, dū ime iphe; mee k'ọphu ẹpho lūfuru iya; ọphu ọ dūdu ẹka a kwatarū meka iya iphe ọzo; g'e retakwaa onye ọphu mekarū iya iphe ọbu nre lẹ g'ọdu ji nwanyị ono ree; waa gẹ ndu-ikpe kpeburu. ²³ Obenu; ọ -būru

l'e mekaru iya iphe shii; gẹ ndzụ laaru ndzụ; ²⁴ g'ẹnya laaru ẹnya; eze alaaru eze; ẹka alaaru ẹka; ọkpa alaaru ọkpa. ²⁵ Ọ -bụru ọku bẹ ọ hụru iya; l'a hụlata iya. Teke o mefuru iya ọnyá l'ẹhu; l'e melata iya. Teke o tsuru mkpụkpu-mee ye iya l'ẹhu; l'e tsukwarụpho mkpụkpu-mee ye yẹbedua l'ẹhu.”

²⁶ “Ọ -bụru l'o nweru onye chiru ohu iya iphe l'ẹnya; k'ọphu o chipyaru iya ẹnya lanụ; g'onye ono hakwaa ohu ono g'ọ laa; je enweru onwiya; g'ọ bụru ụgwo ẹnya ono, o chipyaru iya ono. ²⁷ Ọ -bụru l'o chikwofuru iya eze lanụ; g'ọ hakwaa ohu ono g'ọ laa je enweru onwiya; g'ọ bụru ụgwo eze iya ono.”

²⁸ “Ọ -bụru l'oke-eswi gude mpu dụ-gbua nemadzụ; g'a tugbua eswi ono lẹ mkpuma; tẹme g'a ta takwa anụ iya atata; ọle g'ọ tọ dụkwa iphe, ee-me onye nwe iya nụ. ²⁹ Obenu; ọ -bụru l'oke-eswi ọbu eme ẹna; e pfuhawaru iya onye nwe iya nụ; ọphu ọ tọ kpọ-chiduru iya l'ọka; ọo ya bụ; ọ -bụru l'ọ dụ-gburu nemadzụ; l'a tugbua eswi ono lẹ mkpuma; onye nwe iya nụ alaa l'ọchi onye ọ dụ-gburu. ³⁰ Ọle ọ -bụru l'ọ dụ ndu ono g'ẹphe gbuaru onye nwe eswi ono nre; g'ọ pfụkotakwa iphemiphe, e gbuburu iya; shi nno gbata onwiya. ³¹ Ekemu ono bụkwapho iphe lanụ m'ọ -bụru l'oke eswi dụ-gburu nwokoro; ọzoo nwamgboko. ³² Ọ -bụru l'oke-eswi ono bẹ dụ-gburu ohu; g'onye nwe eswi ono pfula onye nwe ohu ono okpoga mkpọla-ọchaa, ẹrwa iya rwuru ụkporo shẹkelu lẹ shẹkelu iri; tẹme l'a tų-gbukwaapho eswi ono lẹ mkpuma.”

³³ “Ọ -bụru lẹ nemadzụ kpufuru iphe lẹ nsụ; ọzoo l'onye ono tųru nsụ; ghebe ọnu; oke-eswi; ọzoo nkapfụ-igara je adalahụ iya; nwụhu; ³⁴ g'onye nwe nsụ ono pfulkwaa ụgwo anụ ono. Mbụ-a; g'onye ono pfulkwaa

onye nwe anụ phọ dalahuru lẹ nsụ phọ ụgwọ iya; patawaro ono, nwuhuru nụ ono.

³⁵ “Ọ -bụru lẹ nemadzu bẹ oke-eswi iya dū-gburu oke-eswi onye ọzo; g'umadzu labo ono gbarū mgba ree oke-eswi ophu dzū ndzū; kee aswa iya ẹnya-nhamunha. Ephe ekekwaapho anụ iya ophu nwuhuru anwuhu ẹnya-nhamunha. ³⁶ Ọle ọ -bụru l'onye nwe oke-eswi ono maru l'oke-eswi iya eme ẹnà; ophu ọ tọ kpọ-chiduru iya l'ọka; g'onye nwe oke-eswi ono kpọe onye ophuu oke-eswi ọzo; pata ophu nwuhuru nụ phọ.”

22

Akwaberu ọku ẹnà

¹ “Teke o nweru onye kpuru eswi; ọzo aturu onye ọzo l'oshi; gbua; ọzo l'o reru iya erere; g'o gude eswi ise pfa ụgwọ eswi ono. Ọ -bụru aturu; l'ọ bụru aturu ẹno.

² “Ọ -bụru l'a humaru iphuru l'ẹka ootsukpo ụlo onye ọzo gẹ ya bahu; e meka iya iphe; o shi nno nwuhu; bẹ onye ono, gburu iya nụ ono te egbuduru ọchi. ³ Obenu; ọ -bụru l'iphe ono nwuru g'ẹnyanwu wachaaru bẹ onye chigburu iya nụ gbukwaru ọchi.

“Onye oshi pfufutaje ụgwọ iphe, o zitaru. Teke ọ bụ l'o to nwedu iphe, o nweru; l'e ree yẹbedua l'onwiya; gude aswa iya pfa ụgwọ iphe, o zitaru.

⁴ “Ọ -bụru l'iphe ono, o zitaru ono bẹ a humaru iya l'ẹka; iphe obu ndukwadia ndzū; ọ bụ oke-eswi-o; ọzo nkafu-igara; mẹ aturu; g'onye ono pfa ụgwọ iya mpfukwase.

⁵ “Ọ -bụru lẹ nemadzu chiru iphe-edobe iya ye; o je ataa iphe e meberu l'opfu onye ọzo; ọzo opfu-vayinu onye ọzo; ọzo l'ọ haru iya ẹka; o je ataa iphe e meberu l'opfu onye ọzo; g'onye nwe iphe-edobe ono gude iphe,

kachaa ree, shi l'opfu iya; Ọzoo opfu-vayinu iya; gude pfua onye Ọphuu ugwo iphe iya.

⁶ “Ọ -buru l'oku nahuru laa l'egbudu; k'ophu o tsuru ereshi, e gburu egbugbu; Ọzoo Ọphu pfuru apfuru; Ọzoo l'o tsugburu opfu ono l'ophu; g'onye turu Ọku ono pfua ugwo iya.

⁷ “Ọ -buru l'o nweru onye nuru onye Ọzo okpoga; Ọzoo iphe Ọzo g'o doberu iya; a bya ezita iya l'ulo ibe onye ono; Ọ -buru l'e guderu onye-oshi ono; l'ọ pfua ugwo iya mpfukwase. ⁸ Teke Ọ bukwanu l'e te egudeduru iphuru Ọbu; g'onye nwe ulo ono futa l'ataphu ndu-ikpe; bya egude epha Chipfu gua enwa g'a maru l'ọ to budu iya kpamiru iya. ⁹ Ọ -buru l'ọ duru iphe, taphahuru etaphahu; a huma iya onye ọzo l'eka; mbu iphe, du g'eswi; Ọzoo nkapfu-igara; Ọzoo aturu; Ọzoo iphe eye l'ehu; mbu iphe, bukpo iphe, eenwejeru enweru; l'e duta umadzu labo, adzo iphe ono bya l'ataphu ndu-ikpe. Onye Ọphu ikpe nmaru l'ọ pfua onye Ọphuu mpfukwase.

¹⁰ “Ọ -buru l'o nweru onye kperu onye Ọzo nkapfu-igara; Ọzoo oke-eswi; Ọzoo aturu; mewaro anu ọzo g'o doberu iya; Ọ nwuhu; Ọzoo l'e mekaru iya iphe; Ọzoo l'o taphahuru; Ọphu ọ dudu onye maru iphe, meru iya nu; ¹¹ g'ee-shi doshia opfu ono bu g'onye ono bya l'ataphu Chipfu je agua enwa l'ọ to makwa iphe, meru eku onye Ọphuu. G'onye nwe iya nu kwetakwa nno; g'a ta pfukwa iya ugwo iya. ¹² Ọle Ọ -bukwanuru l'a kparu iya k'iphuru l'ibe onye ono, e doberu iya ono; g'onye ono pfukwaa onye nwe iya nu ugwo iya. ¹³ Ọ -buru l'ọo anu-egbudu gburu iya; l'o wota anu iya Ọphu ọ taphodoru je egoshi; g'a maru l'ọo anu-egbudu gburu iya. G'a ta asukwa g'ọ pfua ugwo iya.

¹⁴ “Ọ -bụru l'o nweru onye rwọtaru iphe-edobe onye ọzo; iphe-ẹhuka meka iya; ọzoo l'ọ nwụhuru teke onye nwe iya nụ ta nọdu l'ẹka ono; g'onye rwọtaru iya nụ pfụkwaa ụgwo iya. ¹⁵ Obenu; ọ -bụru l'onye nwe iya nụ nọ l'ẹka ono teke ono; g'onye jeru arwọta iya nụ ta pfushi ụgwo iya. Teke ọ bụ l'ọ pfuru ụgwo; ngụta eswi ono; g'okpoga ono, a pfuru ono nọ-chiwarọ uburu ọbu.”

Iphe, gbaru l'ememe

¹⁶ “Ọ -bụru l'o nweru onye kparụ nwamgbọko, nwoke teke ejepfuswee; ọphu ọ dudu onye ejewa iya alulu; ẹphe l'iya kwaa; g'ọ kwarụ aswa nụ ndibe phẹ; duta iya je aluru. ¹⁷ Ọ -bụru ẹ nna nwamgbọko ono jikaru sụ ẹ ya te ekedu iya ya; g'ọ kwaakwaphọ aswa, aakwajẹ l'ishi nwamgbọko, nwoke teke ejepfuswee; nụ nna iya.

¹⁸ “Unu ta ahajekwa nwanyi, eme ọmamanshi g'ọ nọdu ndzu.

¹⁹ “Onye jepfuru anụ; ẹphe l'iya kwaa bẹ ee-gbuje egbugbu.

²⁰ “Onye gweru ngweja nụ iphe ọzo, abudu mbẹdua, bụ Chipfu nwẹkinyi mu bẹ ee-gbu egbugbu.

²¹ “Unu ta akpajekwa ndu lwaru alwalwa ẹhu; ọphu unu emejekwa phẹ ewere; noo kẹle unu shi bụru ndu lwaru alwalwa l'alị Ijiputu.

²² “Unu te emejekwa unwanyi, ji phẹ anọedu; waa unwu-ogbee ewere. ²³ Teke unu meru phẹ ewere; ẹphe -wolia olu; raku mube Chipfu bẹ mu a-nụmakwa olu phẹ.

²⁴ Ẹhu a-watakwa mu eghushi eghu ike; mu egude ọgu bya atuko unu gbuẹbe. Unyomu unu aburu unwanyi, ji phẹ anọedu; unwegirima unu aburu ndu enweedu nna.

²⁵ “Ọ -bụru l'unu jieru ndu kẹ mube Chipfu, mkpa byaru ụgwo l'echilabọ unu; unu te emekwa gẹ ndu ejijeje ụgwo-ntukwase. Unu ta asukwa g'ẹphe tukwase iya

iphe. ²⁶ Ọ -buru ẹ nwibe unu yeru unu uwe l'itumo; unu wolaaru iya ya tẹmanu ẹnyanwu arība. ²⁷ Noo kẹle ọo uwe ono bu iphe, oogudeje gbobuta ẹhu iya. ?Buhunu gũnu ẹe oo-gude kuru mgbẹnya? Ọ -raku mube Chipfu ẹe mu a-nụmakwa olu iya. Noo kẹle mu aphuje obu-imemini.

²⁸ “Unu ta anmakwa Chileke phulaphula; ọphu unu ephukwa ndu bu ndu-ishi ali unu iphu.

²⁹ “Unu ta ahakwa egweru mube Chipfu ngweja, shi l'akpuru iphe, unu kpataru l'opfu; waa ọphu shi ẹe mee, unu pyitaru apyita.

“Unu kujeru ọkpara unu nwoke nu mu. ³⁰ Unu mek-waapho eswi unu; waa aturu unu nno. Unu haje phe g'ephe noo l'ehu ne phe ujiku esaa. O -rwua mboku k'esato; unu akputa iya wotaru mu.

³¹ “Unu a-buru ndu duru mu nsọ. Unu ta atajekwa iphe, anu-egbudu gburu. Unu togbojeru iya nkuta.”

23

Ekemu, a turu swibe ikpe, pfuru oto; waa k'obu-imemini

¹ “Ta asujekwa asulasu. Ta agbajekwa ejo ekebe gude eyeru ejo nemadzu eka.

² “Te etsojekwaru igwe-oha ye eka l'eme iphe, adudu ree. Teke i pfuru l'iphu ndu-ikpe; te egudekwa l'iime g'i pfua iphe l'a-du oha ree; woru ikpe nma onye iswi du mma. ³ Te egudekwa ẹe nemadzu bu onye ukpa; gbaaru iya ọdzori l'iphu ndu-ikpe.

⁴ “Ọ -buru l'i humaru oke-eswi; ọzoo nkapfu-igara onye ohogu ngu eka ootuphahwa etuphahu; kputa iya kpu-jeru iya. ⁵ Ọ -buru l'i humaru nkapfu-igara onye i du ashị eka ivu, o vu nyi-tsutaru iya; ta ahakwa iya. Tugbukwaa je eyeru iya eka.

⁶ “Ta jikakwa ekperu onye ukpa ikpe, pfuru o to l'ulo-ikpe. ⁷ G'a ta anmajekwa onye e boru ibo ikpe; teme ophu eemegbukwa onye pfuberekoto, adudu iphe, o meru. Noo kele onye meru ejo-iphe, du nno be mu ta ahadu ge mu ta anma iya ikpe.

⁸ “Ta anatajekwa iphe-uphalazu; kele iphe-uphalazu emejekwa g'a tua enya mkpu l'iphe, e gege ahuma; teme o ndu emeje g'a nmaa onye pfuberekoto ikpe.

⁹ “Unu ta akpajekwa ndu lwaru alwalwa ehu; kele unu maru g'o duje onye lwaru alwalwa; noo kele unu shiwaaburu ndu lwaru alwalwa l'ali Ijiputu.”

Ekemu eswe-atuta-unme

¹⁰ “Apha ishii be unu a-koje ali unu; kpata iya iphe, e meberu iya. ¹¹ O -be l'apha k'esaa; unu ahaa ali ono g'o to dukwa iphe, unu a-ko iya; k'ophu ndu Izurelu ndu ophu akpa nri e-je akpa l'eka ono; teme anu-egbudu erifufuwaro ughudu iya. Unu mekwapho opfu-vayinu; waa egu olivu unu nno.

¹² “Ujiku ishii be unu e-jeje ozi; o -be le mboku k'esaa; unu te ejekwa ozi. Oo ya bu g'oke-eswi unu; waa nkafu-igara unu edzutaje ike; teme waa g'ohu, a nwuru l'ibe unu; m'onye lwaru ibe unu alwalwa a-tutakwapho unme.

¹³ “Unu kwabekwa enya mekota iphemiphe-a, mu pfushiru unu-a. Unu ta adukwa iphe, bu iphe, aagwa agwagwa, unu a-kpo-kuje. Unu te ephotajekwa epha iya ephota ophu.”

Uzo obo-iphe eto

¹⁴ “Ugbo eto l'apha be unu a-bojeru mu obo-iphe.

¹⁵ “Unu bo obo-iphe buredi, ekoduru ekoko. Ujiku esaa be unu a-taje buredi, e yeduru iphe, ekoje buredi, bu iphe, mu turu unu l'ekemu. Unu meje iya teke ono,

aaḅoje Ọbo-iphe ono l'Ọnwa Abibu; noo kẹle ọo l'Ọnwa ono bẹ unu lufutaru l'alì Ijiputu.

“G'o to nwekwa onye a-gbajẹru ẹka bya l'atatiphu mu.

¹⁶ “Unu gudeje mebyi-iphe-mbụ, iphe unu meberu l'alì mītaru; gude bọo Ọbo Mebyi-iphe-mbụ.

“Unu bọo Ọbo-Ìkpù l'ishi apha; mẹ unu metajẹpho iphe, unu meberu l'alì.

¹⁷ “Ugbo ẹto l'apha bẹ unwoke unu g'ẹphe ha a-tụkoje bya l'atatiphu Nnajiuphu, bụ Chipfu.

¹⁸ “Unu ta adukwa iphe, e yekọberu iphe, ekoje buredi, unu e-yekọbe lẹ mee anụ, unu gude egweru mu ngwẹja. Ọphu ọ dukwa ẹba-anụ ono, e gude abọ ọbo-iphe ono, aa-ha g'ọ bọo nchi.

¹⁹ “Iphe-mbụ, vuru ụzo kaa l'opfu unu bẹ unu e-gudeje bya l'ụlo Chipfu, bụ Chileke unu.

“Unu te egudejekwa mini-ẹra ne ẹghu shia nwa iya.”

Ojozi Chileke bẹ a-bọru ndu Ízurẹlu ụzo

²⁰ “Unu hụma lẹ mu e-zi ojozi-imigwe g'o vutaru unu ụzo; eche unu nche; waa g'o dua unu durwua ẹka ono, mu kwakọbewaru akwakọbe ono. ²¹ Unu ngabẹjeru ojozi-imigwe ono nchì; mee iphemiphe, ọ sụru g'unu mee. Unu te kwefukwaru iya ike; kẹle ọ tọo gụkwaru unu nvụ; eshinu ọ bụ ẹpha mu bẹ o gude eje. ²² Ọ -bụru l'unu jikpọerupho obu oyi; ngabẹ nchì l'iphemiphe, o pfuru; bya emekọta iphe, mu sụru g'unu meje; mu abụru ọhogu ndu ọhogu unu; ẹphe adụ mu ashì; mbụ ndu unu dụ ashì. ²³ Ojozi mu e-vuta ụzo duru unu bahụ l'alì ndu Amọru; waa kẹ ndu Hetu; waa kẹ ndu Pérezu; waa kẹ ndu Kénanu; waa kẹ ndu Hevu; waa kẹ ndu Jiebusu; tẹme mu atụkoephondu ono mee g'ẹphe chihu l'alì ono. ²⁴ Unu te ephozejekwaru iphe, bụ iphe, aagwa agwagwa; ọphu unu abajẹkwaru iya ẹja; ophu unu etsojekwaru phẹ mee

omelali phe. Unu mebyishia agwa phe; unu etsukposhia mkpuma, ephe doberu l'oru-ngweja phe. ²⁵ Unu bajeru mube Chipfu, bu Chileke unu eja. Mu e-meru unu iphe-oma le nri waa le mini; bya ewofu iphe-ememe l'echilabo unu. ²⁶ L'ali unu te enwedu nwanyi, ephe bya alufu; ozoo onye ata atsudu ime. Mu e-me g'unu kaje nka okpobe akaka.

²⁷ “Mu e-me g'a tsuje unu ebvu. Iphe, bu ohamoha, unu l'ephe alwu ogu be mu e-meje g'ephe mehu botorii. Mu emee ndu ohogu unu g'ephe ghakobeje; gbaaru unu oso. ²⁸ Mu e-ye evu g'o vuru uzo je je agbaa ndu Hevu; yee ndu Kenu; yee ndu Hetu gbakashia phe g'ephe gbeshiru unu. ²⁹ Ole mu ta achifu-gbudu phe l'apha lanu; noo kele ali ono a-bya buru okorobo-egu; teme anu-egbudu apanukaru iya unu aka. ³⁰ Mu a-tokpoephe nwehu achishi phe; gbiriri jasu unu aka igwerigwe; du ike nwekotaru ali ono.

³¹ “Mu emee g'oke ali unu gbete le Eze-enyimu Uswe-uswe je akpaa l'eze-enyimu ndu Filisitayinu; l'o bya agbe l'echiegu noo jasu l'enyimu Yufuretis. Mu eworu ndu bu l'ali ono ye unu l'aka; g'unu chifu phe l'ataphu unu. ³² G'unu l'ephe; ozoo agwa phe ta agbakwa ndu. ³³ Unu te ekwekwa g'ephe buru l'ali unu; odumeka be ephe akpatakwa; unu emee iphe-eji meswee mube Chipfu. Noo kele unu -baaru agwa phe eja be unu nmalahwakwaru l'onya.”

24

Eme g'ogbandzu nguru anguru

¹ Oo ya bu; Chipfu su Mosisu: “Ge gubedua; waa Eronu; waa Nadabu; waa Abihu; waa ndu bu ogerenya izurelu ukporo umadzu eto l'umadzu iri nyipfuta mube Chipfu; bya anodu uzenya; baaru mu eja. ² Oo Mosisu

nwẹkinyi iya bu onye a-byapfuta mube Chipfu; ge ndu ophuu be ejekwa mu akpitaru ntse; ophu ndu Izurelu etsokwa Mosisu nyikota imeli.”

³ Mosisu bya eje epfukotaru ndu Izurelu iphe, Chipfu pfushiru; waa ekemu iya. Ephe tuko gude olu lanu zu; su: “Iphemiphe, Chipfu pfuru be anyi e-mekota.”
⁴ Mosisu bya atuko iphemiphe, Chipfu pfuru dekota l'ekwo.

O gbeshi l'onmewa utsu; bya akpu oru-ngweja l'okpa ubvu; bya apfube mkpuma iri l'ebo, no-chiru enya okpa-ipfu iri l'ebo ndu Izurelu. ⁵ Oo ya bu; o bya ezia unwokoroby ndu Izurelu; ephe je egwee ngweja-akpo-oku nu Chipfu; bya egbushikwaapho unwu oke-eswi gude gwee ngweja-ehuguu nu Chipfu. ⁶ Mosisu bya ekee mee anu ono ebo woru nanu wuru ye le gbamugbamu; bya ewota ophuu phee l'oru-ngweja. ⁷ O bya ewota Ekwo Ogbandzu ono guaru ndu Izurelu. Ephe zu mgbede su: “Iphemiphe, Chipfu pfuru be anyi e-mekota; mbu l'anyi e-mekotajekpoepho iphemiphe, o pfuru.” ⁸ Mosisu bya ewota mee ono phee ndu Izurelu l'ehu bya asu: “Waa mee, egoshi ogbandzu, Chipfu meru; unu l'ia gbaa le k'opfu, o pfuru-a.”

⁹ Mosisu; yee Eronu; waa Nadabu; yee Abihu; waa ndu bu ogerenya Izurelu ukporo umadzu eto l'umadzu iri bya enyihu eli ubvu ono; ¹⁰ bya ahuma Chileke ndu Izurelu. Iphe, o pfuru l'eli iya buru iphe, e meru le mkpuma, aswa du, bu safaya; o doepho risaa g'akpaminigwe. ¹¹ Ophu o dudu iphe, Chileke meru ndu bu ogerenya Izurelu; ephe huma Chileke; bya eria nri; ngua iphe, aangụ angungu.

¹² Chipfu su Mosisu: “Nyipfuta mu l'ubvu-a bya anodu l'eka-a ge mu nu ngu mkpuma, du bachibachi, mu deru

ekemu; waa iphe, mu sūru g'ẹphe meje, a-nọduje akpọ-ziru phẹ ọzo.”

¹³ Noo ya; Mosisu; yẹ Jioshuwa, bu onye eyejeru iya ẹka gbalihu swiru; je enyihu úbvú Chileke. ¹⁴ Mosisu sū ndu bu ọgerenya ono: “Unu nọdu l'ẹka-a ngabẹru anyi gbiriri jasū teke anyi a-byapfuta unu ọzo. Erọnu yẹ Huru bẹ unu l'ẹphe nọ l'ẹka-a; onye opfu dapfutaru; g'ọ jepfufe phẹ.”

¹⁵ Mosisu nyihuẹpho úbvú ono; urwukpu sọ-kpute iya. ¹⁶ Ogbunwịnwii Chipfu bya atuko úbvú Sayinayi ono sweta. Urwukpu ono nọkota l'úbvú ono ujiku ishii. O be lẹ mbọku k'ẹsaa; Chipfu gbẹ l'urwukpu ono kua Mosisu oku. ¹⁷ Ogbunwịnwii Chipfu ono duẹpho ndu Ízurẹlu g'ọku, enwu enwunwu l'eli úbvú ono. ¹⁸ Mosisu nọdu enyiribẹbaaru l'úbvú ono; ọ nọdu abahụba l'ime urwukpu ono. Ọ nọ l'eli úbvú ono ukporo abalị labọ eswe l'enyashi.

25

Iphe, ee-gude mee ọlo-ẹkwa
(Awu 35:4-9)

¹ Chipfu sū Mosisu: ² “Pfuaru ndu Ízurẹlu g'ẹphe shi l'iphe, ẹphe nweru enweru hata iphe bya anu mu. Iphe, ịi-natajẹ bu iphe, onye gude obu iya wota bya anu. ³ Iphe, ẹphe a-nu bu mkpọla-ododo; waa mkpọla-ọchaa; waa onyirubvu; ⁴ waa owu urwukpu-urwukpu; waa ọphu eke mee-mee; waa ọphu du uswe-uswe; waa ọkpobe owu ọchaa; waa ẹji eghu; ⁵ waa akpọ ebili, a tsẹru l'uswe; waa akpọ umoro-ẹnyimu; waa oshi akeshu; ⁶ waa manu olivu, ee-gudeje anwu ọku; waa iphe, eeyeje lẹ manu k'awu l'ishi g'ọ shia mkpọ; mẹ ọphu eeyeje l'ụnwù-isensu g'ọ shia kwẹkweekwee; ⁷ waa mkpuma ónikùsù;

mewaro mkpuma ozo, aswa dugbaa. Mkpuma ono be ee-mechaa gbapyabe l'uwe-ukuvu onye-ishi ndu-uke; yele uwe-okpoma iya.

⁸ “Pfuaru phe g'ephe kpuaru mube Chipfu ulo, du nsq; ge mu eburu l'echilabo phe. ⁹Unu mekwa ulo-ekwa ono; yee iphemiphe, a-nodukota l'ime iya g'o dūepho ge mu e-goshi unu g'e mee ya.”

Okpoko Ogbandzu

(Awu 37:1-9)

¹⁰ “G'ephe gudekwa oshi akesha kua okpoko. G'ogologo iya du nkwo-eka labo le mkipirikpu iya. Osa iya adu nkwo-eka lanu le mkipirikpu iya. Eli iya adukwapho nkwo-eka lanu le mkipirikpu iya. ¹¹ L'i wua okpobe mkpola-ododo l'ime iya; waa l'azu iya. L'i gudekwapho mkpola-ododo wu-pee mgbureku iya mgburugburu. ¹² L'i kputa echi mkpola-ododo eno depfubegbaa l'okpa iya ephen'eno; mbu g'i wota ebo depfube l'ibe lanu; wota ebo k'ophuu depfube l'ibe iya ophuu. ¹³ L'i gude oshi akesha pyita mgboro labo; wua ya mkpola-ododo. ¹⁴ L'i woru mgboro ono ephenebo pyochaa l'echi ono, e depfubegbaaru le mgbureku okpoko ono g'o buru iphe, ee-gudeje apa iya. ¹⁵ Mgboro ono a-noduwaro l'echi okpoko ono. G'e te wofubaekwa iya ewofu. ¹⁶ L'i woru iphe, e deru ekemu mube Chipfu, bu iphe, mu e-mechaa nu unu dobe l'ime okpoko ono.

¹⁷ “L'i gude okpobe mkpola-ododo meta opfu okpoko; eka aapfuje ugwo iphe-eji, nemadzu meru. G'ogologo iya du nkwo-eka labo le mkipirikpu iya. Osa iya adu nkwo-eka lanu le mkipirikpu iya. ¹⁸ L'i gude mkpola-ododo mee chierobu labo, a-noduchaa l'ishi opfu okpoko ono. G'o buru mkpola-ododo, e tsusaru etsusa be ii-gude mee ya. ¹⁹ L'i woru chierobu lanu dobe l'ishi ibe lanu;

woru ophuu dobe l'ishi iya ophuu. L'i mee gẹ chierobu labo ono, nogbaa l'ishishi okpoko ono ephenebo yele okpoko ono buru iphe lanu. ²⁰ Chierobu ono be ee-me g'o jashia nkù l'uzo imeli; k'ophu nkù iya ono e-kpuchite opfu okpoko ono. G'ephe ghagbabe iphu tuko lee enya l'eli okpoko ono kwapho. ²¹ L'i wota opfu okpoko ono kpuchia ya; woru iphe ono, e deru ekemu mu ono, bu iphe, mu e-mechaa nu unu ono; yekwapho l'ime okpoko ono. ²² O buru l'eli opfu okpoko ono; mbu le mgbaka chierobu labo ono, no l'eli okpoko ono, bu iya bu aka ono, e doberu iphe, e deru ekemu mu ono be mu a-byapfuta ngu bya akaru ngu iphemiphe, ndu izurelu e-meje.”

Teburu ono

(Awu 37:10-16)

²³ “Gude oshi akesha meta teburu. G'ogologo iya du nkwo-eka labo. Osa iya adu nkwo-eka lanu. Eli iya adu nkwo-eka lanu le mkpirikpu iya. ²⁴ L'i wua ya okpobe mkpola-ododo; bya egudekwapho mkpola-ododo wu- phee le mgbureku iya mgburugburu. ²⁵ L'i wota werere oshi, Osa iya ha g'obochi-eka wu- phee mgbureku iya mgburugburu; bya egudekwapho mkpola-ododo ku- phee oshi ono. ²⁶ Kputa echi mkpola-ododo eno dep- fubegbaa le mgbureku okpa teburu ono. ²⁷ Echi ono a- no-kubechakwaa werere oshi pho; k'ophu oo-dukwanu ike gudeshia mgboro, ee-gudeje apa teburu ono. ²⁸ L'i gude oshi akesha pyishia mgboro ono; wua ya mkpola- ododo g'o buru mgboro, ee-gudeje apa teburu ono. ²⁹ L'i gude okpobe mkpola-ododo meshia gbamugbamu; waa ite; waa okoro; me nkweka ee-gudeje gweeru mu ngweja- me. Iphemiphe ono bu iphe, aa-tu-kobeje l'eli teburu ono. ³⁰ G'e dobeje buredi l'iphu mu. O buru l'eli

teburu ono be aa-tu-kobeje iya; k'ophu o-oduje l'iphu mu tekenteke.”

Iphe, aapfubeje oroku

(Awu 37:17-24)

³¹ “Gude okpobe mkpola-ododo, e tsusaru etsusa mee iphe, aapfubeje oroku. Mee ya g'o nweru oshi; waa ekali. L'o nweru ochi; nweru nkwo iya; nweru iphe, du ge nwopu okoko; waa iphe, du g'okoko, jawaru ajaja. Tukokwa iphemiphe ono mee ge yele iphe ono, aapfubeje oroku ono dzepfua buru nanu. ³² Oshi iya ono e-nweru ekali ishii. G'ekali eto nodu le mgbureku iya lanu; eto k'ophuu anodu le mgbureku iya ophuu. ³³ G'ekali iya lanu nwejeru okoro eto. Okoro ono be ee-mechaa g'o dugbaa g'okoko oshi alumundu. L'e mekwaapho nwopu okoko ye iya; yee okoko ophu jawaru ajaja. Noo g'oo-dukota l'ekali iya ono ephe n'ishii, dzepfugbaaru l'oshi iya ono. ³⁴ G'oshi iya ono nwekwaru okoro eno, e meru; o du g'okoko oshi alumundu. L'o nwekwarupho iphe, e meru; o du ge nwopu okoko; yee iphe, du g'okoko ophu jawaru ajaja. ³⁵ Nwopu okoko lanu be ee-me g'o nodu le mkpula ekali iya labo ono, no l'uzo ali iya. K'ebo anodu le mkpula ekali iya labo k'uzo eli. Mbui l'oo-noduchaa le mkpula ekali iya ono ephe n'ishii. ³⁶ Nwopu okoko iya ono; yee ekali iya ekali iya ono be ee-me ge yele oshi iya toko dzepfuru. O buru okpobe mkpola-ododo, e tsusaru etsusa be ee-gude mee ya.

³⁷ “L'i bya emeta oroku esaa pfubegbaa l'eli iphe ono, aapfubeje oroku ono. G'e dobekwa iya k'ophu iphoro iya a-ngakotaje iphu eka o no. ³⁸ Akpaa ya; waa iphe, aagujeru oku iya ye bukwa okpobe mkpola-ododo be ee-gude mekwa ya pho. ³⁹ Iphe, aapfubeje oroku ono; yee

ngwa iya g'ọ hakọta bu ọkpobe mkpọla-ododo, ẹrwa iya du talentu lanu be ee-gude mee ya. ⁴⁰ Letakwa ẹnya g'e mee iphemiphe ono g'ọ du g'e goshiru ngu iya l'eli úbvú ono.”

26

Mkpù-ẹkwà

(Awu 36:8-38)

¹ “Ọzoo bu ẹ-a; ii-meta ọlo-ẹkwa. Gude owu ọchaa, a swiru ọdo; waa ọphu du urwukpu-urwukpu; waa ọphu du uswe-uswe; yee ọphu eke mee-mee; kwee ẹkwa kweta iya upfu ẹkwa iri. G'onye maru eme ọna gude owu ono kwee chierobu ye l'upfu ẹkwa ono. ² G'upfu ẹkwa ono tukurwa haru ẹnya nhamunha. G'ogologo iya du nkwo-ẹka ukporo l'esato. Ọsa iya adu nkwo-ẹka eno. ³ L'i wota upfu ẹkwa ono ise gbagbabe g'ọ buru nlochiru lanu; l'i wotakwapho ọzo ise ọphuu gbagbabe nanu. ⁴ Nlochiru iya ono ke mbu be ii-gude owu, du urwukpu-urwukpu yeshia ya nkoloba l'igburonu upfu ẹkwa iya ono k'ikpazu. L'i bya emekwaapho nno l'upfu ẹkwa k'ikpazu ẹ nlochiru iya k'ẹbo. ⁵ Nkoloba ukporo labo l'iri be ii-ye l'ishishi nlochiru lanu; l'i yekwapho nkoloba ukporo labo l'iri l'ishishi nlochiru lanu ọphuu. Nkoloba ono atuko ghababe iphu. ⁶ Gude mkpọla-ododo meta iphe, kweru nko ishi labo ọzo ukporo labo l'iri. L'i gude iya dzegbabe nlochiru ẹkwa ono ẹphenebo g'ọ tuko buru nanu.

⁷ “L'i bya egude ẹji eghu kwee ẹkwa; kweta iya upfu ẹkwa iri ẹ nanu, ee-gude phu-chite eli ọlo-ẹkwa ono. ⁸ G'upfu ẹkwa ono ẹphe n'iri ẹ nanu tukurwa haru ẹnya nhamunha. G'ogologo iya du nkwo-ẹka ukporo l'iri. Ọsa iya adu nkwo-ẹka eno. ⁹ L'i bya achita upfu ẹkwa ono ise gbagbabe g'ọ buru nlochiru lanu; chita

ụzo upfu ẹkwa ishii ọphuu gbagbabekwapho nanu. Upfu ẹkwa lanu ọphu meru nlochiru lanu; ọ du upfu ishii pho be ii-pyaji ẹbo dobe g'o gboru l'ataphu ulo-ekwa ono. ¹⁰ Nkoloba ukporo labo l'iri be ii-ye l'ishishi nlochiru lanu; l'i yekwapho nkoloba ukporo labo l'iri l'ishishi nlochiru lanu ophuu. ¹¹ L'i gude onyirubvu meta iphe, kweru nko ishi labo ụzo ukporo labo l'iri. L'i gude iya kotagbaa nkoloba nlochiru ẹkwa ono ephenebo; gude iya dzegbabẹ ulo-ekwa ono g'o buru nanu. ¹² A bya l'upfu ẹkwa, tsufuru l'ulo-ekwa ono; mbu nkeru-ẹbo upfu ẹkwa ono be ee-me g'o wu-zeta l'azu ulo-ekwa ono. ¹³ Nlochiru upfu ẹkwa ono, e gude phu-chite nlochiru k'ime iya pho be e-gudekota nkwo-eka lanu ka k'ime iya pho osa le mgbureku iya ibekẹboebo. Ndu k'ono be aa-ha g'o wu-zeta l'uzo ali iya g'e gude iya kwechia mgbureku iya. ¹⁴ L'i wota akpo ebili, a tseru l'uswe mee iphe, ee-gude phu-chia eli ulo-ekwa ono ozo. L'i bya egudekwapho akpo umoro-enyimu mee iphe, ee-gude kwechite eli akpo k'ebili ono.

¹⁵ “Gude oshi akesha metachaa oshi, ee-gudeje kpobe ulo-ekwa ono. ¹⁶ Oshi ono be aa-ruchaa g'o dugbaa nkwo-eka iri l'eli. Osa iya adu nkwo-eka le mkipirikpu iya. ¹⁷ Oshi ono be aa-pyitachaa okpa labo ye l'ibekẹboebo. O buru egube ono be ii-mekota oshi ulo-ekwa ono g'o ha. ¹⁸ A bya l'ulo-ekwa ono ibiya ophu gharu iphu l'uzo ohali; bu ukporo oshi be ii-ruta yegbaa ya. ¹⁹ L'i gude mkpola-ochaa meshia enya eka aakpogbaaru okpa oshi ono ye. L'i meta iya ụzo ukporo labo. Iphe, bu oshi ono g'o ha e-nweru enya eka labo, aa-kpokeru okpa iya ye. ²⁰ A bya l'ibiya ophuu; mbu ibiya ophu gharu iphu l'uzo isheli; bukwapho ukporo oshi be ii-ruta; yeshia ya. ²¹ Gude mkpola-ochaa meshia enya eka aakpogbaaru okpa oshi ono ye. L'i meta iya ụzo

̀kporo labo. Iphe, bu oshi ono g'o ha e-nweru enya aka labo, aa-kporeru okpa iya ye. ²² A bya l'okotazu ulo-ekwa ono; mbu ibiya ophu gharu iphu l'uzo enyanwuariba bu oshi ishii be ii-ruta; yeshia ya. ²³ L'i metachaa oshi ebo ebo; yechaa le mgbureku mgbureku ulo-ekwa ono l'uzo okotazu iya ono. ²⁴ Oshi labo ono, ee-yechaa le mgbureku iya ono be a-dugbaa nkwegba ebo ebo. Oo-shi l'uzo ali du nkwegba ebo jasul'imeli. Teme o buru echi lanu be aa-kube iya. Ephenebo a-tuko dukota nno. ²⁵ Oo ya bu l'oo-du oshi esato l'uzo okotazu ulo-ekwa ono. L'e gude mkpola-ochaa meshia enya aka aa-kporgbaaru okpa oshi ono ye uzo iri l'ishii. Iphe, bu oshi ono g'o ha e-nwegbaarul' enya aka labo, aa-kporeru okpa iya ye.

²⁶ “Gude oshi akesha rwashia oshi, dugbaa gberere, ee-gude swebushia l'oshi ono. Uzo ise be ii-swebe l'oshi mgbureku ulo-ekwa ono ibe lanu; ²⁷ l'i swebekwapho uzo ise ozo le mgbureku ibe iya ophuu. Uzo ise ozo aburu k'okotazu ulo-ekwa ono; ibiya ophu gharu iphu l'uzo enyanwuariba. ²⁸ Oshi ophu ee-swebe l'echi iya be aa-rwa g'o gbela'ishi lanu lufu l'ishi iya ophuu. ²⁹ L'i wukota mkpola-ododo l'oshi ono, eegudeje kpobe ulo-ekwa ono. L'i gudekwapho mkpola-ododo meshia echi, e-gudeshigbaa oshi ono, dugbaa gberere ono. Teme l'i wukwapho mkpola-ododo le gberere oshi ono.

³⁰ “Rukwaa ulo-ekwa ono g'a turu ngu onu iya l'eli ubvu Sayinayi.

³¹ “L'i gude owu, du urwukpu-urwukpu; waa ophu du uswe-uswe; waa ophu eke mee-mee; yee owu ochaa, a swiru udo; kwee ekwa. G'onye maru eme ona gudekwa owu ono kweshia chierobu ye l'ekwa ono. ³² L'i gude oshi akesha rwa itso eno; wua ya mkpola-ododo. L'i woru

itso ono kpɔbechaa l'ɛnya ɛka e meshiru lɛ mkpɔla-ɔchaa. L'i gude iphe, kweru nko, e gude mkpɔla-ododo mee kobe ɛkwa ono l'itso ono ³³ lɛ mkpula iphe phɔ, kweru nko ishi labɔ phɔ, e gude dzegbabɛ nlɔchiru ɛkwa phɔ, e gude phɔ-chite eli ɔlo-ɛkwa ono. L'i woru okpoko-ekemu ono sɔbe l'ɛka ono, e kobutaru ɛkwa ono. ɛkwa ono bɛ ee-gude kekahaa ɛka-du-nsɔ; yɛle ɛka-kakɔta-adu-nsɔ. ³⁴ L'e woru opfu okpoko ono, bu ɛka aapfɔje ugwo iphe-ɛji, nemadzɔ meru ono; kpube l'eli okpoko-ekemu ono, a sɔberu l'ɛka-kakɔta-adu-nsɔ ono. ³⁵ L'i pata teburu phɔ sɔbe l'iphu ɛkwa ono, e gude kobuta ɛka-kakɔta-adu-nsɔ ono. ɛka aa-sɔbe iya bu l'ime ɔlo-ɛkwa ono l'ibiya ɔphu gharu iphu l'uzo isheli. L'i woru iphe phɔ, aapfɔbeje orɔku phɔ sɔbe l'ibiya ɔphu gharu iphu l'uzo ndɔhali; g'ɛphe lɛ teburu phɔ ghagbabɛ iphu.

³⁶ “G'onye gude ngga ekwe ɛkwa gude owu, du urwukpu-urwukpu; waa ɔphu eke mee-mee; waa ɔphu du uswe-uswe; yɛe owu ɔchaa, a swiru ɔdo; kwee ɛkwa, ee-gudeje kochite ɔnu-abata ɔlo-ɛkwa ono. ³⁷ L'i gude mkpɔla-ododo meshia iphe, kweru nko, ee-gude kobe ɛkwa ono l'itso. L'i gude oshi akesha rwata itso ise; wɔkwaa ya phɔ mkpɔla-ododo; gude onyirubvu kpɔshia ɛnya ɛka aa-kpɔbegba itso ono ɛphe n'ise.

27

Oru-ngwɛja-akpɔ-ɔku

(Awu 38:1-8)

¹ “Gude oshi akesha rɔta ɔru-ngwɛja. G'eli iya du nkwo-ɛka ɛto. G'ogologo iya waa ɔsa iya tɔkokwa haru ɛnya nhamunha. Iphe, ɔo-duchaa bu nkwo-ɛka ise ise. ² L'i rɔtachaa mpu mobechea l'ishi ishi mgbureku iya ɛphen'eno. Gɛ mpu ono; yɛe ɔru-ngwɛja ono rwagbak-waa buru nanu. I -mechaa ya nno; l'i woru onyirubvu

wua ya. ³ L'i gude onyirubvu meshia iphemiphe, eegudeje eje ozi l'Oru-ngweja ono, bu iya bu ite ekpo ntụ; waa iphe, eegudeje ekpo ntụ eye l'ite ono; waa gbamugbamụ; waa oji; mę iphe, aaguje oku. ⁴ L'i gude onyirubvu meta iphe, dụ nggafu-nggafu g'ugbu; bya enweru mgburęku ęno. L'i gudekwapho onyirubvu meta echi ęno hebechaa lę mgburęku iphe ono. ⁵ L'i wota iphe ono kwechia ụzo alị mgburęku oru-ngweja ono. G'a gbę l'uzo alị iya kwechia ya jasụ l'echilabọ iya. ⁶ L'i gude oshi akesha pyita mgboro labo, ee-gudeje apa iya. L'i wukwapho mgboro ono onyirubvu. ⁷ L'e wochaaru mgboro ono nwua l'ęnya echi pho ibekęboebo. Mgboro ono ęphenebo a-nodujecha lę mgburęku iya ęphenebo mę a -nodu apa iya. ⁸ Gudekwa ibiribe oshi mee oru-ngweja ono g'uzo dụ iya l'echi. Mee ya g'ọ dụ gę mu goshiru ngu iya l'eli ńbvú ono.”

Ọma-unuphu ono

(Awu 38:9-20)

⁹ “Meeru ńlo-ękwa ono ọma-unuphu. Gude owu ọchaa, a swiru ụdo; kwee ękwa, dụ ụkporo nkwo-ęka ise l'ogologo; g'e gude gebuta ibiya ọphu ọma-unuphu ono gharu iphu l'uzo ndohali. ¹⁰ L'i gude onyirubvu meta ụkporo itso, aa-kpọbe iya; yę ęnya ęka aa-kpọbechaa itso ono. L'i gude mkpọla-ọchaa meshia iphe, kweru nko, ee-gude kobe ękwa ono l'itso ono; yę iphe, ee-swebe l'itso ono. ¹¹ Ụzo isheli iya bukwapo ękwa, dụ ụkporo nkwo-ęka ise l'ogologo bę ee-kwe; gude gebuta iya. Itso, aa-kpọbe l'uzo isheli ono; yę ęnya ęka aa-kpọbe itso ono a-duchaa ụkporo ụkporo. Ọ bukwarupho onyirubvu bę ee-gude metachaa ya. Ọ bukwanuru mkpọla-ọchaa bę ee-gude meshia iphe, kweru nko, ee-gude kobe ękwa ono l'itso ono; yę iphe, ee-swebe l'itso ono.

¹² “A -bya l'osa ɔma-unuphu ono l'uzo ɛnyanwu-ariba iya; bukwa ɛkwa, du ukporo nkwo-ɛka labo le nkwo-ɛka iri l'ogologo be ee-kwe; gude gebuta iya. G'e meta itso iri, aa-kpobe l'uzo ɛnyanwu-ariba ono; metakwapho ɛnya ɛka aa-kpobechaa itso ono uzo iri. ¹³ Osa ɔma-unuphu ono l'uzo ɛnyanwu-awawa iya a-dukwapho ukporo nkwo-ɛka labo le nkwo-ɛka iri l'ogologo. ¹⁴ L'e kwee ɛkwa, du nkwo-ɛka iri l'ise l'ogologo; gude gebuta aguga ɔnu-abata ɔma-unuphu ono ibe lanu. Itso, aa-kpobe iya; yee ɛnya ɛka aa-kpobechaa itso ono a-duchaa eto eto. ¹⁵ A -bya l'eka aguga ɔnu-abata ɔma-unuphu ono ibe iya ɔphuu; bukwapho ɛkwa, du nkwo-ɛka iri l'ise l'ogologo be ee-kwe; gude gebuta iya. Itso, aa-kpobe iya; yee ɛnya ɛka aa-kpobechaa itso ono a-duchakwapho eto eto.

¹⁶ “L'e gude owu, du urwukpu-urwukpu; waa ɔphu eke mee-mee; waa k'uswe-uswe; yee owu ɔchaa, a swiru udo; gude kwee ɛkwa, du nkwo-ɛka ukporo l'ogologo; gude gebuta ɔnu-abata ɔma-unuphu ono. G'o bukwaru onye maru egude ngga kwee ɛkwa be e-me iya nu. ɔnu-abata iya ono be ee-metaru itso eno; waa ɛnya ɛka aa-kpobechaa itso eno ono. ¹⁷ Iphe, ee-swebegbaa l'itso, ee-gude kpobuta ɔma-unuphu ono mgburugburu; yee iphe, kweru nko, ee-gudechaa kobe ɛkwa ono l'itso ono bukota mkpola-ochaa be ee-gude meta iya. Tememe ɛnya ɛka aa-kpobechaa itso ono be ee-gude onyirubvu mekota. ¹⁸ ɔma-unuphu ono a-du ukporo nkwo-ɛka ise l'ogologo; du ukporo nkwo-ɛka labo l'iri l'osa. Ee-gude ɛkwa, e kweru l'owu ɔchaa, a swiru udo; gebuta iya. Eli ɛkwa ono a-du nkwo-ɛka ise. Tememe l'a wukota onyirubvu l'ɛnya ɛka aa-kpobechaa itso iya. ¹⁹ Iphemiphe ozo, ee-gudejekpo eje ozi l'ulo-ɛkwa ono; m'obeta o buru gunu be e gude iya eme; je akpaa le nggu, ee-libegbaa eri ulo-

ekwa ono; mekwapho k'oma-unuphu ono; be ee-gude onyirubvu mekota.”

Manu oroku ono
(Uke 24:1-4)

²⁰ “Pfuaru ndu Izurelu g'ephe wotaru ngu okpobe manu olivu, a tsuru l'ikwe, ee-yeje l'oroku; g'oku oroku ono nwuje mkpulumkpuru. ²¹ Ge Eronu; yele unwu iya yeje oku l'oroku ono l'ataphu Chipfu l'ime ulo-ekwandzukono; mbu l'okotazu ekwa pho, e gude kobuta okpoko-ekemu pho. G'ephe mejekwa oroku ono g'o shije l'uzenyashi nwuje jasu l'utsu. Ge ndu Izurelu dobekwa ekemu-a; a -gbu l'ogbo sweru ogbo.”

28

Uwe ndu-uke
(Awu 39:1-7)

¹ “G'e shi l'echilabo ndu Izurelu dufutaru ngu nwune ngu, bu Eronu; yele unwu iya, bu Nadabu; ye Abihu; waa Eleyaza; ye Itama; g'ephe buru ndu-uke; jejeru mu ozi. ² L'a kwaru nwune ngu, bu Eronu uwe, du nsu; g'e shi nno mee ya g'o du akpabiri l'enya; k'ophu aakwabeye iya ubvu. ³ Pfuaru ndu maru eme ona; mbu ndu mu meru g'ephe nweru mmamiphe g'ephe maru eme iphe, du nno; g'ephe kwaru Eronu uwe, ee-gude doo ya nsu; k'ophu o-buru onye uke; jejeru mu ozi. ⁴ Wakwa egube uwe, ephe a-kwagbaaru iya bu owa-a: uwe-okpoma; ye uwe-ukuvu; waa uwe-mgbalanu; ye uwe ime-ehu; waa okpu-ekwa; ye ekwa-atu-butal'upfu. G'ephe kwaru nwune ngu, bu Eronu; waa unwu iya; uwe ono, du nsu; k'ophu ephe a-buru ndu-uke; jejeru mu ozi. ⁵ Iphe, ephe e-gude kwee ekwa uwe ono

bụ owu, e meru lẹ mkpọla-ododo; yẹe owu, dụ urwukpu-urwukpu; waa ọp̄hu eke mee-mee; waa k'uswe-uswe; yẹe owu ọchaa, a swịru ụdo.

Uwe Ukuvu
(Awu 39:2-7)

⁶ “G'onye maru eme ọna gude ẹkwa, e kweru l'owu mkpọla-ododo; waa owu, eke urwukpu-urwukpu; waa ọp̄hu eke mee-mee; waa k'uswe-uswe; waa k'ọchaa, a swịru ụdo; kpaa uwe-ukuvu. ⁷ G'a kwaa uwe ukuvu ono; woru wẹrere ẹkwa labọ yechaa ya l'ishi ukuvu iya ibe ẹka ẹbo. L'e gudeje wẹrere ẹkwa ono ẹphenebo lita k'atatip̄hu yẹe k'azụ. ⁸ L'e kwekwaphọ wẹrere ẹkwa, ee-gudeje tū-but̄a iya l'up̄fu ye iya. Wẹrere ẹkwa ono bẹ yẹe uwe-ukuvu ono a-tụko b̄uru iphe lan̄. Iphe, ee-gude kwaa ya bụ owu, e meru lẹ mkpọla-ododo; yẹe owu, dụ urwukpu-urwukpu; waa ọp̄hu eke mee-mee; yẹe k'uswe-uswe; yẹe owu ọchaa, a swịru ụdo.

⁹ “Wota mkpuma ónikùsù labọ; deshia ẹpha ụnwu Ízurẹlu l'eli iya. ¹⁰ Deshia ẹpha ono lẹ g'e gude nwushia phẹ. Ẹpha ishii bẹ ii-de lẹ mkpuma lan̄. L'i dee ẹpha ishii ọp̄huu lẹ mkpuma k'ọp̄huu. ¹¹ Ọo g'onye apyije mkpuma, vu oke aswa akashije iya ẹpha; gude mee ya iphe-ọhubama-a bụ g'ìi-kakọta ẹpha ụnwu Ízurẹlu l'ophu l'eli mkpuma labọ ono. L'ì w̄a mkpọla-ododo l'igburọnu mkpuma ono mgburugburu. ¹² L'ì dzụpyabe mkpuma labọ ono l'eli uwe-ukuvu phọ ẹphenebo; k'ọp̄hu m̄be Chipfu e-gudeje iya nyata ụnwu Ízurẹlu. Ẹpha ụnwu Ízurẹlu ono a-d̄u l'ukuvu Erọnu ẹphenebo g'ọ b̄uru iphe, mu e-gudeje nyata phẹ. ¹³ L'ì w̄a mkpọla-ododo l'igburọnu mkpuma ono. ¹⁴ L'i gude owu ọkpobe mkpọla-ododo swịta ụdo gwọgirigwo labọ. L'i

woru gwogirigwo ono ephenebo lipfubechaa le mkpola-ododo ono, a wuru l'igburonu mkpuma ono.”

Uwe-Okpoma

¹⁵ “G'onye maru eme ona kwee uwe-okpoma, ee-gudeje achọ iphe, bu uche mube Chipfu. G'e gude iphe ono, e gude kwee uwe-ukuvu ono kwee ya, bu iya bu owu, e meru le mkpola-ododo; yee owu, du urwukpu-urwukpu; yee ophu eke mee-mee; waa k'uswe-uswe; waa owu ocha, a swiru udo. ¹⁶ G'e kwekwaa ya g'o nweru mgburuku eno; du nkwegba labo. Ge mgburuku iya ono ephen'eno tukokwa haru enya nhamunha. G'ogologo iya du nkwo-eka lanu; osa iya adukwapho nkwo-eka lanu.

¹⁷ “Dzupyabe mkpuma, vu oke aswa g'ọ kpọ giriri ọzo eno l'ekwa ono. Mkpuma, a-nodu l'ogiri ke mbu bu rubi; yee topazu; waa berilu. ¹⁸ O -be l'ogiri k'ebbo; bu tokwasu; yee safaya; waa emeraludu be ee-do iya. ¹⁹ O -bekwa l'ogiri k'eto; l'e doo ya jiasintu; yee agetu; waa amitisutu. ²⁰ Teke o beru l'ogiri k'eno; l'e doo ya kirisolayitu; yee onikusu; waa jiasupa; l'a wua mkpola-ododo l'igburonu mkpuma ono. ²¹ Iphe, oo-du bu mkpuma iri l'ebbo. G'ephe ha nanu nanu no-chichaa enya unwu izurelu. G'e dechaa epha unwu izurelu ono le mkpuma ono g'ọ du g'iphe-ohubama nochia enya okpa-ipfu iri l'ebbo ndu izurelu.

²² “L'i gude okpobe mkpola-ododo swishia udo gwogirigwo, ee-lipfubegbaa l'uwe-okpoma obu. ²³ L'i gude mkpola-ododo meta echi labo; yechaa l'ishi uwe-okpoma ono. ²⁴ L'i woru gwogirigwo pho libechaa l'echi ono, e yegbaaru l'ishi uwe-okpoma ono. ²⁵ L'e wota ishi gwogirigwo ono ishi iya ophuu lipfubekwapho le mkpola-ododo pho, a wuru l'igburonu mkpuma labo

pho, e lipfuberu l'eli uwe-ukuvu pho. ²⁶ L'i gude mkpola-ododo meta echi labo ozo; lipfube l'ishi uwe-okpoma pho l'uzo ali iya. Lipfubekwa iya l'ime uwe-okpoma obu; ibiya ophu tukoru l'eli uwe-ukuvu ono. ²⁷ L'i gude mkpola-ododo metafua echi labo ozo; libechaa l'ishishi werere ekwa labo pho l'uzo ali iya; mbu werere ekwa ono, e liberu l'eli uwe-ukuvu ono. Libekwa iya l'eli eka ono, a nmaru werere ekwa, a tu-butaru l'upfu uwe-ukuvu ono. ²⁸ Echi k'uwe-okpoma pho be ee-gude eri, e gude owu, du urwukpu-urwukpu swia; libechaa l'echi uwe-ukuvu obu; k'ophu o-nodu le mgboru werere ekwa, atu-buta l'upfu pho; g'uwe-okpoma pho ta nodujeshi aku peepepe l'eli uwe-ukuvu ono.

²⁹ “Oo ya bu; g'o buru teke Eronu abahu l'eka-dunso; epha unwu Izurulu anodu iya l'obu; mbu l'epha ono a-nodu l'uwe-okpoma, eegudeje ach'o iphe, bu uche Chileke; shi nno mee ge Chipfu gudeje iya nyata phe tekenteke. ³⁰ L'i yekobefukwapho ido, Urimu waa Tumimu l'uwe-okpoma obu; g'o tu-kojeru Eronu l'obu l'iphe, bukpoote teke oobya l'atatiphu Chipfu. Noo ge Eronu e-gudeje paru iphe, eegudeje ach'o iphe, bu uche Chileke l'ehu ndu Izurulu bya l'atatiphu Chipfu tekenteke bu ono.”

Uwe ozo, ndu-uke e-yeje

³¹ “Gude ekwa, du urwukpu-urwukpu kwee uwe mgbalanu, ee-yeje uwe-ukuvu ono l'eli iya. ³² Kwekwaa ya g'eka, eepyoje iya ishi nodu iya l'echilabo. L'i swia igburonu iya onu g'eeswije olu uwe-a; g'o to lakahu. ³³ Gude owu, du urwukpu-urwukpu; waa ophu eke mee-mee; yee ophu du uswe-uswe; kpacharu akpuru itorokuma; dophee onu uwe ono mgburugburu. L'i

gudekwapho mkpola-ododo meshia okunmengu dokahaje iya l'echilabo. ³⁴ G'okunmengu mkpola-ododo ono; waa itorokuma ono; no-phekwa igburonu uwe ono mgburugburu. L'e dongakota phe edonga l'onu uwe ono. ³⁵ Ge Eronu yeje iya m'o nodu eje ozi l'ataphu Chipfu; g'o to nwuhu. Oda okunmengu ono be aa-noduje anu m'o nodu abahu l'eka-du-nsu ono; waa m'o lufutashia.

³⁶ "Gude okpobe mkpola-ododo meta iphe, du g'okwekpu; dee ya iphe g'eedeje gude mee iphe-ohubama-a. Iphe, ee-de iya bu: Onye-a duru Chipfu nsu. ³⁷ L'i wota eri, e gude owu, du urwukpu-urwukpu swia; libe l'iphe ono, du g'okwekpu ono; woru iya lipyabe l'ataphu okpu-ekwa pho. ³⁸ Eronu -kpuru okpu-ekwa ono; g'o nodu iya l'egedegee onu-iphu; g'o buru yebedua be oo-tu-koru l'ishi; mbu aturuwu, a aturuwuru iphe, ndu Izurelu doberu Chipfu nsu; m'obeta o buru iphe, du idu-agma be ephe doberu mu nsu obu. Iphe ono, du g'okwekpu ono a-nodujeepho Eronu l'egedegee onu-iphu; g'iphe ono, e doberu nsu ono adukwanu mube Chipfu ree k'anata.

³⁹ "L'i gude owu ocha kwee uwe ime-ehu pho; yee okpu-ekwa pho. G'o bukwaru onye maru egude ngga kwee ekwa be e-me ekwa-atu-buta-l'upfu pho. ⁴⁰ A -bya l'ehu unwu Eronu; kweeru phe uwe-ime-ehu; yee ekwa-atu-buta-l'upfu; waa okpu ndu-uke; g'e shi nno mee phe g'ephe du akpabiri l'enya; k'ophu aa-kwabeje phe ubvu. ⁴¹ I-yechaepho nwune ngu Eronu; waa unwu iya uwe ono; l'i wua phe manu l'ishi; gude mee g'ephe buru ndu-uke. L'i dobe phe iche g'ephe buru ndu-uke; jejeru mu ozi.

⁴² "L'i gude ekwa ocha metaru phe nwiba, ephe e-yeje. G'ephe yeje iya g'o gbephe ephe l'upfu rwua phe l'utapfu. ⁴³ Ge Eronu; yee unwu iya yejekwa nwiba ono m'ephe nodu abahu l'ulo-ekwa-ndzukono;

ozoo l'ephe eje ejeru mube Chipfu ozi l'oru-ngweja, no l'eka-du-nsq; k'ophu ephe tee metadu iphe-uta kpua onwophe; shi nno nwushihu.

“G'ekemu ono dukwaru Eronu; yee awa iya jasū lē tuutuutuu lē mijimiimii.”

29

Edobe ndu-uke nsq

¹ “Waa iphe, ii-me gude dobe phe nsq; k'ophu ephe a-buru ndu-uke; jejeru mu ozi bu owa-a: Kputa nwa oke-eswi lanu; waa ebili labo, enwedu eka ntucha du iya l'ehu; ² l'i gude ukpokutu iphe, e yeduru iphe, ekoje buredi; gude ghee buredi. Hatakwa iya pho gwoo lē manu; gude ghee akara. L'i gudekwa iya pho ghee echambekee, a gbashiru manu. ³ L'i tuko iya gweru ye lē nkata pataru mu; ephe l'oke-eswi pho; yee ebili labo pho. ⁴ E -mechaa nno; l'i duta Eronu; yee unwu iya bya l'onu-abata ulo-ekwa-ndzuko; gude mini wua phe ehū. ⁵ L'i chita uwe ndu-uke pho yee Eronu. Vuru uzo yee ya uwe ime-ehu pho; teme l'i yee ya uwe mgbalanu pho, ee-ye uwe-ukuvu l'eli iya pho. L'i gbē teke ono yee ya uwe-ukuvu ono l'onwiya; mēfua uwe-okpoma pho. L'i gude werere ekwa pho, e kweru g'e gudeje tu-buta uwe-ukuvu ono; gude tu-buta iya. ⁶ L'i wota okpulishi-ekwa pho kpube iya; wota iphe, du g'okwekpu pho, e doberu nsq pho libe l'okpulishi ono. ⁷ L'i wota manū, aawuje l'ishi wua ya l'ishi gude mee ya onye uke. ⁸ L'i duta unwu iya yeshia phe uwe mgbalanu; ⁹ bya ewochaaru okpu ndu-uke kpubegbaa phe l'ishi. L'i wotakwapho ekwa-atu-buta-l'upfu pho; webegbaa Eronu; yee unwu iya l'upfu. Ekemu, mube Chipfu turu phe bukwa g'ephe buru ndu-uke jasū lē tuutuutuu lē mijimiimii. Nokwa g'ii-gude mee Eronu; yee unwu iya g'ephe buru ndu-uke bu ono.

¹⁰ “E -meɛbechaa nno; l'i kpɔta oke-eswi phɔ gude bya l'ɔnu-abata ɔlo-ɛkwa-ndzukɔ ono. Gɛ Erɔnu; yɛɛ ɔnwu iya byabɛ iya ɛka l'ishi; ¹¹ l'i nɔdu l'iphu Chipfu gbua ya l'ɔnu-abata ɔlo-ɛkwa-ndzukɔ ono. ¹² L'i meta mee oke-eswi ono gude mkpɔshi-ɛka ngu tee ya lɛ mpu, nɔgbaa l'ɔru-ngweja ono. L'i woru ɔphu ghuduru nɔ wɔshia l'ɔkpali ɔru-ngweja ono. ¹³ Tuko ɛba, nɔkota l'iphe-ɛpho iya g'ɔ ha heta. L'i bɔtakwapho anya iya; waa akpɔrɔ iya ɛphenebo; yɛɛ ɛba, nɔkota iya nɔ; kpɔo ɔku l'ɔru-ngweja ono. ¹⁴ Anɔ oke-eswi ono; waa akpɔ iya; yɛɛ nshɔ iya bɛ ii-gude je akpɔo ɔku l'azɔ ɛka ndu ɛzɔrɛlu kpɔberu ɔlo-ɛkwa phɛ.

¹⁵ “L'i kpɔta ebili phɔ nanɔ gude bya gɛ Erɔnu yɛɛ ɔnwu iya byabɛ iya ɛka l'ishi; ¹⁶ l'i gbua ya; nakɔbe mee ya; pata mee ya ono phedzuru lɛ mgburɛku ɔru-ngweja ono mgburugburu. ¹⁷ L'i bushia anɔ ebili ono iphiriba iphiriba; chɔta iphe-ɛpho iya; yɛɛ ɔkpa iya; saa asasa. L'i woru iphe-ɛpho iya ono; yɛɛ ɔkpa iya ono; chɔkobe l'ishi iya; yɛɛ iphiriba iphiriba iya phɔ. ¹⁸ L'i tuko anɔ ebili ono g'ɔ ha kpɔo ɔku l'ɔru-ngweja ono. G'ɔ bɔru ngweja, a kpɔru ɔku nɔ Chipfu; mkpɔ iya dɔ iya ree.

¹⁹ “L'i kpɔta ebili ɔphuu gude bya gɛ Erɔnu yɛɛ ɔnwu iya byabɛkwa iya phɔ ɛka l'ishi; ²⁰ l'i gbua ya; harɔ mee ya meta; tee Erɔnu; yɛɛ ɔnwu iya l'atakpa-nchɔ ɛkutara; waa lɛ mkpɔshi-ɛka ezeke-ɛka ɛkutara; waa lɛ mkpɔshi-ɔkpa ezeke-ɔkpa ɛkutara. L'i woru mee ono phedzuru lɛ mgburɛku ɔru-ngweja ono mgburugburu. ²¹ L'i meta mee ono, sɔru l'ɔru-ngweja ono; metakwaphɔ manɔ awɔ l'ishi phɔ phedzuru Erɔnu l'ɛhu; phɛkɔta iya l'uwe iya; phedzukwaru iya phɔ ɔnwu Erɔnu; mɛ l'uwe phɛ. Noo g'ee-shi mee gɛ Erɔnu; yɛɛ ɔnwu iya; waa uwe phɛ; dɔ nsɔ bɔ ono.

²² “Ebili ono bẹ ii-heshikọta ẹba; hetachaa ẹba, dọ l'upfumọdzu iya; waa ẹba, nọkọta l'iphe-ẹpho iya g'ọ ha; bọtakwapho anya iya; waa àkpùrù iya ẹphenebo; yẹ ẹba, nọkọta iya nọ. L'i wota ọtapfu ọkpa ẹkutara iya tųkwase iya. Ebili ono bųkwa ọphu e gude eme Erọnu yẹ ọnwu iya g'ẹphe bųru ndu-uke. ²³ L'i je lẹ nkata ono, e yeru buredi, e gudedu iphe, ekoje buredi ghee ono, nọwaa l'iphu Chipfu ono; hata iya ishi buredi lanų; hatakwapọ ishi akara lanų l'akara ono, a gwọru lẹ manų ghee ono; waa ẹcha-mbekee lanų. ²⁴ L'i tųko iphemiphe ono g'ọ ha dẹ Erọnu; yẹ ọnwu iya l'ẹka g'ẹphe woru iya maa l'atatifu Chipfu g'ọ bųru ngweja-amama. ²⁵ E -mechaa nno; l'i nata phẹ iphemiphe ono; l'i tųko yẹle ngweja-akpọ-ọku phọ kpọo ọku l'ọru-ngweja ono; g'ọ bųru ngweja, a kpọru ọku; nọ Chipfu; mkpọ iya dọ iya ree. ²⁶ E -mechaa; l'i wota ñdú ebili ono, e gude mee Erọnu g'ọ bųru onye uke ono; woru maa l'iphu Chipfu g'ọ bųru ngweja-amama. Ono a-bųru oke iya nkengu.

²⁷ “Anų ebili ono, e gude mee Erọnu g'ọ bųru onye uke ono bẹ ii-do nsọ; mbų ẹka ono, rwuberu Erọnu; yẹ ọnwu iya ono, bų iya bų ñdú iya phọ, a màru amàmà phọ; waa ọtapfu iya phọ, e doberu mube Chipfu phọ. ²⁸ Ndu Ízurelu -gude iphe ngweja bya; gẹ ñdú iya; waa ọtapfu iya bųjekwaru oke, aa-heje Erọnu yẹ ọnwu iya. Ono bų okiphe ọphu ndu Ízurelu e-dobejeru mube Chipfu iche m'ẹphe bya egwe ngweja-ẹhu-guu.

²⁹ “Uwe, dọ nsọ kẹ Erọnu ono bẹ a-bųkwarupho k'awa iya. Ọ bųru uwe ono bẹ ẹphe e-yeje teke aawų phẹ manų gude eme phẹ g'ẹphe bųru ndu-uke. ³⁰ Gẹ nwa Erọnu onye ọphu eeme g'ọ nọchia ẹnya iya l'ọkwa uke; jeje l'ọlo-ẹkwa-ndzukọ; je ejee ozi l'ẹka-dọ-nsọ; yejekwa uwe ono ujiku ẹsaa.

³¹ “Wota anu ebili ono, e gude mee Eronu; o buru onye uke ono; je eshia l'eka du nsọ. ³² Ge Eronu yee unwu iya nodu l'Onu-abata ulo-ekwa-ndzukọ taa anu ebili ono; waa buredi pho, e yeru le nkata pho. ³³ O kwa ephebedua a-ta anu ngweja ono, e gude pfua ugwo iphe-aji phe; teke aawu phe manu l'ishi; e shi nno dobe phe nsọ g'ephe buru ndu-uke. G'o to dukwa onye ozo, a-ta iya nu; noo kele o du nsọ. ³⁴ O -buru l'o duru anu ebili ono, e gude mee Eronu; o buru onye uke ono; ozo buredi pho; ophu a taphodoru; o kwaa akwakwa futu l'utsu; g'e jekwa akpo ya oku. G'o to dukwa onye a-ta iya nu; kele o du nsọ.

³⁵ “Su-a; mekwaaru Eronu yee unwu iya iphe, mu turu ngu ekemu su g'i meeru phe-a. Gude ujiku esaa mee phe g'ephe buru ndu-uke. ³⁶ Gbujekwa oke-eswi mbokumboku l'ime ujiku esaa ono g'o buru ngweja-iphe-aji, e gude apfu ugwo iphe-aji. Nokwapho g'ii-gwe ngweja-iphe-aji gude pfua ugwo iphe-aji; shi nno safu emeswe, du l'oru-ngweja ono. Teme l'i wukwaa ya pho manu gude mee ya g'o du nsọ. ³⁷ Gude ujiku esaa gwee ngweja, e gude apfu ugwo iphe-aji; shi nno safu nturu, du l'oru-ngweja ono; k'ophu o-du nsọ. Oo ya bu g'o du nsọ shii; k'ophu iphemiphe, rwuru iya nu a-du nsọ.

³⁸ “Mbokumboku bu iphe, ii-gudeje gwee ngweja ono l'oru-ngweja ono bu nwaturu labo, nogbaaru mg-barapha. ³⁹ Gbua nanu l'utsu; l'i gbua nanu ophuu l'uzenyashi. ⁴⁰ Aturu ke mbu pho be ii-yekobeje ukpokutu iphe je egwee; mbu uzo lanu l'ime nkweka ukpokutu iphe, e keru uzo iri; gwoo le manu, a tsuru l'ikwe; manu, e-ji eze ekpemu eno. L'i wotakwapho nkeru-eno otu-lupfu otumu mee; ye iya g'o buru ngweja-mee. ⁴¹ O -be l'uzenyashi; l'i kpata aturu ophuu gbua. L'i yekobekwa iya pho ngweja-nri; waa ngweja-

mẹe g'e yeru lẹ k'ùtsu phọ; g'ọ bọru ngweja, a kpọru ọku nẹ Chipfu; mkpọ iya dọ iya ree.

⁴² “G'e gwejekwa ngweja-akpọ-ọku-a tekenteke l'ọnu-abata ọlo-ẹkwa-ndzukọ, bọ iya bọ l'ataphu mube Chipfu; e -shi l'ogbo sweru ogbo. Ọo l'ẹka ono bẹ mu a-byapfuta ngu bya epfuru yeru ngu. ⁴³ Ọ bụkwarupho ẹka ono bẹ mu a-byapfuta ndu Ízurẹlu; ogbunwiiinwii mu emee ẹka ono l'ọ dọ nsọ.

⁴⁴ “Noo gẹ mu e-shi mee g'ọlo-ẹkwa-ndzukọ ono; yẹe ọru-ngweja ono; dọ nsọ; mekwaphọ gẹ Erọnu; yẹe ọnwu iya; dọ nsọ; bọru ndu-uke; jejeru mu ozi. ⁴⁵ Teke ono; mu eburu l'echilabọ ndu Ízurẹlu bọru Chileke phẹ. ⁴⁶ Ọo ya bọ g'ẹphe amaru l'ọo mbẹdua bọ Chipfu, bọ Chileke phẹ; onye dufutaru phẹ l'alì Ijiputu gẹ mu eburu l'echilabọ phẹ. Ọo mbẹdua bọ Chipfu, bọ Chileke phẹ.”

30

Ọru-ngweja ọnwù-isensu

(Awu 37:25-28)

¹ “Gude oshi akesha kua ọru-ngweja, bọ ẹka aa-kpoje ọnwù-isensu ọku. ² G'ogologo iya waa ọsa iya tẹkokwa haru ẹnya nhamunha. Iphe, ọo-duchaa bọ nkwo-ẹka lanu. Eli iya adu nkwo-ẹka labọ. Gẹ mpu iya; yẹe ọru-ngweja ono rwagbakwaa bọru nanu. ³ Wụkotakwa eli iya; yẹe mgburẹku iya; waa mpu iya ọkpobe mkpọla-ododo. L'i gudekwaphọ mkpọla-ododo kpọ-pheru mgburẹku iya mgburugburu. ⁴ L'i meta echi mkpọla-ododo ẹbo ẹbo yegbaa lẹ mgburẹku iya ibekẹboebo. Yekwa iya g'ọ nọduchaa lẹ mkpula iphe ono, a kpọ-pheru iya mgburugburu ono. Ọ bọru l'echi ono bẹ ee-yeje mgboro, ee-gudeje apa iya. ⁵ Gude oshi akesha pyita mgboro ono; wua ya mkpọla-ododo. ⁶ L'i dobe ọru-ngweja ono l'iphe ẹkwa

pho, e gude kochite okpoko-ekemu; mbu opfu okpoko pho, aa-noduje apfu ugwo iphe-aji pho, e gude kpuchia okpoko-ekemu. Oo aka ono bu aka mu a-byapfutaje ngu.

⁷ “Ge Eronu kpojekwa unwu-isensu, eshi mkpo oku l'oru-ngweja ono l'utsu me o -jeshia emezi oroku pho. ⁸ G'o kpojekwapho unwu-isensu oku l'oru-ngweja ono l'uzenyashi me o -jeshia eye oku l'oroku ono; k'ophu oku unwu-isensu a-noduje enwu l'ataphu Chipfu; e -shi l'ogbo sweru ogbo. ⁹ G'o to dukwa unwu-isensu ozo, gbaru iche, ee-gudeje bya akpo oku l'oru-ngweja ono. Ophu e gudejekwa ngweja-akpo-oku; ozo ngwejanri; ozo ngweja-mee bya l'oru-ngweja ono. ¹⁰ Ugbo lanu l'apha be Eronu e-teje mee le mpu oru-ngweja ono gude pfa ugwo iphe-aji. O buru mee anu ngweja- iphe-aji, e gude apfu ugwo iphe-aji; be ee-teje le mpu ono aphagapha. G'e mejekwa iya nno; e -shi l'ogbo sweru ogbo. Aka ono bukwa aka kachaa aduru mube Chipfu nsu.”

Utu ulo-ekwa-ndzuko

¹¹ Noo ya; Chipfu su Mosisu: ¹² “Teke ji-gu ndu Izurelu ugu gi maru g'ephe ha; g'onyenonu pfujekwa mube Chipfu aswa ishi onwiya gude gbata onwiya; me a gue ya pho. Oo ya bu g'o to du ejo iphe-ehuka, a-byapfuta phe nu teke aa-gu phe ugu obu. ¹³ G'onye a guru pfujekwa okpoga mkpola-ochaa, erwa iya rwuru nkeru- ebo shkelu; teme l'o jepfu ndu ophu a guwaru. G'erwa shkelu ono, onye ono a-nu ono bukwaru iphe, eegudeje atu erwa iphe l'eze-ulo mube Chileke be ee-gude tua ya. Erwa shkelu lanu bu ukporo gera. O buru nkeru- ebo erwa shkelu ono be a-buru iphe, ee-doberu mube Chipfu iche. ¹⁴ Iphe, bu onye a guru ugu; a -gbe l'onye noru ukporo apha kwaseru be a-nu mube Chipfu iphe.

¹⁵ Gẹ ndu nweru iphe ta nughatakwa nkeru-ẹbo ẹrwa shekelu ono; ophu ndu ukpa anu-petekwanu iya; me unu -nodu anu mube Chipfu iphe unu gude pfua ugwo iphe-ẹji, unu meru. ¹⁶ Nata okpoga ndu Izurẹlu ono, e gude apfu ugwo iphe-ẹji phe ono; gude jee ozi l'ulo-ekwa-ndzukọ ono. Ono bu iphe, mube Chipfu e-gude anyata ndu Izurẹlu; bya aburu iphe, ee-gude pfua ugwo iphe-ẹji, ẹphe meru.”

Eze gbamugbamu ono

(Awu 38:8)

¹⁷ Noo ya; Chipfu su Mosisu: ¹⁸ “Gude onyirubvu mee eze gbamugbamu, ee-gudeje wua ẹhu. Gudekwa iya pho mee okpa iya. L'i sube iya le mgbaka ulo-ekwa-ndzukọ ono; yee oru-ngweja ono; kuru mini ye iya. ¹⁹ Gẹ Eronu; yee unwu iya kwoje ẹka yee okpa le mini ono. ²⁰ Ẹphe -nodu abahu l'ulo-ekwa-ndzukọ ono; ozoo l'ẹphe ejekube oru-ngweja ono eje anu mube Chipfu ngweja, aakpo oku; g'ẹphe kwoshijekwa onwophe mini; k'ophu ẹphe ta anwushihudu. ²¹ Mbua; g'ẹphe kwojekwaa ẹka yee okpa; k'ophu ẹphe ta anwushihudu. Ono bu ekemu, a-duru Eronu; yee awa iya; e -shi l'ogbo sweru ogbo.”

Manu awu l'ishi

(Awu 37:29)

²² Noo ya; Chipfu su Mosisu: ²³ “Wota okpobe iphe, eshi mkpo gude bya. Iphe, ii-wota bu: Meru mini ophu ẹrwa iya du unu shekelu l'ukporo shekelu ise; waa sinamonu, eshi mkpo ophu ẹrwa iya du ukporo shekelu iri l'ẹbo le shekelu iri, bu iya bu nkeru-ẹbo meru pho; waa oshi omanko, eshi mkpo ophu ẹrwa iya du ukporo shekelu iri l'ẹbo le shekelu iri; ²⁴ waa kashiya ophu ẹrwa iya du unu shekelu l'ukporo shekelu iri. G'o ha bukwaru

iphe, eegudeje atụ ẹrwa iphe l'eze-ulo mube Chileke be ee-gude tua ya. L'i wotakwapho manụ olivu, jiru eze ekpemu ẹno. ²⁵ G'onye maru eme manụ-mbeleke tuko iphemiphe ono gwakobe g'ọ bụru manụ, dū nsọ bya eshi mkpọ, aawuje l'ishi. Ọo-buru manụ, dū nsọ, aa-wuje l'ishi. ²⁶ L'i gude manụ ono wụ-dzuru ulo-ekwa-ndzukọ; waa okpoko-ekemu; ²⁷ waa teburu; yee iphemiphe, nokota iya nū; waa iphe, aapfubeje oroku; yee ngwa iya g'ọ ha; waa ọru-ngweja unwù-isensu; ²⁸ waa ọru-ngweja, bụ ẹka ee-gweje ngweja-akpo-oku; yee ngwa iya g'ọ ha; waa eze gbamugbamu; yee okpa iya. ²⁹ Tuko iphemiphe ono doo nsọ; g'ọ bụru iphe, kakota nsọ; g'ọ bụru iphe, rwutakporu iya nū; l'ọ dukwapho nsọ.

³⁰ “Wua Eronu; yee unwu iya manụ l'ishi; doo phe nsọ; k'ophu ephe a-aburu ndu-uke jehaaru mube Chipfu ozi. ³¹ Pfiaru ndu Izurelu l'owa-a bụ manụ mu, dū nsọ, aa-wuje l'ishi; e-shi l'ogbo sweru ogbo. ³² G'a ta wujekwa iya nemadzu mmanụ; teme ophu agwajekwa manụ ozo g'ọ dū g'owa-a. Ọ kwa manụ, dū nsọ. Ọo ya bụ g'e dobeje iya nsọ. ³³ Ọ -duru onye gwaru manụ ozo; ọ dū ge manụ owa-a; ozoo l'ọ wuru iya nemadzu mmanụ l'ishi, abudu onye uke; g'e bufukwa iya le ndu nkiya.”

Unwù-isensu

³⁴ Noo ya; Chipfu sụ Mosisu: “Wota iphe, eshi mkpọ gude bya. Iphe ii-wota bụ: etse; yee onika; waa galubanumu; yee okpobe furankisensu. Tua ya l'iphe, eegudeje atụ ẹrwa iphe g'ọ tuko haru ẹnya nhamunha. ³⁵ G'onye maru eme manụ-mbeleke tuko iphemiphe ono gwakobe g'ọ bụru unwù-isensu, eshi mkpọ. G'a pyashi iya unú. G'ọ bukwaru iphe ono, a gushiru ono kpoloko be

ee-gude mee ùnwù-isensu obu. Oo-buru ùnwù-isensu, dù nsọ. ³⁶ Haru iya gwee egwegwe dobe l'atatiphu okpoko-ekemu, nọ l'ulo-ekwa-ndzukọ, bu iya bu eka ono, mu a-byapfuta unu ono. G'ọ bukwaru unu ùnwù-isensu, kakọta adu nsọ. ³⁷ Unu te emekwa ùnwù-isensu k'unu g'ọ du g'owa-a. Unu doberu iya mube Chipfu nsọ. ³⁸ O -duru onye meru ùnwù-isensu ozo, du g'owa-a; doberu onwiya ge manu-mbeleke; g'e bufukwa iya le ndu nkiya.”

31

Bezalelu; waa Oholiyabu

¹ Noo ya; Chipfu su Mosisu: ² “Lenu; mu hotawaru Bezalelu nwa Uri, bu nwanwa Huru; onye okpa-ifu Jiuda; ³ bya emewaa; unme mube Chileke ji iya ehu; g'o nweru mmamiphe; yee nkwaanya; g'iphe edoje iya enya ree; k'ophu oo-makotaru g'eemema iphemiphe emema; ⁴ g'ọ maru g'eemeje iphe-erengete le mkpola-ododo; yee mkpola-ochaa; waa onyirubvu; ⁵ makwarupho g'aawa mkpuma, aswa du; waa g'aawuje mkpola-ododo l'igburonu iya; bya amakwarupho g'aapyije iphe apyipyi; mewaro g'eeshije eme ona ozo, dugbaa iche iche. ⁶ Teme mu hotafuakwaru Oholiyabu nwa Ahisamaku; onye okpa-ifu Danu; g'o yeru iya eka; bya anukotakwapho ndu maru eme ona g'ephe ha ike g'ephe mekota iphemiphe, mu suru g'unu mee. ⁷ Iphe, ephe e-me bu: ulo-ekwa-ndzukọ; waa okpoko-ekemu; yee opfu okpoko ono, aanoduje apfu ugwo iphe-aji ono; mewaro iphemiphe ozo, eegudeje eje ozi l'ime ulo-ekwa ono; ⁸ dunaa ge teburu; yee iphemiphe, nokota iya nu; waa iphe, aapfubeje oroku, e meru l'okpobe mkpola-ododo; yee ngwa iya g'ọ ha; waa oru-ngweja ùnwù-isensu; ⁹ waa oru-ngweja-akpo-oku; yee ngwa iya

g'ọ ha; waa eze gbamugbamu; yẹe ọkpa iya; ¹⁰ wafua uwe, e kweru ekwekwe; mbu uwe, du nsọ, Eronu, bu onye uke e-yeje; waa uwe, unwu iya e-yeje gude eje ozi ndu-uke; ¹¹ waa manu awu l'ishi; waa unwu-isensu, eshi mkpo k'eka-du-nsọ. O buẹpho g'ẹphe mee ya g'ọ du gẹ mu suru ngu g'e mee ya.”

Eswē-atuta-unme

¹² Noo ya; Chipfu sụ Mosisu: ¹³ “Waa iphe ii-pfuru ndu Ízurẹlu baa: Unu ba adukwa iphe unu e-jeje l'eswe-atuta-unme ke mube Chipfu. Owaa a-buru iphe-ohubama, a-nodu l'echilabo mu l'unu; e -shi l'ogbo sweru ogbo. Oo ya bu g'unu amaru l'oo mbedua bu Chipfu, bu onye eme unu g'unu du nsọ.

¹⁴ “Unu nyataje eswe-atuta-unme; noo kele mboku ono duru unu nsọ. O -duru onye dakaru iya nu; g'e gbukwaa onye obu egbugbu. Iphe, bu onye jeru ozi mboku ono be ee-bufu ebufu le ndu nkiya. ¹⁵ Oo ujiku ishii be unu e-gudeje jee ozi unu. Mboku k'esa bu eswe Sabatu, bu iya bu eswe-atuta-unme; bya aburu mboku, duru mube Chipfu nsọ. O -duru onye jeru ozi l'eswe-atuta-unme; g'e gbukwaa onye obu egbugbu. ¹⁶ Ge ndu Ízurẹlu dobeje eswe-atuta-unme; mee ekemu iya; e -shi l'ogbo sweru ogbo; g'ọ buru iphe, a-nodu egoshi ogbandzu mu l'unu jasụ l'ojejoje. ¹⁷ Oo-buru iphe-ohubama, a-nodu le mgbaka mu le ndu Ízurẹlu jasụ le tuutuutu le mijimimii; noo kele oo ujiku ishi be mube Chipfu gude mee igwe; yẹe ali. O -rwua le mboku k'esa; mu haa ozi; tuta unme.”

¹⁸ Noo ya; Chipfu pfughechaephopho opfu nu Mosisu l'eli ubvu Sayinayi; bya anu iya bachibachi mkpuma labo, e deru Ekemu. Mkpuma ono bu Chileke gude mkpushi-eka iya dee ya iphe nwekiya.

32

Nweswi, a kpuru lẹ mkpọla-ododo

¹ Ndu Ízurẹlu nọnyaa bya asu lẹ Mósísu anọnukawa ọdu l'eli úbvú ono; ẹphe bya edzukọbe gbaphee Erọnu mgburugburu bya asu iya: “Ngwa; metaru anyi Chileke, a-nọdu edu anyi! Ọ -buru Mósísu-a, dufutaru anyi l'alị ndu Ijiputu-a bẹ anyi ta amakwa iphe, meru iya nu.”

² Erọnu su phẹ: “Unu yeshia iphe-nchị mkpọla-ododo, unyomu unu; waa unwu unu unwoke; mẹ k'unwanyi unu yeru lẹ nchị; chitaru mu!” ³ Noo ya; ndu ono g'ẹphe ha bya eyeshia iphe-nchị phẹ bya achijeru Erọnu. ⁴ Ọ bya achita iphe ono, ẹphe nuru iya ono gude meta agwa; bya akpua ya; ọ dụ gẹ nweswi; bya egude ngwa ọru mee ya ọna. Noo ya; ẹphe su: “Unubẹ ndu Ízurẹlu; waa Chileke unu baa; mbu onye dufutaru unu l'alị Ijiputu!”

⁵ Noo ya; Erọnu hụmaepho iphe ono bya akpua ọru-ngweja l'atatiphu nweswi ono bya araa su: “Echele bẹ a-bọ Chipfu!” ⁶ Ọo ya bu; o rwua nchitabọhu iya; ndu Ízurẹlu tehu l'onma-ewa-utsu; bya egwee ngweja-akpọ-ọku; bya egweeru iya ngweja-ẹhu-guu. E -mechaa; ẹphe bya anọshia ria nri; bya angua mẹ; bya awu-lihu meahaa ẹmereme.

⁷ Noo ya; Chipfu su Mósísu: “Nyize l'alị; noo kele ndu nkengu ono; mbu ndu i dufutaru l'alị ndu Ijiputu ono bẹ merwushiwaru onwophẹ. ⁸ Ẹphe meru ẹgwegwa gbado ekemu ono, mu turu phẹ ono; bya emetawaru onwophẹ agwa, ẹphe kpuru; ọ dụ gẹ nweswi. Ẹphe phozewaru ishi baaru iya ẹja; bya agwawaa ya agwagwa su: ‘Unubẹ ndu Ízurẹlu; waa Chileke unu, bu onye dufutaru unu l'alị Ijiputu baa!’ ”

⁹ Chipfu su Mósísu: “Mu hụmawaru lẹ ndu-a bunukaru ndu ẹjo-ọkpoma. ¹⁰ Nta-a bukwa g'i haa mu

gẹ mu gude oke ẹhu-eghu mu dapfu phẹ bya emebyishia phẹ. Mu eworu gube Mosisu mee ọha, parụ ẹka.”

¹¹ Mosisu rwọahaa Chipfu, bụ Chileke iya sụ: “Jiko Chipfu; g'ẹhu te eghunukashi nū ngu egbu nno l'opfu ẹhu ndu nkengu ono, i gude ọkpehu ngu dufuta l'alị Ijiputu ono nọ! ¹² Gẹ ndu Ijiputu ta asụ l'iphe, kparụ iphe, i gude dufuta ndu nkengu bụ g'i bya egbushia phẹ l'úbvú úbvú-a g'ẹphe chihu lẹ mgboko. Jiko gbanaa mini l'obu; parụ haa; te emebyishishi nū ndu nkengu. ¹³ Nyatanụ ndu-ozu ngu, bụ Ébirihamu; waa Áyizaku; waa Ízurẹlu, bụ ndu i gude ẹpha ngu riaru nte sụ l'ii-me awa phẹ g'ẹphe ha gẹ kpokpode, nọ l'igwe; tẹme l'i nū awa phẹ alị-a, i kwekọtaru phẹ ukwe iya-a; l'ọ bụwa okiphe phẹ jasụ lẹ tuutuutuu lẹ mijimiimii.” ¹⁴ Noo ya; egomunggo lwa Chipfu azụ; o woru ẹjo iphe-ẹhuka ono, o shi epfu l'oo-gude byapfuta phẹ ono parụ haa.

¹⁵ Mosisu bya aghachi nyizetashia l'eli úbvú ono; yẹe mkpuma labọ ono, dū bachibachi, e deru ekemu ono, o gude l'ẹka ono. Mkpuma ono bẹ e deru iphe l'iphu; dee ya l'azụ. ¹⁶ Mkpuma ono bụ Chileke gude ẹka iya mee ya. Iphe ono, e deru iya ono, bụru Chileke gude ẹka iya dee ya l'eli mkpuma ono.

¹⁷ Noo ya; Jioshuwa nūmaepho ụzu, ndu Ízurẹlu atụ; ọ sụ Mosisu: “Aatụkwa ụzu ọgu l'ẹka anyi kpọberu ụlo-ẹkwa anyi.”

¹⁸ Mosisu sụ iya:

“Ọ tọo dakwa g'ụzu ndu lwụ-kperu l'ọgu;

ọphu ọ tọo dakwanụ g'ụzu ndu a lwụ-kperu.

Iphe, mu anụ bụkwa ụzu ebvu.”

¹⁹ Mosisu bya erwua lẹ mgboru ẹka a kpọberu ụlo-ẹkwa ono; bya ahụma nweswi ono; waa ndu ete ebvu ono. Ẹhu kwatakpọo ghushia ya egbu ike; o woru mkpuma ono, ọ gude l'ẹka ono tükposhia l'ọkpa úbvú ono. ²⁰ Ọ

bya ewota nweswi ono, ephe kpuru ono tsua oku bya egwee ya; o du ge ntụ; bya awuru iya ye le mini; mee ndu Izurelu; ephe ngua ya.

²¹ O su Eronu: “?Bu gunu be ndu-a kabekpoo mee ngu; meru g'o gude i duru phe ye l'eme iphe-aji, habe egube-a?”

²² Eronu su iya: “Jiko g'ehu te eghukwa ngu egu; nnajuphu mu. I mahawaru ge ndu-a bu-be ndu gharu iphu l'eme ajo-iphe. ²³ Ephe suru ge mu metaru phe Chileke, a-nodu edu phe nu! Kele Mosisu, bu onye dufutaru phe l'ali Ijiputu be ephe ta amakwa iphe, meru iya nu. ²⁴ Oo ya bu; mu su phe: ‘G'onye nwekpuru iphe, e meru le mkpola-ododo; yefuta iya.’ Noo ya; ephe chitaru mu mkpola-ododo ono; mu chiru iya ye l'oku; iphe, shi iya nu futa buru nweswi-a.”

²⁵ Mosisu bya ahuma le ndu Izurelu zuwaru onwophe l'eka nafu; le Eronu mewaru phe; ophu ephe ekweedu g'a chikobe phe; ephe nodu emewaa phukuphuku l'iphu ndu ohogu phe; ²⁶ o bya apfuru l'onu-abata aka a kporeru ulo-ekwa ono bya asu: “Onye bu ke Chipfu byapfuta mu!” Ndu Livayi g'ephe ha wu-pfuta iya.

²⁷ Noo ya; o su phe: “Waa iphe, Chipfu, bu Chileke ke ndu Izurelu pfuru baa: ‘G'onyenonu kebe onwiya oguechi iya l'upfu; jee l'okotazu; waa l'ataphu; mekpoo l'ekameka l'eka a kporeru ulo-ekwa ono. G'onyenonu gbushia nwanna iya; waa onya iya; me obutobu iya.’ ”

²⁸ Oshilokpa Livayi bya emee ge Mosisu ziru phe. Ndu nwushihuru nu mboku ono be rwuru iphe, du g'unu umadzu esaa l'ukporo iri. ²⁹ Noo ya; Mosisu su: “A hotawaru unu doberu Chipfu iche ntanu-a; noo kele unu tsoru unwu unu; me unwune unu ugu. Teme o gowaru onu-oma nu unu ntanu-a.”

³⁰ O -rwua nchitabohu iya; Mosisu su ndu Izurelu: “Unu mekwaru eze iphe-ẹji, paru ẹka. Nta-a be mu ejepfuwa Chipfu. ?A maru; mu a-du ike rwo-buta iya g'o gularu unu nvu l'iphe-ẹji ono, unu meru ono?”

³¹ Oo ya bu; Mosisu bya ejepfu Chipfu bya asu: “Oowaal Iphe-ẹji, ndu-a meru kwatakwa paa ẹka! Ephe gudewaa mkpola-ododo metaru onwophe agwa. ³² Ole jiko gularu phe ro nvu l'iphe-ẹji ono; teke o dudu hufukwa epha mu l'ekwo, i deru epha ndu nkengu.”

³³ Chipfu su Mosisu: “Oo onye mesweru mu nu be mu e-hufu epha iya l'ekwo mu. ³⁴ Ngwa; tugbua nta-a je edurwua ndu Izurelu ẹka mu pfuru opfu iya ono; le Ojozi mu a-nodu edu unu. Ole o -rwuepho teke mu a-nu phe aphu; mu anua phe iya k'iphe-ẹji phe.”

³⁵ Chipfu bya egude ejo iphe-ememe byapfuta ndu Izurelu; k'iphe ono, ephe gude nweswi ono, Eronu kpuru ono mee.

33

¹ Oo ya bu; Chipfu su Mosisu: “Unu tugbua l'eka-a; unu le ndu ono, i dufutaru l'alì ndu Ijiputu ono! Tugbua jeshia l'alì ono, mu kweru ukwe bya eriru nte yeru Ebirhamu; waa Ayizaku; waa Jiéopu su: ‘Mu a-nu iya awa unu.’ ² Mu e-zi ojozi g'o duru unu je; je achishiaru unu ndu Kénanu; waa ndu Amoru; waa ndu Hetu; waa ndu Pérezu; waa ndu Hevu; waa ndu Jiebusu. ³ Unu tugbua jeshia l'alì ono, bu alì, mini era-eswi; waa manu-enwu aso gborogboro. Ole mu te etsoduru unu; noo kele unu bunukaru ndu ejo-okpoma; kele o -buru ge mu tsoru unu be o nwekwaru g'oo-du; mu emebyishia unu l'uzo.”

⁴ Ndu Izurelu numae-pho njo-nzi ono; ephe waa ekwa; ophu o dudu onye kwaru onwiya akwa. ⁵ Noo kele Chipfu suru Mosisu: “Pfuaru ndu Izurelu l'ephe bunukaru ndu

ẹjọ-ọkpoma. Mbụ l'ọ -bụru gẹ mu tsoru unu hata mẹ ntụ-ọkpa lanụ bẹ o nwekwarụ g'ọo-dụ; mu emebyishia unu. Ngwa; unu kwashia onwunu akwa, unu kwarụ gẹ mu chia idzù iphe, mu e-me unu.”⁶ Noo ya; ndu Ízurẹlu woru akwa phẹ kwashia l'úbvú Horẹbu.

Mkpù-ẹkwà Ndzukọ

⁷ Mósísu shi aphútaje ọlọ-ẹkwa je akpọbe ọzenya l'azụ ẹka ndu Ízurẹlu kpọbechaaru ọlọ-ẹkwa nkephẹ; kua ya “ọlọ-ẹkwa-ndzukọ.” Iphe, bụ onye eje akpata ishi l'iphu Chipfu nọdu ejeje l'ọlọ-ẹkwa-ndzukọ ono, nọ l'azụ ẹka ndu Ízurẹlu nọ ono. ⁸ Ọ nọdu abụjeru; Mósísu -gbalihi jeshia l'ọlọ-ẹkwa-ndzukọ ono; ndu Ízurẹlu g'ẹphe ha awulihu je apfugbaaru l'ọnu-abata ọlọ-ẹkwa nkephẹ elekpọepho Mósísu ẹnya; gbiriri jasụ l'ọobahu l'ọlọ-ẹkwa-ndzukọ ono. ⁹ Ọ nọdu abụjeru; Mósísu -bahuchaepho l'ọlọ-ẹkwa ono; urwukpu ono, kpuru oronmono ono alwazeta bya anọ-chia ọnu-abata teke Chipfu epfu anụ Mósísu. ¹⁰ Ndu Ízurẹlu hụmaepho urwukpu ono, kpuru oronmono ono g'ọ nọ l'ọnu-abata ọlọ-ẹkwa ono; ẹphe atụko gbeshi baarụ Chipfu ẹja. Onyenọnu nọdu anọduje l'ọnu-abata ọlọ-ẹkwa nkiya baarụ Chipfu ẹja ono. ¹¹ Chipfu nọdu epfuje eyeru Mósísu l'iphu l'iphu gẹ nemadzụ yẹ ọnyà iya anọduje abọ ọja-a. Teke e mechaarụ; Mósísu alwaphuta azụ l'ẹka ndu Ízurẹlu nọ; ọphu nwokorọbya ono, bụ onye n-yemeka iya ono, bụ Jioshuwa nwa Nunu alufujedu alufu l'ọlọ-ẹkwa ono.

Mósísu yẹe ogbunwiiinwii Chipfu

¹² Mósísu sụ Chipfu: “I shiẹpho teke-a pfutaru mu gẹ mu dua ndu-a; ọle i tiki mekpọdaa gẹ mu maru onye ii-yeru mu gẹ mu l'iya swiru. I suru l'ị maru ẹpha mu; tẹme mu dụ ngu l'obu. ¹³ Ọ -bụru phọ lẹ mu dụ ngu

l'obu k'eviya; goshinu mu ụzo ngu; k'ọphu mu a-maru ngu; tẹme mu adụ ngu l'obu kwasẹru. Nyatakwa l'ọha-a bụ ndu nkengu.”

¹⁴ Chipfu sụ iya: “Mu e-tsoru-a unu l'onwomu; tẹme mu emee gẹ meji nmapfuru ngu.”

¹⁵ No iya; Mosisu sụ iya: “Ọ -bụru l'i tii tsoduru anyi l'onwongu; te emekwa g'anyi hata ọkpa ahata tųgbua l'ẹka-a! ¹⁶ ?Denu g'ee-shi maru lẹ mbẹdua; waa ndu nkengu dụ ngu l'obu; abụdu l'i tso anyi? ?Bụ gụnu ọzo e-goshi lẹ mbẹdua waa ndu nkengu dụ iche l'ẹka ndu mgboko l'ophu nọ?”

¹⁷ Ọo ya bụ; Chipfu sụ Mosisu: “Mu e-meephọ iphe ono, ị sụru gẹ mu meeru ngu ono. Noo kẹle ị dụ mu l'obu; tẹme mu maru epha ngu.”

¹⁸ Mosisu sụ iya: “Jiko goshinu mu ogbunwịinwii ngu.”

¹⁹ Tọbudu iya bụ; Chipfu sụ iya: “Mu e-me g'ị hụma gẹ mu dụ-be ree; tẹme mu anọdu l'atatiphu ngu kua onwomu iphe, mu aza. Onye ọ dụ mu gẹ mu meeru eze-iphe-ọma; mu emeeru iya ya; onye ọ dụ mu gẹ mu phụaru obu-imemini; mu aphụaru iya ya. ²⁰ Ọle ị tịi hụmadu iphu mu; noo kẹle o to nwedu onye gude ẹnya iya hụma mu, a-nọdu ndzụ.”

²¹ Chipfu sụ: “O nweru ẹka nọ-kube mu nụ, ịi-pfuru lẹ mkpuma. ²² Teke ogbunwịinwii mu ghatajẹerupho; mu eworu ngu dobe lẹ mgbaka agbara-mkpuma; bya egude ẹka mu gbobuta ngu; gbiriri jasụ mu aghata-gbua. ²³ Mu agbẹ teke ono wofu ẹka; l'ị hụma mu okpurukpu. Ọ -bụru iphu mu bẹ a taa hụmajekwa ahụma.”

34

Bachibachi mkpuma k'ẹbo

¹ Chipfu sụ Mosisu: “Je awata bachibachi mkpuma labọ ọzo, a-dụ gẹ kẹ mbụ phọ. Gẹ mu dekwaa ya iphe, shi

nɔdu lẹ kẹ mbu pho, i tukporu pho. ² Kwakobe l'utsu echele; nyikota úbvú Sayinayi; bya egoshi mu onwongu l'eli úbvú ono. ³ G'o to nwekwa onye e-tSORU ngu nu; Ọzo onye aa-huma l'úbvú ono l'ophu l'ophu; g'o to nwekwa aturu; Ọzoo eswi, a-nɔdu ata nri l'ataphu úbvú ono.”

⁴ Noo ya; Mosisu mee gẹ Chipfu ziru iya; bya awata bachibachi mkpuma labo Ọzo, dukwa pho gẹ kẹ mbu pho; bya egude nyihu úbvú Sayinayi l'onmewa utsu. Ọ parụ bachibachi mkpuma labo ono l'eka. ⁵ Noo ya; Chipfu bya anodu l'urwukpu nyizeta; bya araa ya arara l'epha iya bu Chipfu. ⁶ Ọ bya aghata l'ataphu Mosisu etushi onwiya epha su: “Ọo mu bu Chipfu; Ọo mu bu Chipfu; bya aburu Chileke k'obu-imemini; bya abukwarupho Chileke k'eze-ipe-oma. Onye ehu ete eghujedu eghu egwegwa; onye n-yemobu iya; waa apfushi ike iya parụ eka. ⁷ Unubuku unwu-eliphe be mu anoduje egoshi lẹ mu yeru obu. Mu agujeru phe nvu l'ejo-ipe, epe meru; me l'atupya, epe tupyaru mu; waa l'ipe-eji, epe meru mu. Ole mu ta ahajekwanu onye-ikpe nmaru gẹ mu ta ahụ iya ahụhù. Ndu ejo-ipe be mu ahụje ahụhù k'ejo-ipe, epe meru mu; hu-rwua ya l'eka unwu nwanwa phe nọ; waa l'eka nwanwanwaranwa phe nọ; hu-rwua phe l'ogbo k'eno.”

⁸ Mosisu bya ephoze iphu l'alị teke ono teke ono bya abaru Chipfu eja. ⁹ Ọ su: “Gube Chipfu; o -buru lẹ mu du ngu l'obu eviya; jiko gẹ gube Chipfu tsonuru anyi. A makwaru-a lẹ ndu-a bunukaru ndu ejo-okpoma; ole jiko gunaru anyi nvu l'ejo-ipe; waa iphe-eji anyi; wotarọ anyi g'anyi buru okiphe ngu.”

¹⁰ Tobudu iya bu; Chipfu su: “Anyi lẹ ngu a-gba ndzu. L'ataphu ndu nkengu l'ophu be mu e-me oke iphe, du biribiri, mu teke emeswe l'ohamoha, nọ lẹ mgboko l'ophu. Ndu ono, unu bu l'echilabo phe ono a-humakota

g'iphe, mụbe Chipfu e-mekọta dụ-be ebvu. ¹¹ Unu ngabẹ nchị mee ekemu-a, mu aturu unu ntanụ-a. Mu a-chifuru unu ndu Amoru; waa ndu Kénanu; waa ndu Hetu; waa ndu Pérezu; waa ndu Hevu; tẹme waa ndu Jiebusu. ¹² Olee g'unu kwabẹ ẹnya g'unu lẹ ndu bu l'alị ono, unu ala ono ta agba ndzụ; ọdumeka bẹ ẹphe e-mechakwaa buru ọnyà nmata unu. ¹³ Unu gbukpọshia ọru-ngweja phe; tẹme unu etsukpọshia mkpuma, ẹphe doberu nsọ. Tẹme unu aphokashikwapho itso, e doberu agwa phe, bụ Ashera. ¹⁴ Unu ta adukwa iphe ọzo, unu a-bajeru ẹja gbahaa mụbe Chipfu kpurumu. Noo kẹle mụbe Chipfu, ẹpha iya bụ Okophoo bẹ bukwa Chileke, ekoje okophoo.

¹⁵ “Unu kwabekwa ẹnya g'ọ tọ dushi ndu bu l'alị ono, unu l'ẹphe a-gba ndzụ. Noo kẹle ẹphe -nọdu agwa agwa phe ono; bẹ ẹphe e-zi unu lẹ nri; unu eje eria iphe, ẹphe gude gwaa iphe ono. ¹⁶ O -buru l'unu haru unwada phe lutaru unwu unu g'ẹphe buru unyomu phe; ndu ono nọdu agwa agwa phe ono bẹ ẹphe e-dukwarupho unwu unu; ẹphe eje emee nno.

¹⁷ “Unu ta akpukwa ntẹkpe!

¹⁸ “Unu boje ọbo-iphe buredi, ekoduru ekoko. Ujiku ẹsaa bẹ unu a-tajẹ buredi, e yeduru iphe, ekoje buredi ẹgube ono, mu suru g'unu meje iya. Unu boje ọbo-iphe ono teke ono, e doberu iya ono l'onwa Abibu; noo kẹle ọo l'onwa ono bẹ unu shi l'alị ndu Ijiputu wufuta.

¹⁹ “Iphe-mbụ, vuru ụzo waa ẹkpa ne iya bụ kẹ mụbe Chipfu. Iphe, bụ nwa mbụ iphe-edobe unu nwuru, bụ oke ya yichakwaa ya; m'ọ bụ eswi; ọzoo aturu; ọzoo egbu. ²⁰ Unu gudeje nwaturu gbata nkapfu-igara, bụ kẹ mbụ l'ẹpho ne iya. Obenu l'ọ -buru l'unu ta agbataduru iya agbata; unu aswikwooye ya olu.

“G'ọ to nwekwaru onye a-gbajeru ẹka bya l'atatiphu mu.

²¹ “Ujiku ishii be unu e-jeje ozi unu; o -rwua mboku k'esa; unu edzua ike. Unu te ejejekwa ozi le mboku k'esa; m'obeta o buru aako okoro; ozoo teke aakpata iphe, e meberu l'egu.

²² “Witi-mbu, unu vuru uzo kpata be unu e-gudeje bo Obo-Idzu. Unu aboo obo-iphe, a kpataru l'opfu le mbvucha apha.

²³ “Ugbo eto l'apha be unwoke unu g'ephe ha a-kpakoje bya l'ataphu Nnajiuphu, bu Chipfu. ²⁴ Mu achishiru unu ohamoha; bya emee g'ali unu kabaa shii. Ophu o dudu onye bya eme g'o nata unu ali unu ono; me unu jeje l'iphu Chipfu, bu Chileke unu; mbu ophu unu ejeje ugbo eto l'apha.

²⁵ “Unu ta adukwa iphe e yekoberu iphe ekoje buredi, unu e-yekobe le mee anu, unu gude egweru mu ngweja.

“Teme ophu o dukwa anu ngweja ono, e gude abo obo Ojehata, aa-ha g'o bo nchi.

²⁶ “Iphe-mbu, vuru uzo kaa l'opfu unu be unu e-gudeje bya l'ulo Chipfu, bu Chileke unu.

“Unu te egudejekwa mini-era ne egu shia nwa iya.”

²⁷ Noo ya; Chipfu su Mosisu: “Dekota opfu ono g'o ha l'ekwo. Noo kele oo opfu ono be mu le gubedua; me ndu Izurelu gude gbaa ndu.” ²⁸ Mosisu be yee Chipfu noru l'eka ono ukporo abali labo; eswe l'enyashi; ophu o riduru nri; ebe o ngutaduru me mini. O bya edee opfu oqbandzu ono, bu iya bu ekemu iri ono, shi l'eka Chileke ono l'eli bachibachi mkpuma ono.

Iphu Mosisu egbu nwainwii

²⁹ Mosisu shiepho l'ubvu Sayinayi nyizeta; yee bachibachi mkpuma labo ono, e deru ekemu Chipfu ono, o gude l'eka; ophu o madu l'iphu egbu iya nwainwii; noo kele ephe le Chipfu bogbaberu uja. ³⁰ Eronu; yee ndu

Ízurẹlu g'ẹphe ha hụma Mósísu g'íphu egbu iya nwịnwii; ndzụ ejekube iya ntse gụahaa phẹ. ³¹ Mósísu bya ekua phẹ; ọo ya bụ; Erọnu; yẹe ndu-ishi ọha ono g'ẹphe ha gbẹ teke ono bya ejekube iya ntse; ọ bya epfuru yeru phẹ. ³² E mechaa; ndu Ízurẹlu g'ẹphe ha byakube iya ntse; ọ bya atụshikotaru phẹ ekemu, Chipfu nuru iya l'úbvú Sayınayi.

³³ Mósísu pfughechaaru phẹ opfu bya aphụ-chia ẹkwa l'ataphu. ³⁴ Ọ nọdu abụjeru; teke Mósísu bahuru l'ulo-ẹkwa l'ataphu Chipfu gẹ yẹle iya bọgba; l'ọ phufu ẹkwa ono l'ataphu iya gbiriri jasụ l'ọ futa. Ọ -futaepfo l'ọoby a epfukotaru ndu Ízurẹlu iphe, e ziru iya; ³⁵ ẹphe ahụma l'íphu egbu iya kẹ nwịnwii. Ọo ya bụ; Mósísu abya ewota ẹkwa phụ-chia íphu ọzo gbiriri jasụ o jeshia gẹ yẹle Chipfu bọgbabe.

35

Eswe-atụta-unme

¹ Mósísu bya ekukọbe ndu Ízurẹlu g'ẹphe ha; sụ phẹ: “Wakwa iphe, Chipfu sụru g'unu mee bụ ọwa-a: ² Ọ sụru l'ọo ujiku ishii bẹ unu e-jeje ozi unu; o -be lẹ mbọku k'ẹsaa; unu edobe iya nsọ; g'ọ bụru eswe-atụta-unme kẹ Chipfu. Ọ duru onye jeru ozi mbọku ono; g'e gbukwaa onye ọbu egbugbu. ³ G'ọ tọ dukwa onye a-phụ-nwu ọku l'ibe iya l'eswe-atụta-unme.”

Iphe, ee-gude mee ulo-ẹkwa

(Awu 25:1-7; 35:10-19)

⁴ Mósísu sụ ndu Ízurẹlu g'ẹphe ha: “Wakwa iphe, Chipfu sụru g'e mee bụ ọwa-a: ⁵ Unu shi l'iphe, unu nweru hata iphe bya anụ yẹbe Chipfu. Onye oohe ihee g'ọ nụ yẹbe Chipfu iphe bẹ iphe, oo-gude bya anụ iya bụ mkpọla-ododo; waa mkpọla-ọchaa; waa onyirubvu; ⁶ waa

owu urwukpu-urwukpu; waa ɔphu eke mee-mee; waa ɔphu dɔ uswe-uswe; waa owu ɔchaa; waa ɛji eghu; ⁷ waa akpɔ ebili, a tsɛru l'uswe; waa akpɔ umoro-ɛnyimu; waa oshi akesha; ⁸ waa manɔ olivu, ee-gudeje anwɔ ɔku; waa iphe, eeyeje lɛ manɔ k'awɔ l'ishi g'o shia mkpɔ; mɛ ɔphu eeyeje l'ɛnwɔ-isɛnsu g'o shia kwɛekweekwee; ⁹ waa mkpuma ɔnikɔsɔ; mɛwaro mkpuma ɔzo, aswa dɔgbaa. Mkpuma ono bɛ ee-mechaa gbapyabɛ l'uwe-ukuvu onye-ishi ndu-uke; yɛle uwe-ɔkpoma iya.

¹⁰ “G'iphe, bukpuo ndu maru eme ɔna l'echilabɔ unu fɔta bya emekɔta iphemiphe, Chipfu tɔru ɔnu g'e mee-a; ¹¹ mbɔ ɔlo-ɛkwa ono; waa ɛkwa, aa-phɔshi l'eli ɔlo-ɛkwa ono; waa iphe iya ono, nweru nkoloba ishi labɔ ono; waa mgbo ono, ee-gude kɔ-chite ɔlo-ɛkwa ono; waa oshi ono, ee-gudegbaa swebushia lɛ mgbo ono; waa itso iya ono; waa ɛnya ɛka aa-kpɔgbaaru iya ye; mbɔ itso ono; yɛ ɔkpa mgbo ono; ¹² waa okpoko ono; yɛ mgbɔro ono, ee-gudeje apa iya ono; waa opfu okpoko ono, aa-nɔduje apfu ɔgwo iphe-ɛji ono; waa ɛkwa ono, ee-gude kochite iya; ¹³ waa teburu ono; yɛ mgbɔro ono, ee-gudeje apa iya ono; yɛ ngwa iya; yɛ buredi ono, ee-dobeje l'iphu Chipfu ono; ¹⁴ waa iphe ono, aapfubeje orɔku ono, e-meje g'iphɔrɔ dɔ; yɛ ngwa iya; waa orɔku iya ono; mɛ manɔ ono, ee-gudeje anwɔ ɔku ono; ¹⁵ waa ɔru-ngweja-ɛnwɔ-isɛnsu ono; yɛ mgbɔro ono, ee-gudeje apa iya ono; waa manɔ ono, aa-wɔ l'ishi ono; yɛ ɛnwɔ-isɛnsu ono, eshi mkpɔ ono; waa ɛkwa ono, ee-kochite ɔnu-abata ɔlo-ɛkwa ono; ¹⁶ waa ɔru-ngweja ono, bɔ ɛka ee-gweje ngweja-akpɔ-ɔku ono; yɛ iphe iya ono, dɔ g'ɔgbu, ee-gude onyirubvu mee ono; waa mgbɔro ono, ee-gudeje apa ɔru-ngweja ono; yɛ ngwa iya g'ɔ ha; yɛkwapho eze gbamɔgbamu ono, ee-gude onyirubvu mee ono; yɛ ɔkpa iya; ¹⁷ waa ɛkwa ono, ee-gude gebuta ɔma-unuphu ɔlo-

ekwa ono; waa itso ɔma-unuphu ono; yee enya eka aakpobegba itso ono; waa ekwa ono, ee-gude gechite ɔnu-abata ɔma-unuphu ono; ¹⁸ waa nggu ɔlo-ekwa ono; yee k'ɔma-unuphu iya; me eri iya; ¹⁹ waa uwe ono, e kweru ekwekwe, ee-yeje gude eje ozi l'ɔlo-nsɔ ono; mbu uwe, e doberu nsɔ ke Erɔnu, bu onye uke; yee k'unwu iya, ephe e-yeje gude eje ozi ge ndu-uke.”

²⁰ Ndu Ízurɛlu wukahu l'ataphu Mosisu. ²¹ Iphe, bukpuo onye oohe ihee; waa onye o rwuru l'ehu g'o nu Chipfu iphe; gudegbaa iphe bya anu iya; mbu iphe, ee-gude mee ɔlo-ekwa-ndzukɔ; mewaro iphe, ee-gude eje ozi l'ime iya; mekwapho ɔphu ee-gude kwee uwe, du nsɔ.

²² Iphe, bukpuo onye oohe ihee; unwoke me unwanyi; gudegbaa iphe, e gude mkpola-ododo mee bya anu; mbu iphe, dugbaa ge ngga agbabe; me eregede-nchi; me iphe-eka; mewaro iphe ɔzo, dugbaa egube ono. Ephe gudegbaa mkpola-ododo phe ono bya anu Chipfu g'o buru ngweja-amama. ²³ Ndu nweru owu wotagbaakwaru iya phɔ; mbu owu, du urwukpu-urwukpu; ɔzoo ɔphu eke mee-mee; ɔzoo ɔphu du uswe-uswe; ɔzoo owu ɔchaa; ɔzoo eji eghe; ɔzoo akpɔ ebili, a tsɛru l'uswe; ɔzoo k'umoro-enyimu.

²⁴ Ndu du ike nu mkpola-ɔchaa; ɔzoo onyirubvu; nukwaru iya phɔ Chipfu. Ndu nweru oshi akesha, nweru eka ee-gude iya jee ozi ono nukwa iya phɔ. ²⁵ Iphe, bukpuo nwanyi, maru eme ɔna gbaa owu bya anu. O duru ndu bu owu urwukpu-urwukpu be ephe gbaru; ndu bu owu, eke mee-mee; duru ndu bu owu uswe-uswe; ndu aburu owu ɔchaa be ephe gbaru gude bya. ²⁶ Unwanyi, oohe ihee; teme ephe je adu ike mekota iya; bu eji eghe be ephe gude gbaa owu nkephe. ²⁷ Ndu-ishi wotagbaaru mkpuma onikusu; mewaro mkpuma ɔzo, aswa dugbaa; g'a gbapyabe l'uwe-ukuvu onye-ishi-uke;

yẹle uwe-ọkpoma iya. ²⁸ Ẹphe nufukwapho iphe, eshi mkpọ; waa manu olivu, ee-gudeje anwu ọku; waa k'ọphu ee-yeje le manu awu l'ishi; waa k'unwu-isensu, eshi mkpọ. ²⁹ Ndu Ízurẹlu l'ophu; unwoke me unwany; mbu ndu oohe ihee wotaru Chipfu iphe, ẹphe turu obu phe onyo nu g'e gude meeru Chipfu iphe ono, o shi l'onu Mosisu pfua su g'e meeru iya ono.

³⁰ Noo ya; Mosisu su ndu Ízurẹlu: “Unu maru le Chipfu hotawaru Bezalẹlu nwa Uri, bu nwanwa Huru, onye ọkpa-ipfu Jiuda; ³¹ bya emewaa; unme yẹbe Chileke ji iya ẹhu; g'o nweru mmamiphe; yẹ nkwaṁnya; g'iphe doje iya ẹnya ree; k'ọphu ọ-makotaru g'eemema iphemiphe emema; ³² g'ọ maru g'eemeje iphe-ẹrengete le mkpọla-ododo; yẹ mkpọla-ọchaa; waa onyirubvu; ³³ makwarupho g'aawa mkpuma, aswa du; waa g'aawuje mkpọla-ododo l'igburonu iya; bya amakwarupho g'aapyije iphe apyipyi; mewaro g'eeshije eme ọna ọzo, dugbaa iche iche. ³⁴ Teme o nukwapho yẹ Oholiyabu nwa Ahisamaku, onye ọkpa-ipfu Danu mmamiphe g'ẹphe zia ndu ọzo g'eeme ọna obu. ³⁵ O mekwaru ge mmamiphe k'eme iphe-ẹrengete ji phe ẹhu; mbu g'ẹphe maru eme ọna; waa g'ẹphe maru g'eegudeje owu urwukpu-urwukpu; yẹ ọphu eke mee-mee; waa k'uswe-uswe; waa owu ọchaa dengashia iphe edengashi. Ẹphenebo bu ndu tukoru makotaru g'eemeje iphe ọna g'ọ maa mma.

36

¹ “Ọo ya bu; Bezalẹlu; yẹ Oholiyabu; waa iphe, bukpo ndu maru iphe, Chipfu nuru mmamiphe; yẹ iphe edo ẹnya g'ẹphe maru g'eeme iphemiphe, laru le k'akpu ulo-nsọ ono bukwapo g'ẹphe mee ya ge Chipfu pfuru su g'e meeru iya ya.”

² Tòbodu iya bụ; Mósísu kua Bezalèlu; yèe Oholiyabu; waa iphe, bụkpoo onye maru iphe, Chipfu nuru mmamiphe; ọ nòdu ehekwa iya phò ihee g'o jee ozi ono.

³ Mósísu chíru iphe, ndu Ízurèlu tataru g'e gude kpua ùlo-nsò ono nù phè. Ndu Ízurèlu nòdu atukokpoephe iphe ono l'ùtsu mbòku anwuta anwuta g'èphe atụ iya.

⁴ Ndu maru eme ọna, akpụ ùlo-nsò ono tuko g'èphe ha parụ iphe, èphe eme haa; ⁵ tughua je asụ Mósísu: “Ndu-a tutaakwaru iphe, sùru egude mee iphe, Chipfu sùru g'e mee; atụwa k'etsutsu iya eye iya.”

⁶ Mósísu tụa ekemu sụ: “G'ò tò dukwa nwoke; ọzoo nwanyị, a-kpataba iphe akpakpa bya anụ sụ l'òo iphe, o gude eyeta èka k'ùlo-nsò ono.” E woru iphe ono, Mósísu pfuru ono pfudzuru l'ùlo-èkwa ndu Ízurèlu l'ophu. E shi nno kpòshia ndu Ízurèlu g'ò tò dùhe iphe, èphe e-wotaba; ⁷ noo kèle iphe, a tütawaru g'e gude jee ozi ùlo ono sùwaru g'ee-gude iya jee ozi ono; l'o tsufu etsufu.

Mkpù-èkwà ono

(Awu 26:1-14)

⁸ Iphe, bụ ndu ọphu maru iphe lè ndu-ozí ono gude owu ọchaa, a swíru ụdo; waa ọphu dù urwukpu-urwukpu; waa ọphu dù uswe-uswe; yèe ọphu eke mee-mee; kwee èkwa kweta iya upfu èkwa iri. Onye maru eme ọna gude owu ono kwee chierobu ye l'upfu èkwa ono. ⁹ Upfu èkwa ono tükokwa harụ ẹnya nhamunha. Ogologo iya dù nkwo-èka ukporo l'èsato; ọsa iya dù nkwo-èka ẹnó. ¹⁰ Èphe wotaru upfu èkwa ono ise gbagbabe; ọ bụru nlochiru lanụ; bya ewotakwaphò ụzo ise ọphuu gbagbabe nanụ. ¹¹ Ishimishi-ophoko-èkwa ono kè mbụ bè èphe gude owu, dù urwukpu-urwukpu yeshia ya nkoloba l'igburonu iya. Èphe bya emekwaaphò nno l'ishimishi-ophoko-èkwo ono k'èbo. ¹² Nkoloba ukporo

labo l'iri be ephe yeru l'ishishi nlochiru lanu; ephe yekwapho nkoloba ukporo labo l'iri l'ishishi nlochiru lanu ophuu. Nkoloba ono tuko ghagbabe iphu. ¹³ Ephe gude mkpola-ododo meta iphe, kweru nko ishi labo uzo ukporo labo l'iri; gude iya dzegbabe nlochiru ekwa ono ephenebo; o tuko buru nanu.

¹⁴ Ephe bya egude eji egu kwee ekwa; kweta iya upfu ekwa iri le nanu, ee-gude phu-chite eli ulo-ekwa ono. ¹⁵ Upfu ekwa ono ephe n'iri le nanu tuko haru enya nhamunha. Ogologo iya du nkwo-eka ukporo l'iri. Osa iya du nkwo-eka eno. ¹⁶ Ephe bya achita upfu ekwa ono ise gbagbabe; o buru nlochiru lanu; chita uzo upfu ekwa ishii ophuu gbagbabe kwapho nanu. ¹⁷ Nkoloba ukporo labo l'iri be ephe yeru l'ishishi nlochiru lanu; yekwapho nkoloba ukporo labo l'iri l'ishishi nlochiru lanu ophuu. ¹⁸ Ephe gude onyirubvu meta iphe, kweru nko ishi labo uzo ukporo labo l'iri; gude iya kotagbaa nkoloba nlochiru ekwa ono ephenebo; gude iya dzegbabe ulo-ekwa ono; o buru nanu. ¹⁹ E mecha; ephe gude akpo ebili, a tseru l'uswe; mee iphe, ee-gude phu-chia eli ulo-ekwa ono ozo; bya egudekwapho akpo umoro-enyimu mee iphe, ee-gude kwechite eli akpo k'ebili ono.

²⁰ Ephe gude oshi akesha meta oshi, ee-gudeje kpo be ulo-ekwa ono. ²¹ Oshi ono be e mekotaru; o dugbaa nkwo-eka iri iri l'eli. Osa iya dugbaa nkwo-eka le mkpirikpu iya. ²² Oshi ono be ephe pyitacharu okpa labo ye l'ibekobo. O buru egube ono be ephe mekotaru oshi ulo-ekwa ono g'o ha. ²³ A bya l'ulo-ekwa ono ibiya ophu gharu iphu l'uzo ndohali; bu ukporo oshi be ephe rutaru yegbaa ya. ²⁴ Ephe gude mkpola-ochaa meshia enya eka aa-kpogbaaru okpa oshi ono ye; meta iya uzo ukporo labo. Iphe, bu oshi ono g'o ha nweru enya eka labo, aa-kpojeru okpa iya ye. ²⁵ A

bya l'ibe iya ophuu; mbu ibiya ophu gharu iphu l'uzo isheli; bukwapho ukporo oshi be epe rutaru; yeshia ya. ²⁶ Epe gude mkpola-ochaa meshia enya eka aakpogbaaru okpa oshi ono ye; meta iya uzo ukporo labo. Iphe, bu oshi ono g'o ha nweru enya eka labo, aakpojeru okpa iya ye. ²⁷ A bya l'okotazu ulo-ekwa ono; mbu ibiya ophu gharu iphu l'uzo enyanwu-ariba bu oshi ishii be epe rutaru; yeshia ya; ²⁸ bya emetacha oshi ebo ebo; yechaa le mgbureku mgbureku ulo-ekwa ono l'uzo okotazu iya ono. ²⁹ Oshi labo ono, ee-yechaa le mgbureku iya ono be dugbaa nkwegba ebo ebo. O shi l'uzo ali du nkwegba ebo jasụ l'imeli. Teme o buru echi lanu be a kuberu iya. Ephenebo tuko dukota nno. ³⁰ Oo ya bu l'o du oshi esato l'azu ulo-ekwa ono. E gude mkpola-ochaa meshia enya eka aakpogbaaru okpa oshi ono ye uzo iri l'ishii. Iphe, bu oshi ono g'o ha nwegbaarụ enya eka labo, aakpojeru okpa iya ye.

³¹ Epe gude oshi akesha rwashia oshi, dugbaa gberere, ee-gude swebushia l'oshi ono. Uzo ise be epe sweberu l'oshi mgbureku ulo-ekwa ono ibe lanu; ³² swebekwapho uzo ise ozo le mgbureku ibe iya ophuu. Uzo ise ozo buru k'okotazu ulo-ekwa ono; ibiya ophu gharu iphu l'uzo enyanwu-ariba. ³³ Oshi ophu ee-swebe l'echi iya be epe rwaru g'o gbẹ l'ishi lanu lufu l'ishi iya ophuu. ³⁴ Epe wukota mkpola-ododo l'oshi ono, eegudeje kpobe ulo-ekwa ono; bya egudekwapho mkpola-ododo meshia echi, e-gudeshigbaa oshi ono, dugbaa gberere ono. Epe bya awukwapho mkpola-ododo le gberere oshi ono.

³⁵ Epe gude owu, du urwukpu-urwukpu; waa ophu du uswe-uswe; waa ophu eke mee-mee; yee owu ochaa, a swiru udo; kwee ekwa. Onye maru eme ona bya egude owu ono kweshia chierobu ye l'ekwa ono. ³⁶ Epe gude

oshi akesha rwaa itso ẹno; bya awua ya mkpola-ododo; bya egudekwapho mkpola-ododo meshia iphe, kweru nko, ee-gude kobe ẹkwa ono l'itso ono. Ẹphe bya egude mkpola-ochaa kpushia ẹnya ẹka aa-kpobe itso ono ọzo ẹno. ³⁷ Ẹphe gude owu, du urwukpu-urwukpu; waa ophu eke mee-mee; waa ophu du uswe-uswe; yee owu ochaa, a swiru udo; kwee ẹkwa, ee-gudeje kochite onu-abata ulo-ẹkwa ono. O buru ndu gude ngga ekwe ẹkwa meru iya. ³⁸ Ẹphe gude oshi akesha rwata itso ise; bya emekwapho iphe, kweru nko, ee-gude kobe ẹkwa ono l'itso ono. Ẹphe bya awua ishi itso ono; waa iphe, ee-swebe l'itso ono mkpola-ododo; bya egude onyirubvu kpushia ẹnya ẹka aa-kpobegba itso ono ẹphe n'ise.

37

Okpoko ono

(Awu 25:10-22)

¹ Bezalelu gude oshi akesha kua okpoko. Ogologo iya du nkwo-ẹka labo le mkpirikpu iya. Osa iya du nkwo-ẹka lanu le mkpirikpu iya. Eli iya dukwapho nkwo-ẹka lanu le mkpirikpu iya. ² O wua okpobe mkpola-ododo l'ime iya; waa l'azu iya. O gudekwapho mkpola-ododo wu-pee mgbureku iya mgburugburu. ³ O kputa echi mkpola-ododo ẹno defubegbaa l'okpa iya ẹphen'ẹno; mbu wota ẹbo defube l'ibe lanu; wota ẹbo k'ophuu defube l'ibe iya ophuu. ⁴ O gude oshi akesha pyita mgboro labo; wua ya mkpola-ododo. ⁵ O woru mgboro ono ẹphenebo pyochaa l'echi ono, e defubegbaaru le mgbureku okpoko ono g'o buru iphe, ee-gudeje apa iya.

⁶ O gude okpobe mkpola-ododo meta opfu okpoko; ẹka aapfuje ugwo iphe-ẹji, nemadzu meru. Ogologo iya du nkwo-ẹka labo le mkpirikpu iya. Osa iya du nkwo-ẹka lanu le mkpirikpu iya. ⁷ O gude mkpola-ododo mee

chierobu labo, a-noduchaa l'ishi opfu okpoko ono. O buru mkpola-ododo, e tsusaru etsusa be o gude mee ya. ⁸ O woru chierobu lanu dobe l'ishi ibe lanu; woru ophuu dobe l'ishi iya ophuu; bya emee; chierobu labo ono, nogbaa l'ishishi okpoko ono ephenebo yele okpoko ono buru iphe lanu. ⁹ Cherubimu ono be o meru; o jashia nkù l'uzo imeli; nkù iya ono kpuchite opfu okpoko ono. Ephe ghagbabephiphu; tuko ele enya l'eli okpoko ono kwapho.

Teburu ono

(Awu 25:23-30)

¹⁰ Ephe gude oshi akesha meta teburu. Ogologo iya du nkwo-eka labo. Osa iya du nkwo-eka lanu. Eli iya du nkwo-eka lanu le mkpirikpu iya. ¹¹ Ephe wua ya okpobe mkpola-ododo; bya egudekwapho mkpola-ododo wu-pee eli iya mgburugburu. ¹² Ephe wota werere oshi, osa iya ha g'obochi-eka wu-pee mgbureku iya mgburugburu; bya egudekwapho mkpola-ododo kuphee werere oshi ono. ¹³ Ephe kputa echi mkpola-ododo eno depfubegbaa le mgbureku okpa teburu ono. ¹⁴ Echi ono no-kubechaa werere oshi pho; k'ophu oodukwanu ike gudesia mgboro, ee-gudeje apa teburu ono. ¹⁵ Mgboro, ee-gudeje apa teburu ono bu oshi akesha be ephe gude pyishia ya; bya awua ya mkpola-ododo. ¹⁶ Ephe gude okpobe mkpola-ododo meshia ngwa, aatu-kobeje l'eli teburu ono; mbu gbamugbamu; waa ite; waa okoro; me nkweka ee-gudeje gweeru Chipfu ngwejamee.

Iphe, aapfubeje oroku

(Awu 25:31-40)

¹⁷ Ephe gude okpobe mkpola-ododo, e tsusaru etsusa mee iphe, aapfubeje oroku. Ephe meru iya; o nweru oshi;

waa ekali. O bya enweru ochi; nweru nkwo iya; nweru iphe, du ge nwopu okoko; waa iphe, du g'okoko, jawaru ajaja. Ephe tuko iphemiphe ono mee ge yele iphe ono, aapfubeje oroku ono dzepfua buru nanu. ¹⁸ Oshi iya ono nweru ekali ishii. Ekali eto nodu le mgbureku iya lanu; eto k'ophuu nodu le mgbureku iya ophuu. ¹⁹ Ekali iya lanu nweru okoro eto. Okoro ono be e mechaaru; o dugbaa g'okoko oshi alumundu. E mekwaapho nwopu okoko ye iya; yee okoko ophu jawaru ajaja. Noo g'odukota l'ekali iya ono ephe n'ishii, dzepfugbaaru l'oshi iya ono. ²⁰ Oshi iya ono nweru okoro eno, e meru; o du g'okoko oshi alumundu. O nwekwarupho iphe, e meru; o du ge nwopu okoko; yee iphe, du g'okoko ophu jawaru ajaja. ²¹ Nwopu okoko lanu be e meru; o nodu le mkpula ekali iya labo ono, no l'uzo ali iya. K'eto nodu le mkpula ekali iya labo k'echi. K'eto nodu le mkpula ekali iya labo k'uzo eli. Mbụ l'o nochaa le mkpula ekali iya ono ephe n'ishii. ²² Nwopu okoko iya ono; yee ekali iya ekali iya ono be e meru; yele oshi iya tuko dzepfuru. O buru okpobe mkpola-ododo, e tsusaru etsusa be e gude mee ya.

²³ Ephe gudekwapho okpobe mkpola-ododo meta oroku esaa, aa-pfubegbaa l'eli iphe ono, aapfubeje oroku ono; bya emetakwapho akpa iya; waa iphe, aaguje oku iya. ²⁴ Iphe, aapfubeje oroku ono; yee ngwa iya g'ohakota bu okpobe mkpola-ododo, erwa iya du talentu lanu be e gude mee ya.

Oru-ngweja unwu-isensu

(Awu 30:1-5)

²⁵ Ephe gude oshi akesha kua oru-ngweja, bu eka aapfoje unwu-isensu oku. Ogologo iya waa osa iya tuko haru enya nhamunha. Iphe, o duchaa bu nkwo-eka

lanu. Eli iya du nkwo-eka labo. Mpu iya; yee oru-ngweja ono tuko rwagbabe buru nanu. ²⁶ Ephe wukota eli iya; yee mgbureku iya; waa mpu iya okpobe mkpola-ododo. Ephe gudekwapho mkpola-ododo kpu-pee mgbureku iya mgburugburu. ²⁷ Ephe meta echi mkpola-ododo ebo ebo depfubegbaa le mgbureku iya ibekeboebo. Ephe depferu iya; o noduchaa le mkpula iphe ono, a kpu-pheru iya mgburugburu ono. O buru l'echi ono be ee-yeje mgboro, ee-gudeje apa iya. ²⁸ Ephe gude oshi aksha pyita mgboro ono; wua ya mkpola-ododo.

²⁹ Ephe mekwaapho manu ono, du nsu bya eshi mkpo, aawuje l'ishi ono; waa okpobe unwu-isensu ono, eshi mkpo ono. O buru ndu maru eme manu-mbeleke meru iya.

38

Oru-ngweja eka ee-gweje ngweja-akpo-oku

(Awu 27:1-8)

¹ Ephe gude oshi aksha kuta oru-ngweja. Eli iya du nkwo-eka eto. Ogologo iya waa osa iya tuko haru enya nhamunha. Iphe, o duchaa bu nkwo-eka ise ise. ² Ephe rutachaa mpu mobechea l'ishi ishi mgbureku iya ephen'eno. Mpu ono; yee oru-ngweja ono rwagbaa buru nanu. Ephe mecha ya nno; bya eworu onyirubvu wua ya. ³ Ephe gude onyirubvu meshia iphemiphe, ee-gudeje eje ozi l'oru-ngweja ono, bu iya bu ite; waa iphe, eegudeje ekpo ntu; waa gbamugbamu; waa oji; me iphe, aaguje oku. ⁴ Ephe gude onyirubvu meta iphe, du nggafu-nggafu g'ugbu; bya enweru mgbureku eno. Ephe woru iya kwechia uzo ali mgbureku oru-ngweja ono. A -gbe l'uzo ali iya kwechia ya jasu l'echilabo iya. ⁵ Ephe gudekwapho onyirubvu meta

echi ẹnọ hebechaa ịe mgburẹku iphe ono, ụ nngafu-nngafu g'ụgbu ono, e meru l'onirubvu ono; g'ọ bụru ẹnaya ẹka ee-pyocha mgboro, ee-gudeje apa ọru-ngweja ono. ⁶ Ẹphe gude oshi akesha pyita mgboro labo; wua ya onirubvu; ⁷ wocharu mgboro ono nwua l'ẹnaya echi pho ibekẹboebo. Mgboro ono ẹphenebo a-nọdujehaa ịe mgburẹku iya ẹphenebo me a -nọdu apa iya. Ẹphe gude iberibe oshi mee ọru-ngweja ono; ụzo ụ iya l'echi.

Eze gbamugbamu ono

(Awụ 30:17-21)

⁸ Ẹphe gude onirubvu mee eze gbamugbamu; yee okpa iya. Onirubvu ono, ẹphe gude mee ya ono shi l'onyo unwanyi, anọduje eje ozi l'ọnu-abata ụlo-ekwandzukọ.

Ọma-unuphu

(Awụ 27:9-19)

⁹ Ẹphe bya emee ọma-unuphu. Ẹphe gude owu ọchaa, a swiru ụdo; kwee ẹkwa, ụ ụkporo nkwo-ẹka ise l'ogologo; g'e gude gebuta ibiya ọphu ọma-unuphu ono gharu iphu l'ụzo ndohali. ¹⁰ Ẹphe gude onirubvu meta ụkporo itso, aa-kpọbe iya; yee ẹnaya ẹka aa-kpọbechaa itso ono; bya egude mkpọla-ọchaa meshia iphe, kweru nko, ee-gude kobe ẹkwa ono l'itso ono; yee iphe, ee-swebe l'itso ono. ¹¹ Ụzo isheli iya bukwaphe ẹkwa, ụ ụkporo nkwo-ẹka ise l'ogologo be e kweru gude gebuta iya. Itso, aa-kpọbe l'ụzo isheli ono; yee ẹnaya ẹka aa-kpọbe itso ono ụchaa ụkporo ụkporo. O bukwarupho onirubvu be e gude metachaa ya. O bukwanuru mkpọla-ọchaa be e gude meshia iphe, kweru nko, ee-gude kobe ẹkwa ono l'itso ono; yee iphe, ee-swebe l'itso ono.

¹² A bya l'Ọsa ọma-unuphu ono l'uzo ẹnyanwu-arịba iya; bukwa ẹkwa, du ukporo nkwo-ẹka labo le nkwo-ẹka iri l'ogologo be e kweru; gude gebuta iya. Ephe bya emeta itso iri, aa-kpobe l'uzo ẹnyanwu-arịba ono; metakwapho ẹnya ẹka aa-kpobechaa itso ono uzo iri. Ephe bya egude mkpola-ochaa meshia iphe, kweru nko, ee-gude kobe ẹkwa ono l'itso ono; yee iphe, ee-swebe l'itso ono. ¹³ Ọsa ọma-unuphu ono l'uzo ẹnyanwu-awawa iya dukwapho ukporo nkwo-ẹka labo le nkwo-ẹka iri l'ogologo. ¹⁴ Ephe bya ekwee ẹkwa, du nkwo-ẹka iri l'ise l'ogologo g'e gude gebuta aguga onu-abata ọma-unuphu ono ibe lanu. Itso, aa-kpobe iya; yee ẹnya ẹka aa-kpobechaa itso ono duchaa eto eto. ¹⁵ A bya l'eka aguga onu-abata ọma-unuphu ono ibe iya ophuu; bukwapo ẹkwa, du nkwo-ẹka iri l'ise l'ogologo be ephe kweru g'e gude gebuta iya. Itso, aa-kpobe iya; yee ẹnya ẹka aa-kpobechaa itso ono duchakwapo eto eto.

¹⁶ Iphe, bu ẹkwa, ee-gude gebuta ọma-unuphu ono mgburugburu bukota owu ochaa, a swiru udo be ephe gude kwee ya. ¹⁷ Ẹnya ẹka aa-kpobechaa itso, ee-gude kpobuta ọma-unuphu ono mgburugburu bu onyirubvu be ephe gude meshia ya. Iphe, kweru nko, ee-gude kobe ẹkwa ono l'itso ono; yee iphe, ee-swebegbaa l'itso ono bukwanuru mkpola-ochaa be ephe gude meshia ya. Ishi itso ono be ephe wuru mkpola-ochaa. Iphe, ee-swebechaa l'itso ono, ee-gude kpobuta ọma-unuphu ono mgburugburu ono bu mkpola-ochaa be ephe gude meshia ya. ¹⁸ Ephe gude owu, du urwukpu-urwukpu; waa ophu eke mee-mee; waa k'uswe-uswe; yee owu ochaa, a swiru udo; gude kwee ẹkwa, du nkwo-ẹka ukporo l'ogologo; g'e gude gechite onu-abata ọma-unuphu ono. O buru ndu gude ngga ekwe ẹkwa meru iya. ¹⁹ Ephe gude onyirubvu metaru onu-abata iya ono itso eno; waa ẹnya

ẹka aa-kpọbechaa itso ẹno ono. Iphe, kweru nko, ee-gude kobe ẹkwa ono l'itso ono; waa iphe, ee-swebechaa l'itso ono bẹ ẹphe mekọtaru lẹ mkpọla-ọchaa. Ẹphe wụkotakwapho mkpọla-ọchaa l'eli itso ono. ²⁰ Iphe, bụ nggu, ee-libegbaa eri ụlo-ẹkwa ono; mẹkwapho k'oma-unuphu ono bẹ ẹphe gude onyirubvu mekọta.

Iphe, e gude jee ozi obu.

²¹ Ọwaa bụ mkpakọ iphe, e gude mee ụlo-ẹkwa obu; mbụ ụlo-ẹkwa Ekemu ono. Ọo Mosisu sụru gẹ ndu oshilọkpa Lívayi dekọta iphemiphe ono l'ẹkwo. Onyeshi phẹ bụ Itama nwa Erọnu, bụ onye uke. ²² Bezalẹlu nwa Uri, bụ nwanwa Huru, bụ oshilọkpa Jiuda mekọta iphemiphe gẹ Chipfu tūru Mosisu ọnu g'e mee ya. ²³ Onye ẹphe l'iya tūko mee ya bụ Oholiyabu nwa Ahisamaku; oshilọkpa Danu; bụ onye maru eme ọna; yee ẹrengete; bya aburu onye maru g'eegudeje owu, dū urwukpu-urwukpu; waa ọphu eke mee-mee; waa ọphu dū uswe-uswe; waa owu ọchaa dengashia iphe edengashia. ²⁴ Ẹrwa mkpọla-ododo, a tūtaru lẹ ngweja-amama, a nuru g'e gude mee ụlo ono, dū nsọ ono dū ụkporo talentu lẹ talentu tete; waa unu shẹkelu; l'ụkporo shẹkelu iri l'ishii; lẹ shẹkelu tete. G'ọ ha bụkwa iphe, eegudeje atụ ẹrwa iphe l'eze-ụlo Chileke bẹ e gude tūa ya. ²⁵ Ẹrwa mkpọla-ọchaa, ndu Ízurelu tūtaru teke ono, a gūru phẹ ọgu ono dū ụkporo talentu ise; waa unu shẹkelu ẹno; l'ụkporo shẹkelu ẹsato; lẹ shẹkelu iri l'ise. G'ọ ha bụkwa iphe, eegudeje atụ ẹrwa iphe l'eze-ụlo Chileke bẹ e gude tūa ya.

²⁶ Iphe, mkpọla-ọchaa obu gbaru phẹ l'ẹhu l'ẹhu bụ mkpọla-ọchaa, ẹrwa iya bụ nkeru-ẹbo shẹkelu. G'ọ ha bụkwa iphe, eegudeje atụ ẹrwa iphe l'eze-ụlo Chileke bẹ e gude tūa ya. Ndu a gūru teke ono, a gūru ndu Ízurelu

ogụ ono bụ; a -gbẹ lẹ ndu nọru ụkporo apha kwaseru. Iphe, ephe dū bụ ụkporo ụnu nemadzu ugbo ụkporo ẹto l'iri l'ise; l'ụnu nemadzu ẹsato; l'ụkporo ụmadzu iri l'ẹsaa; l'ụmadzu iri. ²⁷ Mkpọla-ọchaa ono, ẹrwa iya dū ụkporo talentu ise ono bẹ e gude kpushigbaa ẹnya ẹka aa-kpọbegba ọkpa mgbo ono, ee-gude kụ-chite ụlo-ẹkwa ono ụzo ụkporo ise. Mkpọla-ọchaa, ẹrwa iya dū talentu lanụ bẹ eegudeje kpua ẹnya iya lanụ. ²⁸ Ephe gude ụnu shẹkelu mkpọla-ọchaa ẹno; l'ụkporo shẹkelu ẹsato; lẹ shẹkelu iri l'ise kpushia iphe, nweru nkoloba, ee-gude kobe ẹkwa ono l'itso ono; bya egudekwa iya phọ wụkota l'ishi itso ono; bya egude iya mekwaphọ iphe, ee-swebegba l'itso ono. ²⁹ Ephe tụtakwarupho onyirubvu, ẹrwa iya dū ụkporo talentu ẹto lẹ talentu iri; waa ụnu shẹkelu ishii lẹ ngweja-amama ono. ³⁰ Ephe gude iya kpua ẹnya ẹka aa-kpọbegba itso k'onu-abata ụlo-ẹkwa-ndzukọ ono; bya egudekwa iya phọ kpua ọru-ngweja ono, bụ ẹka ee-gweje ngweja-akpọ-ọku ono; yẹe iphe ono, dū g'ụgbu ono; waa ngwa ọru-ngweja ono g'ọ ha. ³¹ Ephe gudekwa iya phọ kpua ẹnya ẹka aa-kpọbegba itso, ee-gude kpọ-buta ọma-unuphu ono; wakwaphọ k'onu-abata iya; waa nggu, ee-libegbaa eri ụlo-ẹkwa ono; mekwapho k'oma-unuphu iya.

39

Uwe ndu-uke (Awu 28:1-14)

¹ Ephe gude owu, dū urwukpu-urwukpu; waa ọphu eke mee-mee; yẹe ọphu dū uswe-uswe; kweeru ndu-uke uwe, ephe e-yeje gude eje ozi l'ulo-ẹkwa ono. Ephe kwekwarupho Eronu uwe, dū nsọ, bụ iya bụ gẹ Chipfu sūru Mosisu g'e mee ya.

Uwe ifodu

² Eṗhe gude owu mkpọla-ododo; yẹe owu, dṗ urwukpu-urwukpu; waa ọphu eke mee-mee; waa ọphu dṗ uswe-uswe; waa owu ọchaa, a swiru ọdo; kwee uwe-ukuvu. ³ Eṗhe woru mkpọla-ododo tsusaa etsusa; mee ya; ọ dṗ pheripheri; woru iya washia agwara; gude agwara ono tsokota le mgbaka owu urwukpu-urwukpu pho; yẹe ọphu eke mee-mee; yẹe ọphu dṗ uswe-uswe; waa owu ọchaa, a swiru ọdo pho. O buru onye maru eme ona meru iya. ⁴ Eṗhe woru werere ekwa labo libechaa l'uwe-ukuvu ono ibekęboebo; g'a nyaje iya l'ukuvu; g'e gudeje werere ekwa ono ephenebo lita k'ataphu yẹe k'azu. ⁵ Eṗhe bya ekwekwapho werere ekwa, ee-gudeje tu-butu iya l'upfu ye iya. Werere ekwa ono be yẹe ifodu ono tuko buru iphe lanu. Iphe, e gude kwee ya bu owu mkpọla-ododo; yẹe owu, dṗ urwukpu-urwukpu; waa ọphu eke mee-mee; yẹe k'uswe-uswe; yẹe owu ọchaa, a swiru ọdo, bu iya bu ge Chipfu turu Mosisu onu g'e mee ya. ⁶ Mkpuma onikusu pho be eṗhe wuru mkpọla-ododo l'igburonu iya. O buru egube ono, onye apyije mkpuma, vu oke aswa akashije epha le mkpuma; gude mee ya iphe-ohubama ono bu g'eṗhe kakotaru epha unwu Izurelu le mkpuma ono. ⁷ Eṗhe bya adzupya mkpuma labo ono l'eli uwe-ukuvu pho ephenebo; k'ọphu Chipfu e-gudeje iya nyata unwu Izurelu, bu iya bu ge Chipfu turu Mosisu onu g'e mee ya.

Uwe-Okpoma

⁸ Eṗhe bya ekwee uwe-okpoma pho, ee-gudeje achọ iphe, bu uche Chipfu pho. Eṗhe kweru iya; ọ dṗ g'uwe-ukuvu pho, e kweru l'owu mkpọla-ododo; yẹe owu, dṗ urwukpu-urwukpu; yẹe ọphu eke mee-mee; waa k'uswe-uswe; waa owu ọchaa, a swiru ọdo. O buru

onye maru eme ọna meru iya. ⁹ O nweru mgburẹku ẹno; ọdu nkwegba labo. Mgburẹku iya ono ẹphen'eno tọkokwa haru ẹnya nhamunha. Ogologo iya ọdu nkwo-ẹka lanu; ọsa iya dukwapho nkwo-ẹka lanu. ¹⁰ Ẹphe bya adzupya mkpuma, vu oke aswa l'ogiri l'ogiri ọzo ẹno l'ekwa ono. Mkpuma, no l'ogiri iya ke mbu bu rubi; yee topazu; waa berilu. ¹¹ Ogiri iya k'ẹbo; bu tokwasu; yee safaya; waa emeraludu be ẹphe doru iya. ¹² O be l'ogiri iya k'eto; o bu ru jiasintu; yee agetu; waa amitisutu be ẹphe doru iya. ¹³ Teke o beru l'ogiri k'eno; bu kirisolayitu; yee onikusu; waa jiasupa be ẹphe doru iya. Ẹphe bya awua mkpola-ododo l'igburonu mkpuma ono.

¹⁴ Iphe, o du bu mkpuma iri l'ẹbo. G'ẹphe ha nanu nanu no-chicharu ẹnya ẹpha unwu izurelu. Ẹphe bya edechaa ẹpha unwu izurelu ono le mkpuma ono; o du g'iphe-ohubama nochia ẹnya okpa-ipfu iri l'ẹbo ndu izurelu. ¹⁵ Ẹphe gude owu okpobe mkpola-ododo swishia gwogirigwo, ee-lipfubegba l'uwe-okpoma obu; mbu swishia ya; o du g'onye swiru udo. ¹⁶ Ẹphe gude mkpola-ododo meta echi labo; yechaa l'ishi uwe-okpoma ono; ¹⁷ bya eworu gwogirigwo pho libechaa l'echi ono, e yegbaaru l'ishi uwe-okpoma obu. ¹⁸ Ẹphe bya ewota ishi gwogirigwo ono ishi iya ophuu lipfubekwapho le mkpola-ododo pho, a wuru l'igburonu mkpuma labo pho, e lipfuberu l'eli uwe-ukuvu pho. ¹⁹ Ẹphe bya egude mkpola-ododo meta echi labo ozo; lipfube l'ishi uwe-okpoma obu l'uzo ali. Ẹphe lipfuberu iya l'ime uwe-okpoma obu; ibiya ophu tukoru l'eli uwe-ukuvu pho. ²⁰ Ẹphe bya egude mkpola-ododo metafua echi labo ozo; libechaa l'ishishi werere ekwa labo pho l'uzo ali iya; mbu werere ekwa ono, e liberu l'eli uwe-ukuvu ono. Ẹphe liberu iya temanu l'e rwua ẹka ono, a nmaru werere ekwa, a tu-butaru l'upfu uwe-ukuvu ono. ²¹ Echi

k'uwe-òkpoma phò bẹ ẹphe gude eri, e gude owu, dù urwukpu-urwukpu swià; litachaa l'echi uwe-ukuvu òbu; k'òphu òo-nòdu lẹ mgboru wẹrere ẹkwa, atụ-butà l'upfu phò; g'uwe-òkpoma phò ta nòdujeshi akụ pẹepẹ l'eli uwe-ukuvu òbu, bụ iya bụ gẹ Chipfu tūru Mòsisu ònu g'e mee ya.

Uwe uke Ọzo

²² Ẹphe gude ẹkwa, dù urwukpu-urwukpu mee uwe mgbalanụ, ee-yeje uwe-ukuvu ono l'eli iya. Ọ bụru onye maru ekwe ẹkwa ree kweru iya. ²³ Ẹphe kweru iya; ẹka eepyoje iya ishi nòdu iya l'echilabọ; bya eswia igburonu iya ònu g'eeswije olu uwe-a; g'ò tọ lakahụ. ²⁴ Ẹphe gude owu, dù urwukpu-urwukpu; waa òphu eke mee-mee; yẹe òphu dù uswe-uswe; waa owu òchaa, a swiṛu ụdo; metachaa iphe, dṛgbaa g'akpuru itorokuma; dophee ònu uwe ono mgburugburu. ²⁵ Ẹphe bya egude òkpobe mkpọla-ododo meshia òkunmengu dophee igburonu uwe ono mgburugburu lẹ mgbaka iphe ono, dṛgbaa g'akpuru itorokuma ono. ²⁶ Ọkunmengu ono; waa iphe ono, e meru; ọ dù g'akpuru itorokuma ono; nọphee igburonu uwe ono mgburugburu. E dongakotaru phẹ edonga l'ònu uwe ono, ee-yeje ejeru Chipfu ozi ono, bụ iya bụ gẹ Chipfu tūru Mòsisu ònu g'e mee ya. ²⁷ Ẹphe gude owu òchaa kweeru Eronu; yẹe unwu iya uwe mgbalanụ. Ọ bụru onye maru ekwe ẹkwa ree kweru iya. ²⁸ Ẹphe gudekwaphò owu òchaa kwee okpulishi-ẹkwa ono; waa okpu ndu-uke ono; gude owu òchaa, a swiṛu ụdo kwee nwiba ono. ²⁹ Ẹphe gude owu òchaa, a swiṛu ụdo; waa owu, dù urwukpu-urwukpu; waa òphu eke mee-mee; yẹe òphu dù uswe-uswe kwee ẹkwa-atụ-butà-l'upfu ono. Ọ bụru onye maru ekwe ẹkwa kweru iya; bya aburu gẹ Chipfu tūru Mòsisu ònu g'e mee

ya. ³⁰ Eṗhe gude ọkpobe mkpọla-ododo meta iphe, dṗ g'okwekpu; dee ya iphe g'eedeje l'iphe-ọhubama-a. Iphe, eṗhe deru iya bṗ: IPHE, DṰRU CHIPFU NSỌ. ³¹ Eṗhe bya ewota eri, e gude owu, dṗ urwukpu-urwukpu swia; libe l'iphe ono, dṗ g'okwekpu ono; woru iya lipyabe l'atatiphu okpulishi-ekwa, bṗ iya bṗ ge Chipfu tṗru Mosisu ọnu g'e mee ya.

Mosisu eje agbaphe ọlo-ekwa ono.

³² Nta-a be ọlo-ekwa ono; mbṗ ọlo-ekwa-ndzukọ ono be e meghewaru. Ndu Ízureṗlu tṗkoeru iya phọ mekọta ge Chipfu sṗru Mosisu g'e mee ya. ³³ Noo ya; eṗhe chita iphe ọlo-ekwa ono g'ọ ha chitaru Mosisu; mbṗ ọlo-ekwa ono; me ngwa iya, dṗ g'iphe iya ono, nweru nkoloba ono; waa mgbo ono, ee-gude kṗ-chite ọlo-ekwa ono; waa oshi ono, ee-gudegbaa swebushia le mgbo ono; waa itso iya ono; ye eṗnya eka aa-kpọbechaa itso ono; waa ọkpa mgbo ono.

³⁴ Eṗhe chitakwarupho akpọ ebili ono, a tseru l'uswe, ee-gude kpua ọlo-ekwa ono; waa akpọ umoro-ẹnyimu ono; waa ekwa ono, ee-gude kobuta eka-kakọta-adunso ono; ³⁵ waa okpoko-ekemu ono; ye mgboro ono, ee-gudeje apa iya ono; waa opfu okpoko ono, aa-nọduje apfu ugwo iphe-ẹji ono; ³⁶ waa teburu ono; ye ngwa iya; waa buredi ono, ee-dobeje l'iphu Chipfu ono; ³⁷ waa iphe ono, aapfubeje orọku ono, e meru l'okpobe mkpọla-ododo ono; waa orọku iya ono; ye ngwa iya; waa manṗ ono, ee-gudeje anwṗ ọku ono; ³⁸ waa ọru-ngweja ono, e meru le mkpọla-ododo ono; waa manṗ ono, aa-wṗ l'ishi ono; waa ọnwù-isensu ono, eshi mkpọ ono; waa ekwa ono, ee-kochite ọnu-abata ọlo-ekwa ono; ³⁹ waa ọru-ngweja ono, bṗ eka ee-gweje ngweja-akpọ-ọku ono, e gude onyirubvu mee ono; waa iphe iya ono, dṗ g'ugbu

ono; waa mgboro iya; yee ngwa iya g'ọ ha; waa eze gbamugbamu ono; yee iphe ono, aa-subeje iya ono; ⁴⁰ waa ekwa ono, ee-gude gebuta oma-unuphu ono; yee itso iya; waa enya aka aa-kpobechaa itso ono g'ọ ha; waa ekwa, ee-gude gechite onu-abata oma-unuphu ono; waa eri iya; yee nggu iya; yee iphemiphe, ee-gude eje ozi l'ulo-ekwa ono; mbu ulo-ekwa-ndzuko ono; ⁴¹ waa uwe ono, e kweru ekwekwe, ee-yeje gude eje ozi l'ulo-nsọ ono; mbu uwe, du nsọ ke Eronu, bu onye uke; yee k'unwu iya, ephe e-yeje m'ephe ndu eje ozi uke phe. ⁴² Ndu Izurelu tukoeppo iphemiphe ono mekota ge Chipfu turu Mosisu onu iya. ⁴³ Mosisu bya elee enya l'ozi ono; huma l'ephe jekotaeru iya pho ge Chipfu suru g'e mee ya. Oo ya bu; o bya agoru onu-oma nu phe; gude kele phe ekele ozi ono, ephe jeru ono.

40

Akpobe ulo-ekwa ono

¹ Noo ya; Chipfu su Mosisu: ² “Kpobe ulo-ekwa ono; mbu ulo-ekwa-ndzuko; le mboku, onwa mbu fuerupho. ³ Paru okpoko-ekemu ono sube iya l'ime; l'i wota ekwa ono gude kobuta iya. ⁴ L'i pabata teburu ono; yee ngwa iya. L'i pabatakwapo iphe ono, aapfubeje oroku ono; dozichaa oroku, du iya nu. ⁵ L'i patakwapo oru-ngweja-unwu-isensu ono, e meru le mkpola-ododo ono; sube l'ataphu okpoko-ekemu ono; gude ekwa ono kobuta onu-abata ulo-ekwa ono.

⁶ “L'i sube oru-ngweja ono, bu aka ee-gweje ngweja-akpo-oku ono l'ataphu onu-abata ulo-ekwa ono; mbu ulo-ekwa-ndzuko ono. ⁷ L'i pata eze gbamugbamu ono sube le mgbaka ulo-ekwa-ndzuko ono; yee oru-ngweja ono, bu aka ee-gweje ngweja-akpo-oku ono; kuru mini ye iya. ⁸ L'i chita ekwa oma-unuphu ono gude kobuta

Ọma-unuphu mgburugburu; wotakwapho ẹkwa ọnu-abata Ọma-unuphu ono kochite ọnu-abata iya. ⁹ L'i wota manu ono, aa-wu l'ishi ono; wua l'ulo-ẹkwa ono; yee iphemiphe, nọkọta iya nu; shi nno doo yee iphemiphe, nọ iya nu nsọ; g'ọ du nsọ. ¹⁰ L'i wukwapho ọru-ngweja ono, bu ẹka ee-gweje ngweja-akpo-ọku ono manu; yee ngwa iya g'ọ ha; shikwapho nno doo ya nsọ; g'ọ buru iphe, du nsọ shii. ¹¹ L'i wukwapho eze gbanugbanu ono; yee okpa iya manu; shi nno doo ya nsọ.

¹² “L'i duta Eronu; yee unwu iya bya l'onu-abata ulo-ẹkwa-ndzukọ ono; wua phe ehu. ¹³ L'i chita uwe ono, du nsọ ono yee Eronu; wua ya manu l'ishi gude doo ya nsọ; k'ophu ọo-buru onye uke; jeeru mu ozi. ¹⁴ L'i dutakwapho unwu iya yeshia phe uwe mgbalanu phe. ¹⁵ L'i wua phe manu l'ishi g'i wuru nna phe; g'ephe buru ndu-uke jeeru mu ozi. Manu ono, i-wu phe l'ishi ono e-me phe; g'ephe buru ndu-uke; e-shi l'ogbo sweru ogbo.” ¹⁶ Mosisu tuko iphemiphe mekota ge Chipfu turu iya ọnu g'o mee ya.

¹⁷ O be l'apha k'ẹbo le mboku, onwa mbu furu; e woru ulo-ẹkwa ono kpobe. ¹⁸ Mosisu woru enya ẹka aakpobe chaa mgbo ulo-ẹkwa ono; waa itso iya; pfubegbaa; bya akpobe iya mgbo ono; bya eye iya iphe ono, ee-gude swebushia le mgbo ono; bya kpobekwa iya pho itso ono; shi nno kpobe ulo-ẹkwa ono teke ono. ¹⁹ O wota ẹkwa ono phushi l'eli ulo-ẹkwa obu; bya achita iphe phuchite ulo-ẹkwa ono, bu iya bu ge Chipfu suru g'e mee ya. ²⁰ O pata ekemu ono ye l'ime okpoko ono; woru mgboro iya ono pyochaa l'okpoko ono; bya apata opfu okpoko ono, aa-nodu apfu ugwo iphe-ẹji ono; sube iya l'eli. ²¹ O gbẹ teke ono pata okpoko ono pabata l'ulo-ẹkwa ono; bya eworu ẹkwa ono kobuta okpoko-ekemu ono, bu iya bu ge Chipfu turu iya ọnu g'o mee ya. ²² Mosisu

bya apata teburu ono sùbe l'ùlo-ẹkwa-ndzukọ ono l'ùzo isheli; l'okotazu ẹkwa, e gude kobuta ẹka-kakọta-adu-nsọ ono. ²³ O woru buredi ono dobe l'atatiphu Chipfu, bu iya bu ge Chipfu turu iya onu g'o mee ya. ²⁴ O pata iphe ono, aapfubeje oroku ono sùbe l'ùlo-ẹkwa-ndzukọ ono l'ùzo ndohali; yele teburu ono ghagbabe iphu; ²⁵ bya anodu l'iphu Chipfu l'eka ono mezichaa oroku, du iya nu, bu iya bu ge Chipfu turu iya onu g'o mee ya. ²⁶ O patakwapfo oru-ngweja ono, e meru le mkpola-ododo ono sùbe l'atatiphu ẹkwa ono, e gude kobuta ẹka-kakọta-adu-nsọ ono; ²⁷ bya akpo unwu-isensu oku l'oru-ngweja ono, bu iya bu ge Chipfu ziru iya g'o mee ya.

²⁸ O wota ẹkwa ono gude kochite onu-abata ulo-ẹkwa ono; ²⁹ bya eworu oru-ngweja ono, bu eka ee-gweje ngweja-akpo-oku ono sùbe le mgboru onu-abata ulo-ẹkwa-ndzukọ ono; bya egweeru Chipfu ngweja-akpo-oku; ye ngweja-nri l'oru-ngweja ono, bu iya bu ge Chipfu turu iya ekemu g'o mee ya. ³⁰ O bya apata eze gbamugbamu ono sùbe le mgbaka ulo-ẹkwa-ndzukọ ono; ye oru-ngweja ono, bu eka ee-gweje ngweja-akpo-oku ono. ³¹ O buru eze gbamugbamu ono be Eronu ye unwu iya; waa Mosisu gude kwọọ eka; ye okpa. ³² O nodu abujeru; ephe -mee g'ephe bahu l'ulo-ẹkwa-ndzukọ ono; ozoo g'ephe kpitaru ntse l'oru-ngweja ono, bu eka eegweje ngweja-akpo-oku ono; ephe akwọadaa eka ye okpa, bu iya bu ge Chipfu turu phe ekemu g'ephe meje iya. ³³ Mosisu bya achitakwapfo ẹkwa oma-unuphu ono gude kobuta oma-unuphu ulo-ẹkwa ono yele oru-ngweja ono mgburugburu; wotakwapfo ẹkwa onu-abata oma-unuphu ono kochite onu-abata iya. O buru iya bu le Mosisu ejeghee ozi obu.

Akpabiri Chipfu

³⁴ Noo ya; urwukpu ono bya asọ-kpute ụlo-ẹkwa-ndzukọ ono; akpabiri Chipfu bya eji ụlo-ẹkwa ono ejiji. ³⁵ Ophu Mosisu adukpodanu ike ye ishi l'ụlo-ẹkwa-ndzukọ ono; noo kẹle urwukpu sọ-kputeru iya; tẹme akpabiri Chipfu ji ụlo-ẹkwa-ndzukọ ono ejiji. ³⁶ Ndu Ízurẹlu nọdu abụjeru; teke urwukpu ono wụkahuru l'eli ụlo-ẹkwa ono; ẹphe akwalia. ³⁷ Teke urwukpu ono atugbuduru; ẹphe anọdu l'ẹka ẹphe nọ gbiriri jasụ mbọku, urwukpu ono a-tugbu. ³⁸ Oo ya bụ; urwukpu Chipfu, nọ asọ-kputajẹ ụlo-ẹkwa ono l'eswe; teke o beru l'enyashi l'o nwaaha g'ọku l'ataphu ndu Ízurẹlu. O bụru g'o mekọtaru bụ ono jasụ ndu Ízurẹlu jeghee ije phe ono.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d